

The Ohio State University



3 2435 01043 7788
PL248U78F371925
Fare / 001

THE OHIO STATE UNIVERSITY BOOK DEPOSITORY



D	AISLE	SECT	SHLF	SIDE	POS	ITEM	C
8	04	28	02	8	18	014	5



OHIO STATE
UNIVERSITY
LIBRARIES

A NOTE TO THE READER:

Because of its value and condition,
this volume has been microfilmed to
preserve its content.

Please check the Libraries' catalog
for location of a copy of that
microform.

Thank you, 8/27/1993
DG
The Preservation Office

Uşaklıgil, Halit Ziya

Dup.


2070

934

333

عشاقی زاده : خالد ضیا

کلیات آثار — تمثیل لایتغیر



فاره



هر حق محفوظدر

صاحب و ناشری

کتابخانه جهان صاحبی : مهران

استانبول — ابوالسعود جاده سنده « جهان » مطبعه سی

۱۳۴۱ / ۱۳۴۳

PL248

U78F37

1925

اثر تماشا ۳ رده

فاره



اشخاص

سرور پاشا	۶۰	ياشلىرنده	متقاعد اطباى عسكرىه دن
اجلال خانم	۲۸	»	قىزى ، « ايلك ازدواجندن »
زاله	۱۷	ياشنده	اوكى قىزى ، « سرور پاشانك ايكنجى زوجه سنك » ايلك قوجه سندن
سداد بك	قرقنه	ياقلاشمش	سرور پاشانك اقرباسندن
نرمين	۲۵ - ۳۰	آره سنده	اجلال خانمك ، والده طرفندن ، اقرباسندن
شهبأ	»	»	مصرک صنف ممتازينه منسوب بر عائله دن

برنجی پرده

صحنه، یاقه جقدہ ظریف و معتنا بر کوشکک طیش صفہ سنی
ارائہ ایدر . دیبده غایت کنیش و یوکسک اوچ جام قاپی ،
بورادن اولا کوشکک منحنط بر سطحده کی باغچه سنک بر قاج
آغاچی کورونور ، دها ایلریده نظارت دکنز و آطہ لرہ
حاکمدر . صاغده وصولده کوشکک داخلنه آچیلان قاپیلر .
طیش صفہ اشیاسی : قنابہ ، ماصہ ، کوچک ماصہ لر ، اسکملہ لر
و سائرہ ... مشمس بر کون ... هر شیدہ بر اثر ظرافت
و تقید حکمفرمادر .

مجلس : ۱

سرور پاشا ، نرمن (اکصوک طرزده بر چارشفلہ ، پچه کاملاً آچیقدر)
پردہ آچیلیر کن سرور پاشا دیبده جام قاپیلردن برندن
کورونور ، و کوشکک باغچه سندن منحنط بر یولی تعقیباً
چیقہ مقده بولونان نرمنہ منتظر در .

سرور پاشا — بر آرز صکرہ کندیسنه التحاق ایدن نرمنہ
نهایت کله بیلدک . بیورک ، ایچری یه کیرن ... (کورونمہ یں

برينه خطاب ايدەرك (شەبأ خانم ، غالباً يورولديكىز ، بر آز
دەھا غىرت !... (كەندى كەندىنە) حقيقە يورولمش ، ھەن
اورايە اوطوريويردى ... بر آز نفس آلەجق غالباً !... (زمينە)
يوقوش سزەدە بر آز زور كەلدى ، دكلى ؟ اولدقجە ديك ...

نرمين

اوح ! بىم ايچون يورومك لازم كەلدىمى ، ھە يول زور
ودىكدر .

سرور پاشا

منظرەنك لطافتى يورغونلغىكىزك آجيسىنى چىقارير ...
كورەجكسكىز ، بورادن نظارت نەقدر كوزلدر ... خىر ،
دەھا عىجلە اىتمەيىكىز ، صكرە باقارسكىز . سزى بر آزمضطرب
كورويورم ...

نرمين

اوت ، بر آز چارپىنتم وار ... ھەزمان بويلەدر ، بر پارچە
طيقانىقلق حس ايدىيورم ... مراق ايدىلەجك بر شى دكل ،
او قدر آلىش-قىنىم كە ... دىمك ، اجلال چوق كچىكمەدن
عودت ايدەجك ظننەدەسكىز ، اويلەمى افندم ؟ ..

سرور پاشا

محقق !.. اجلال كويك ايچنەدەدر ... نەقدر سوينەجك ...

قیمتدار تیزه زاده سیله تا کوچك یاشندن بری سویشیدیکی بر
رفیقه سنی کورمك قیزی چیلدیرته جق بر سعادتدر .

لکن شهبأ خام حالا دیکله نی-ورمی ؟ ... آیلردن بری
سزی صایقلا یوردی ، « عجبا بو سنه استانبوله کلمیه جکلمی ؟ »
سؤالی هر وسیله ایله تکرار اولونان برنقرات حکمنه کیرمشدی .
صکره صیجاق موسملرده مصرده قاله میه جغکیزی دوشونه رک :
« کورورسکز ، بر کون بغته قارشیمزه چیقیویره جکلر .. »
دیردی . نهایت ایشته ... شهبأ خانمی بن یالکز غیاباً و اسماً
طانیردم . پک خوش ، پک ظریف بر چوجق ، فقط ...

نرمین

فقط بر آز غریب دکلی ؟ ...

سرور پاشا

یعنی بر آز لایالی ، بر آز بی تکلف ، بلکه ...

نرمین

بلکه بر آز فضله سربست ! .. هم دیدیککز کبی چوجق
دکل . یکرمی آلتی یاشنده ... هیچ اولمازسه یکرمی آلتی
یاشنده ، بو قدرینی اعتراف ایدر .. (سرور پاشانک بر حرکتی
فرق ایدرک) بن شهبأی دائماً مدافعه ایدرم ، فقط اونک
بعض اطواری او درجه جالب دقتدرکه ... امینم که سرده

کنديسی کورور کورمز بر آز حیرت ایتدیکنز . ترجمهٔ حالنی
 آز چوق بیلیرسکنز ، دکللی ؟ ... پدری استانبولک الکشوخ ،
 اک شاقراق برعالمه منسوب کنج برضابط ایمش که مصره بر
 مأموریت فوق العاده ایله کوندرلش ، اوراده بالطبع بر چوق
 قبلر بوکنج وپارلاق ضابطک صاری بیقلری ایچون چارپمش .
 نهایت بو قبلر آراسنده بر دانه سی ، شهبانک والده سی ... مصرک
 اک کزیده قیزلرندن بری ... ایشته شهبأ بو ازدواجک محصور
 لیدر ، بر پارچه قاهره نک بر پارچه ده استانبولک طوپراغنده
 یتیشمش مختلط بر محصول .. اونده اوزبکیه نک قیشیله امیرکانک
 یازی ، چولک آتشیلی قوملریله بوغازک نورلی روزکاری
 غریبه لر ایجاد ایتشدرد ... زواللی شهبأ ! . هله اولا والده سی
 صکره پدرینی غائب ایدهرک بویوک بر ثروت ایچنده یاپ یالکنز
 قالیورنجه ذاتاً سربست باشلایان تربیه سی ...

سرور پاشا

اوت، یوکسک طبقه دن بر خام قیز ایچون ...

نرمین

پک فضله سربست دکللی ؟ .. اوح ، بن شهبائی دائماً
 مدافعه ایدرم ... حتی اولا انسانده کورکودن ، تربیه دن
 محروم بیاغیجه بر قیز تاثیرینی حاصل ایدر؛ صکره ده آحقیقجه ،

حقى طاشقىنچەدر، بەعضا انسانە شېھە وىرەجك قىدر... ھالبۇكى
اساسا ناموس خىصوصىندە عادىتا مەتەبىدەر، اويىلە كۆرۈنمىز اما
اوح ! بىن شېھبائى دائىما مەدافە ايدەرم... مەمافىھە او بوتون
بو ھاللىرىلە قىشېن مەسرەدە، يازىن استانبولدا ھەركىسك خوشنە
كىدەر. بالخاصە كىندىسنى اوزاقىدن ياقىندىن كۆرۈپ اىشىتمەكە
موفق اولان ار كىلرك آراسىندە بىر شەرت مخصوصەسى وار :
اونىدە مستىنا بىر فطرت بولورلر مش... فقط شىمدىيە قىدرە
بىر ازدواج طلبى وقوعە كەلەدى. ار كىلر اونى بىكەنىورلر اما
اونىكە تاهلى دوشونمەيورلر...

سرور پاشا

بو كۆنك كىبار عالمىدە پىك مقبول بىر نمونە اولىق لازم كلىر.

نرمين

آه، بىلسە كىز او عالمك نە ھالدا اولدىغىنە، اورالردە ياپىلان
شىلرە، اورالردە سويلەنن شىلرە واقف اولسە كىز...

سرور پاشا

اوت، آرتق اولە سوقاق بىرلشمىش كۆرۈنىور، سانىكە
ارادن مردىون باصامقلىرىنى قالدىر مىشلىر، قاپى دوغرىدن
دوغرىيە قالدىرىمە آچىلىور... (بىردىن بىرە جام قاپىلىردىن

صولده كنه توجه ایدەرك و نزمینه كوسترەرك (باقیكز ، اصل
نظارت بو نقطه دندر ، كوریورمیسكز ...؟

نرمین — باقەرق

نە کوزل! نە کوزل!.. بر خیال لوحه سی، بر شعر پارچه سی...
شهبأ!.. کلسهك آ، کل، کل، بورادن منظره یه باق!

سرور پاشا — اوضاع ایله كوسترەرك

بوراده کوز صیرتلدن قایه قایه نهایت قارتال اوستنده
توقف ایدر، ایسترسه کز بردن بره آراده کی قاصله یی آتلایه رق
تا اوزاقلرده سیسله نن اطه لره قدر کوزلر کز قوشار... تا
آشاغیده دکز را کد، مائی بر کول کبیدر؛ یشیل صیرتلدن
صکره کونشک قیزغین پارلتیلری آلتنده قاینار بر مائی...

نرمین

آه! نە کوزل! بر رؤیا عالمی... (کیرن شهبأیه) کل،
آرتق جانم، نە اولدک، الله عشقنه...؟

مجلس : ۲

اولکیلر، شهبأ نرمیندن دها شیق، برالنده شمسیه، برالنده یلپازه

شهباء

نەمى اولدم ؟ بۇدە سورىلە جق شىمى ؟ سانكە سن بشقە
درلومىسك ؟ بر ساعىتىدىن برى دىيانك اك بوزوق يولنىدە اك
بوزوق ارابەسىنىك ايچىندە ، دورلو طاشلىك اوستىدىن سىكەركە ،
دورلو چوقۇرلارە باتەرق يىوارلانى يىوارلانى كەلكە ؛ اوستە بىردە
كونشك آلتىدە كوشكك بو قوشلىرىدىن طيرماق لازم كەلدى .
حالا نە اولدىك دىيە سورىيورسك . نە اولە جىم ؟ سادە جە محو
اولدم . ارتق ايلر طوتار يىرم قالمادى ... پاشادە كوشكىنى ،
باغنى ، باغچەسىنى كوستىرمك ايچون تام فرصت بودى . دىدى .
الله عمرلر وىرسون افندىم ، پىك مەشكىر اولدىق ، لىكن بونىك
مابعدى وارسە ارتق لطف بىيوررسىكز دىكىلى ؟ امىركانىك
رىختىمارىلە بويوك اطەنىك نظام جادەسىدىن بشقە يول بىلىمەين
اسقارپىنلر مەزە اولسون مەرحەمت ايدىكىز ... (اطرافىنە باقارق)
واى ! .. بوراسى پىك خوش بىرىمش ، بوراسى اصل كوشكىمى ؟ ..

سرور پاشا

اصل كوشك كچرىكن يوقارىدە كوردىكىكىز بنا .. بواونىك
اتەكەندە بر كوچك دائىرە كە اجلالە مخصوصدر .

نرمين

انسان بورايە قدر كەبىلىمك ايچون اجلالك پىك بويوك

خاطری اولق ایجاب ایدر .

شهبأ

بشقه درلو بوسیجا قده بویو لیاغه تحمل ایدلمزدوغروسی...

نرمین

مصرفدن استانبوله قدر سیاحت یورغونلغنی آلمه دن ...
عادتاً یتاقدن چیقهمیه جق درجده خسته اولدیغم حالده ...

شهبأ

بر توز ، بر کونش که معاذالله ... بیلیرمیسکیز ، بن
کویلرک بو نوعنه تحمل ایده مم .

نرمین

بنده بالعکس بویله بر یرده یشامق ایستردم .

شهبأ

سنی ؟ آما یاپدک ها ؟ ...

نرمین

سنی تأمین ایده رم ...

شهبأ

هایدی ، هایدی ! .. بورالری نه سکا نه بکا یاراشیر ...

بو ایصسنزلق ، بو سسسنزلك! .. چیلدی رmq ایشدن بیلله دكل .
 هله كوش ... بو كوشك آلتنده انسان جلدینی ، بوتوزك
 ایچنده صاحیلرینی نصل محافظه ایده بیلیر ؟ .. هله یوللرك
 چاقیللری ..

نرمین

لكن بر كره بورایه ، بونقطهیه كلنجه ...

شهبأ — مستهزیانه كولهرك

شاعرانه برمنظره دكلی ؟ یعنی آطه لره ایکی ساعتلك یولده
 بر تپه دن متحسرانه بر باقیش ... بیچاره اجلال ، اللهك بو
 داغنده نه یاپیور ، رجا ایده رم ؟ .. ديمك حالی هیچ دكیشمه-
 دی . هپ او نشئه لی ، اكلنجه لی اجلال او یله می ؟ بنده
 بویله سندن حظ ایده رم ، دوغروسی .. لکن نره لره صاووشمش ؟
 بالطبع برچوق مسافرلری واردر .. قیر عالمنه می چیقديلر
 نه یامغه کیتديلر ؟

سرور پاشا

اجلالی ؟ نه مناسبت ؟ .. نه مسافری ، نه ده ضیافتی وار .
 ساده جه کویده خسته فقیر بر قادینجغزی کورمکه کیتدی .
 بزده چاشیر یقارکن نصلسه دوشوب بیلکی قیریلان بر بیچاره ...

نرمین — اورپرہ رک

امان نہ مدھش شی !.. اجلال ، دیمک ، اورایہ کیتدی ؟

سرور پاشا — متعجب

ہوندہ شاشیلہ جق نہ وار ؟

نرمین

بن اضطراب چکن آدملری کورہ مم ، اونلردن زیادہ بن
اضطراب دویارم .

شہبأ — معترض

اما یابدک ، نرمین !...

نرمین

اوت ، اوت ، حقیقہً جداً اضطراب دویارم . المده دکل .
بر کرہ اقربادن برینک اوندہ ایکن ، بردن برہ آغریسی طوتمازمی ؟
کیجہ یاریسی اورادن قاجغہ مجبور اولدم . قوجہ سی بی صا-
لیویرمہ مک ایستہ یوردی . نہ دیرسکز ، اویانندن ایرلما یوردی .
طادتا سیر ایدیله جک برشی کبی باشنک اوجندہ ایدی . بوتون
او اضطرابلری کورو یور ، فریادلری دیکلہ یوردی . اونک بو
حالہ او قدر شاشدم وقیزدم کہ کندیمی طوتامادم : « نصل
اولیورده بونی کورمکہ تحمل ایدیورسکز ؟ سزده قلب دینن

شی یوقی ؟ ۰ دیمکه مجبور اولدم. والحاصل دوره مادم ، قاچدم ،
اگر قالسه یدم مطلق اولوردم ...

شهبأ

بكا كلنجه، بر كره بنده ده بويله بر مراق باشلا يوردي. خاطريكه
كليرمي ، نرمين ، هانيا ايكي سنه اول فريده خانم افندي ، بر
مؤسسـه خيريه وجوده كتير مك ايچون ثروتي ترك ايتمكه تشبث
ايدنجه نصل بر تصوره دوشمشدك ؟ يعني او فكري بن وير -
مشدم ... (بر آز متردد ، بر سرور پاشايه بر نرمينه باقه رق)
توبه كار اولان قادينلره، هانيا نصل تعبير ايدرلر ، ايشته اونلره
مخصوص بر ملجأ ...

نرمين — تكدير آميز

شهبأ ! ...

شهبأ

بن قيافتي بيله حاضر لامشدم. مستثنا بر ماهيتي اولان بو
مؤسسـه ده خسته باقيجيلغنه مخصوص بر قيافت كه ... (كمال
هوسله تعريف ايدرك) قهوه رنگي ، غايت دار ، بر الديون
كبي بوتون وجودي صيقان بر اتكلك ، بياض ، اطرافي
دانتلالرله ، كوچك جيبيلرله بر اوكلك ... باشمده ، تاتپه مك
اوسـستنده ، بر يانه دوغرو ، چارپيقجه ، ميني ميني ، بياض

تولدن، بركوچوك سيميت قدر، برباشلق.. هرشي حاضردى:
 صكره بردن برة اختيار قادينك اوزاقدن ايكي وارثي چيقه رق
 ذهني چلديلر. بى: مؤسسە كزە او قدر تهاجم اولور كه
 باشه چيقه مازسكز، ديكري: مؤسسە كزە بر دانه اوغرايان
 بولونماز، پاره كزە يازيق اولور؛ ديمشلىر. هانكييسنك فكرينده
 اصابت وار، بيلمم، فقط نتيجه ده مؤسسە ده وجوده كله مەدى،
 بىم او كوزل خسته باقىجي اثوابى ده دولابك ديبه آصمق
 لازم كلدى. ديمك اجلال... بوراده، بواللهك داغنده
 بيلكنى قيران چاشيرجي قادينلره خسته باقىجىلقله مى وقت
 كچيريور؟.. لكن، پاشا حضرتلرى... (اسرار پرورانه
 سسنى يواشلاته رق) اجلال كلمه دن اول بر آز آكلاسه ق.
 قوجه سندن نه خبر؟...

سرور پاشا

قوجه سندنمى؟..

شهبأ

اوت، دامادىكزدن... حالا قابالىمى؟

سرور پاشا

نرمين — (باشنى اشارت ايدەرك)

هپ او حالده، اويلەمى؟

سرور پاشا

اون بش آیدن بری ...

شهبأ

اون بش آی ، لکن ارتق قرار ویرسه ... (الیه بر
اشارت ایدرکه: « ارتق اخرته یوللانسه... » معناسنی افاده ایدر)

نرمین (تکدیر آمیز)

شهبأ !!

شهبأ

بن فکرمی آچیق سویله دم ... اجلالک قوجه سی هیچ
بر زمان قوجه دییه جک بر آدم دکلدی. اللهک اک سفیه ، اک
چاقین بر مخلوقی !! صکره !! اون بش آی ، اپی اوزون بر
زماندر. بو حالک یکر می سنه سور میه جکنی کیم تأمین ایده بیلیر؟ ..
یامعاذالله ای اولیو یرسه ؟ اجلالک حالنی دوشونک بر کره !! ...
دنیا ده بو قدر فنا بروضعیت اوله بیلیر می ؟ تصور ایتسه کز آ ...

نرمین

بکامی سویله یورسک ؟ ...

شهبأ

یوق ، اجلال سکاده بکزه مز. سن قوجه کله دارغینسک ،

آری یاشایورسکز ، برکون حکم ایدیورسهك آریلیرسك .
 آرتق خوشکه کیتمه‌ین بر ازدواجی فسخ ایدیورمك سـنك
 الکهده دیمکدر . اجلال اوپله می ؟ ... نه اوزون مسئله ! حتی
 غالباً چاره بولنه مازمش . بوتون فتواخانه آلت اوست اولمالی
 ایمش ... اکلایشیلان شریعتك بر حکمی ، بر مقصدی وار ... سن
 ذاتاً بوشانمش کیسك ، بن آرتق قوجه‌مش بر قیزم ، دکلی
 پاشا حضرتلری ؟ سزده ایکی کره اولنمش ، ایکی کره بکار
 قالمش بر آدمسکز ، بونلر هپ صریح وضعیتلردر ، بلکه‌ده هر
 برینك کندینه مخصوص مزیتلری واردر ، لکن بر دلینك
 قاریسی اولوب قالمق ...

نرمین — (تکدیر آمیز)

شهبأ !..

شهبأ — (تقلید ایده‌رك)

شهبأ !.. شهبأ !.. شهبأ !.. نه وارمش صانکه ؟ دلی دیدیکمه می
 قیزیورسك ؟ بلکه نازکانه بر تعبیر دکل . پاشا حضرتلری ،
 سز لر ، طبیبلر ، بوکا خسته می دیرسکز ؟ .. ایش کلمه‌ده دکل .
 سز اجلالك حالنه باقك . متأهل ؟ حقیقت حالده اوپله دکل ،
 هنوز قوجه صاحبی اولمامش ... قیزم ؟ اوپله ده کل ، چونکه
 کلین اولمش . دول ؟ خیر ، دول‌ده دکل ، چونکه قوجه‌سی

وار ... بن بو حالی تحلم فرسا بولیورم! ... امان افندم ، بوراسی
نه صیجاق! ... اوف ، نه صیجاق ، نه صیجاق! ...

سرور پاشا

نمده عقم نرده .. سزه برشی اکرام ایدمه دم ، عفو
اولونور قصوردکل ... (نرمینه) تردن بونالمش اوله جقسکز؟ ...

نرمین

بن هیچ ترله م ، افندم (تیکسینه رک) تر ! ... نه فنا
شی! ...

سرور پاشا

عجبا نه تکلیف ایتسم ! ...

نرمین

هیچ ، هیچ ، افندم ، زحمت بیورمایکز ...

شهبأ

یوق ، یوق ، ایستهرز افندم ... اوپله بر حرارت باصدی که ...
چاتلایورم .

سرور پاشا

بر شروب ، یاخود

شهبأ

نه اولورسه اولسون ، صوغوق بر شی اولسونده ...

سرور پاشا

عفویکزی رجا ایده رم ، ذهنأ مشغولمده ...

نرمین

بالعکس ، قباحت بزم ، سزی مشغول ایتدک ، محقق
مسافرلر کزده وار ...

سرور پاشا

مسافرلرمی ؟ خیر ، هیچ کیمسه یوق ...

نرمین ، و ، شهبأ — بو یالکیزلق خبرندن مغیر

یا ؟ ... دیمک بو کونلرده یاپ یالکیزسکیز

سرور پاشا

دائمأ! یاپ یالکیز قیزم بورایه قاپانه لیدن بری هیچ
کیمسه ایله الفت ایتمه یورز ، یالکیز کویک شیخ افندیسی
مستثنا ... بعضأده کوچک ، قیصه بر زیارت ... قوجه سی
خسته بر قادینده بشقه طرز حیاته دو کوله مزآ . اسکی عالمیره
کلیأ وداع ایتدی .

شهبأ

واه واه ! .. ديمك قوجه سنك دا ... خسته لغندن برى ،
يعنى اون بش آيدن برى ، اجلال هپ بوراده ، ياپ يالكنز
اويله مى ؟ ...

سرور پاشا

اوت ، بنمله برابر ...

شهبأ

واى واى ! .. شو حالده كوشكده مسافر اوله رق كيمسه لر
يوق ؟ ..

سرور پاشا

بر كدى بيله يوق . او اسكى اكلنجه عالملى ، كوشك
هر اوداسنى دولديران اوزون مسافرت دورلى تماماً كچدى .
كورسيورسكز آ ، بوتون كوشك سزك امر كزه آماده ...
امين اولكنز كه ايسته ديككنز قدر قاله بيليرسكز ، وبو شرفى
بزه نه قدر اوزون زمان ايچون تخصيص ايدرسه كز او قدر
متشكر اولورز . او حالده صوغوق برصو ايله شروب ، دكلى
افندم . مثلاً قيزيلجق ، سرينلك ويره جك برشى ...

چيقار

مجلس : ۳

ترمین — شهبأ

(غیر منتظر بر مصیبت ایچنه دوشمشلرجه سنه باقیشیرلر)

شهبأ

کوردکی ، باشمزه کلنلری ؟ ..

شهبأ

بنسه بوراسنی لبالب مسافرلرله ، خصملردن ، دوستلردن
مرکب بر پیغین خلق ایله دولو بوله جغم امیدنده ایدم . اجلالک
معتاد اولان حیاتی ، او نشئه ، اکلنجه ، ذوق و صفا ، سرور
وقهقهه عالمی ... برده بورایه کله لم که ... برکدی بیله یوق ! ..

ترمین

اونک حالنده بولونان برقادین ایچون طبیعی دکلی ؟

شهبأ

اونک حالی ! ... اجلالک حیاتی بویله قاره ماتملره صاره-
جغنه احتمال ویریلیرمیدی ؟ اونک قدر چیلغین ، دائماً کولوب
اوینامغه دوشکون برقادین ایچون شاشیله جق برحال ... تبدیل

مشرب ایتمش دیمك اوله جق !... صندوقلرمزى قرتالده
براقدیغمزه اصابت ایتمشز ..

نرمین

اوت ، اما شیمدی نصل یاپه جغز ؟ ..

شهبأ

قاچق ایچونمی ؟ .. اوراسنی بکا براق ، سن هیچ مراق
ایتمه ! .. الله کوسترمه سین ، بو سکوت عالمنك ایچنه کیروب
کومولمك بنم خرجم دکل . بزده اك کوزل اثوابلرمزى برابر
کتیردك ... بونلری کیمه کوستره جکدك ، الله عشقنه ...
شیخ افندی یه می ؟ .. وعظ دیکله مک ایچون ظاهر ! .. کوندوز-
لری خسته لری ، سقطلری دولاشمق ، کیجه لری ده بوناق بر
اختیارله طاولة اوینامق معاذالله !... شو مصیبتنه باقك
بر کره !...

نرمین

اوت اما قورتولمه نك چاره سی ؟

شهبأ

اونی بکا براق دیدم آ ... باق ایشك ایچنیدن نه قولایلقله
صیریلاجغم ... پاشا بابایی قاندرمق ایشدن بیله دکل ... لکن

انشته کمیدر، نه یکدر، پک پارلاق بر طیبیه بکزه میور دو غروسی .
هر حالده نزله یه علاج کشف اولونورسه اونی ایجاد ایده جک
اولان پاشا انشتهک اولیه جق . (سرور پاشا آرقه سنده ، النده
بر تپسی ایله بر خدمتچی کیر) ... آمان پاشا حضرتلری ...
نه قدر زحمت ایتدیکر ، افندم ؟ ... باری صوغوق اولسه ...

مجلس : ۴

سرور پاشا کندی ایله شهبایه شروب ویره رک
گویمزک صوی بوز کیدر . (نرمینه) سزه تقدیم ایده مز مییم ؟ ...
نرمین
تشکر ایدرم ، افندم ؟ ... بن هیچ بر وقت حرارت
حس ایتم ...
شهبأ — اولایودوم یودوم ایچهرک
اوو ! .. نرمین ! .. نرمین نه ترلر ، نه صوصار ... او
اجسام لطیفه دندر . بن ده بالعکس ، هله آچلغه ، صوسزلغه
اصلا یوزم یوقدر ، آره صره مطلقا بوغازمدن قوت ویره جک
بر شی کچمزسه اوله ماز ...

(قدحک بقیه سنی بردنبره دیکر)

نرمین — دقتی دعوت ایدن بر طورلہ

هو هو !

شہباً — مستریغ

آہ! پاشا حضرتلری اولمش برو جودہ یکیدن جان ویردیکیز!..

نرمین — عینی اویون

هو هو !

شہباً — کندی کندینہ

ہا صحیح ! .. (نرمینہ مقابلاً) هو هو ! .. (جہراً)
 اوت، یکیدن جان ویردیکیز!.. (قدحی منتظر اولان خدمتچینک
 النده کی تپسی یہ قور ، خدمتچی چیقارکن ، کویا تصادفاً ،
 کوزی کنارده قونسولک اوسقتندہ ساعتہ ایلدیشہرک) آمان
 نرمین ، ساعت اوچ اولیور ...

نرمین — ساعتہ قوشہرق

اوچی ؟ آمان یاربی !

شہباً

آراہہ نرمہدہ قالدی ؟ ..

نرمین

آنحقوقت وار .

سرور پاشا

نه وقتی ؟ .

شهبأ

سویله مه مشمیدم، افندم؟ بواو کمزده کی تره نه یتیشمکه مجبور ز...

سرور پاشا — متلاشی

قابل دکل افندم ! .. سزی نصل براقیر ز ؟ ..

شهبأ

آ ، مطلق کیتمه لی یز ، افندم ؟ .. سزه آ کلاتمادق ، غالباً
افندم . بز ساده جه آطه دن قرتاله کچمک ، یاقه جغه قدر قوشوب
اجلال ایله اوپوشد کدن صکره تکرار اینمک ، اورادن ده ...
(ترتیب ایده جکی یلانی آرایور کی نزمینه باقه رق) بواقشام
کوز تپه ده بر ضیافته دعوتلی یز ... اوراده بزه منتظر برچوق
احباب وار . شیمیدن صبر سز لانمغه باشلامشردر ..
ا کر بزی بواقشام کور منز لسه ایکیمزی ده اوچور ورلر ؟ ...

سرور پاشا — بو تعبیری اکلامیه رق

اوچور ورلر ؟ ..

شهبأ — کندینی طویلایه رق

یعنی حق کمزده سویله میه جکلری یوقدر ؟ .. هله نزمین ؟ ...

زواللينك بوتون علاجلى اشاعیده قالدی ...

نرمین

حقیقهٔ افندم، بنم حالمی بیلیرسکیز آ ... علاجسز برکیجه
کچیرمک ممکن دکدر که ... یوقسه بوراده، بو سکون ایچنده
قالق، نه قدر خوش اولوردی !...

شهبأ

هله بن، هله بن، نه قدر ممنون اوله جقدم ... چابوق نرمین،
ارابه نك چاره سنی بوله لم، ساعت اوچی بش کچور !.. پاشا
حضر تلی، بزی او قدر ملتفتانه قبول بیوردیکز که جداً منتدار
اولدق. اجلالی کوره مدیکمزده نه قدر متأسفز...

سرور پاشا — پک تلاش ایله

امان افندم، پک رجا ایده رم ... شمدی آدم کوندروب
اجلالی ارادیره جغم، هله نرمین خانمک علاجارینه کلنجه ...
بوراسنک بر طیب اوی اولدیغنی اونو تماییکز ...

شهبأ — کندی کندینه

بشقه برشی ایجاد ایتمه لیدی. (نرمینله برابر) خیر، خیر،
زحمت ایتمه ییکز، افندم ...

سرور پاشا — پک رجا کار و جداً متأثر

بن سزلی کورونجه، ظن ایتمشدم، ظن دکل امید ایتمشدم که

اوزون برمدت سزی بوراده الیقویمق ممکن اوله جق ... حقیقه
 افندم ، براز لطف ایتسه کز ... بکا بر نصیحت ویره جک قدر
 قالسه کز نه اولور ؟ .. استشاریه او قدر احتیاجم وار که ...
 تام زماننده کلمشدیکز ... سزی کورونجه کندی کندیمه :
 الله کوندردی ، دیورم . سز ایکیکزه قیزی سورسکز ...
 اوکا تام بر خدمت ایتک زمانی کلدی ، اوکا وبکا ... اجلالک
 حیاتنده بو کون مشکل بر مسئله وار ، عادتا بر تهله که ... بنده
 یاپ یالکزم ، بر ازده ذهنده پریشانلق حس ایدیورم . تک
 باشمه بو ایشک ایچندن حقیقه میه جغم ... بر دقیقه مساعده ایدیکز ،
 شیمدی چاغیرتهیم ... هان کلیرم ، سزه احوالی بر بر حکایه
 ایدیمده باقیکز ...

چیقار

مجلس : ۵

شهبأ

اوو !.. حوادث وار ، زمین ، حوادث !.. دوغروسی
 بن آرتق کیتمکدن واز کچدم ...

نرمین

نصل ؟ نصل ؟

شهبأ

ایشیتمه دکمی ؟ اجلالک حیاتنده مشکل بر مسئله هادتا بر
تهلکه وارمش ... اکر بونی اکلانه دن بورادن حرکت ایده رم
ظن اتدیورسهک تماميله الدانیورسک ، جوانم ! ...

نرمین

آدم سنده !.. کیم بیلیر نه اولیه جق شیلردر ... بر طاقم
شکایتلر ، دردلر ، کدرلر ... اضطراب چکن برقادینله قیزی
مراق ایدن براختیارک اغلایوب صیزلامه لری ... بنم بویله ماتم
فصللرینه هیچ یوزم یوقدر ...

شهبأ

ب بوفکرده دکلم . بن ظن ایدیورم که ایشک ایچنده بر
حکایه ، برماجرا وار ، هاشقانه بر مسئله ... آه او اجلال آه ! ..
دیمک هیچده تبدیل مشرب ایتمه مش ...

نرمین

اوت اما تره نی قاچیره جغز .

شهبأ

بونی قاچیرسهق اوته کنه قالیرز ...

نرمين

بزی بکله یین دوستلر ... بکا مطلقا لازم اولان علاجلر ..
اونلر نه اوله جق ؟

شهبأ

بکاده می بو آغز ! ..

نرمين

دوغروسى ، شهبأ ، عقلاکه نه کلیرسه هر کسه اونی
قبول ایتدیرمک ایسترسک ...

شهبأ — نرمينك يالتاقلانهرق چکه سنی اوقشار

آه بنم کوزل نرمينم ... شهبأسنک خاطرندن چيقه مایان
نرمينجکم ...

مجلس : ۶

اولکیلر ، سرور پاشا

سرور پاشا

شیمدی قوشوب اجلالی کتیره جکله افندم ... فاره یی
چاغیرتدم ..

شهباء

فاره نه اوليور ..؟

سرور پاشا

فاره مې ..؟ ژاله ... مرحومه زوجه مك قیزی ...

شهباء

ها ..! ايکنجې قزیکز ، اویله مې افندم ؟

سرور پاشا

خير، بنم قیزم دکل، ايکنجې زوجه مك ايلك قوجه سندن
اولان قیزی ..

شهباء — کندی کندی نه

ايکنجې زوجه ، ايلك قوجه ، بيلم قاجنجې بر قیز ...
دولاشیق بر مسئله ...

سرور پاشا

تعیر معروفيله اوکی قیزم ..!

نرمین

بو فاره اسمنی یکی ایشیدیورم ... بولقبه سبب نه در ..؟

سرور پاشا — سببی آرایه رق

چونکه ... بنده پک ای بیلمه یورم ... ژاله اوفاراق

تفه رکدر . اونک دائمسا قورقاق ، اورکک ، سینسی بر حالی
 واردر . کوزه کورونمز ، سسی ایشیدلمز ... کوشه لرده ،
 بوجاقلرده دولاشیر ، دیوارلره سورونه رک کولکه کبی کچر..
 اوکا بو لقی اجلال ویردی ...

شهبأ

اوتهدن بری یانکزده میدر ، افندم ؟

سرور پاشا

باباسی ، آناسی ، بشقه کیمسه سی اولمادیفی ایچون بر لیلی
 مکتبه ویرمشدک ، بو صوک سنهدن صکره دارالمعلماته کیره -
 جک ... شیمدی یاز تعطیللرینی اوراده کجیریور ... بن بو
 نیتده دکلدم آ اجلال ایسته دی ... اوکا عادتاً دوشکوندر .

شهبأ

قاج یاشنده وار ، افندم ..؟

سرور پاشا

اون بش ، بلکه اون آلتی ...

شهبأ

اوو !. اوو !. کوزلی ؟ ...

سرور پاشا

هنوز نه اوله جغی بللی دکل ... چکینکن ، سینسی بر
چوجق ... بجر کسر ، چلیمسز بر حالی واردر که انسانی بر
حکم ویرمکدن منع ایدر .. بی معنی بر مخلوق ! ..

شهبأ

او بی معنی مخلوقلرک قفاسنده اوپله معنالر قاینار که ...

سرور پاشا

خیر ، خیر ، بونده قاینایان بر شیلر یور .. واقعا مکتبک
مدیره سی اوکا دائر صورت خصوصیه ده بیان مطالعه ایدر کن :
پک کوزلری یرده ! .. دقت ایتله لی ... دیردی اما بن امینم ،
اونک نه قفاسنده ، نه یوره کنده ... (کورولتوسزجه کیرن
ژاله یی کوره رک) .. وای سن بوراده میدک ؟ ... نه وقت
کلدک ؟ .. ایشته فاره یی کوردیکه زمی ؟ ... کیرر ، چیقار ،
دولاشیر ، سسی ایشیدلمز ... دائماً بویله ... باشلیجه نفرت
ایتدیکم شیلردن بری ... نره دن کلیورسک باقه یم ؟ ..



مجلس : ۷

اولکيلر ، ژاله ، غايت محترز کورينور ، يواش و ترددله

سويلر

ژاله

آيازمه دن !

سرور پاشا

درسك نه اولدى ؟

ژاله

رسم ياپيوردم .

سرور پاشا — انى اوزاتهرق

كوستر باقه لم.

ژاله — صيقيله رق

شى .. دفترم يانمده دكل .

سرور پاشا

آ كلاشيلدى ، كوچك خانمك دفتريني بر كره بيله كورمك
نعيب اولميه جق . شونى بو قدر صاقلامقده بر علت وار اما ...

شهبأ

رجا ایدهرم ، تکدیر ایتھیک . دمین نه دیسوردیکز ؟
بالعکس پک کوزل ...

سرور پاشا

• کوزل دینه جک نه سی وار ؟ هنوز چوجقلقدن چیقهمامش .
اصل کیتدکجه کوزلله شن اجلالدر ، شیمدی کورر سکزی ! ..
- ژاله - دها خانملری سلاملامادک ! ..

نرمین -- یاواش سسله شهبأیه

حقیقه ، مینی مینی ، بیاض ، ظریف برطاوشانه بکزه یور .

شهبأ -- یاواش سسله نرمینه

دائما دایاق یین برچوجق حالی وار .

سرور پاشا -- ژاله یه

اجلال خانم یاقینده دونه جکمی ، عجبا ؟

ژاله -- غایت قورقاق بر ادا ایله

ساعت درتده !

سرور پاشا

سکا او یله می دیدی ؟

ژاله

خبر .

سرور پاشا

او حالده نره دن بيليورسك ؟ ... سويله سهك آ ! .. لا قيردي يي
هر وقت آغز كدن كر پتنله سو كمه لي ..

شهبأ -- ياواش سسله نرمينه

او كي بابا بك سرت .

سرور پاشا -- دوام ايدهرك ، ژالهي

نره دن بيليورسك ؟

ژاله

اقشام سيرانه چيغه جق ده ...

سرور پاشا

سنگله مي !

ژاله

بيلم .

سرور پاشا

يوقسه يكنمليه مي ؟

نرمين و شهبأ متخير و در حال محض دقت كسيلا رك
بو يكن كيم اوليور ؟

سرور پاشا

هر حالده سن ده برابر كيدر سك . شيمدي نره ده اولديغي
بيلور ميسك ؟

ژاله

ظن ايده رم ، نظيفه منلايه كيتدي .

سرور پاشا

او حالده كيدر چاغيزرسك .

شهبأ

امان افندم ، بو صيحا قده .. بر اوشاق كوندرسه كز .

سرور پاشا

خير ، خير ، براقك كيتسين . او آيا غنه پك چابقدر .

شهبأ — يواش سسله نرمينه

زوالاتي شورايه بورايه صالدير يورلر .

سرور پاشا — ژاله به

هايدي باقه لم !

ژاله

آنجق ...

سرور پاشا

ینه نه وار ؟ .. سویله سهك آ ! .. آنجق ، نه اولمش ؟.

ژاله

ذاتاً اونى آلمغه كیدن اولدى ، غالبا ..

سرور پاشا

نه وقت ؟

ژاله

بر ساعت قدر وار .

سرور پاشا

سداد بكمى ؟

ژاله

بید . . ظن ایدەرم.

سرور پاشا

او حالده مطلقا سنده كیدرسك ، یعنی ديمك ايسته يورم كه
 سنده ينه كیدرسك. خبر وير كه بويوك آطه دن مسافرلى وار.
 چابق كیدرسك ، دولاشيق يوللردن كچمه ، بويوك جاده يي

تعقيب ايت ، دها كسدير مه اولور . كل كوستريم . (ژاله يي
برابر صحنه نك ديبنه دوهري كوتورر .)

شهبأ — ژاله يه

باري بنم شمسيه مي آليگز .

سرور پاشا

بو ياشده چوجق كونشيدن مي قورقه جق ؟ (ژاله نك
يلديرمه سنك جيبندن دفتر ك اوجني كوره رك) باق ، باق ، دميين
نه ديوردك ؟ ايسته رسم دفترى ... (چكوب آليز)

شهبأ

او نه در افندم ؟

سرور پاشا — دفترى كوستره رك

رسم دفترى !

ژاله — متدهش

آمان افندم ، رجا ايده رم ! . (كرى آلفه تشبث ايدر)

سرور پاشا

هله بر كوره لم ! (آچق اوزره اوزاقلاشير)

ژاله — تلاش عظيمه و كوزلرنده ياشلرله ، دفترى آلفه چاليشير ،
سرور پاشا براقق ايسته من .

رجا ايده رم ، افندم ، رجا ايده رم ! ..

سرور پاشا

هله ، هله کورمک ایسته یورم .

شهبأ و نرمین -- نیاز مندانه مداخله ایدرک
آمان افندم ، لطف ایدیکز مساعده بیورک .

سرور پاشا

اوت ، اوت ، کورمک ایسته یورم . بونه قدر چکینمک !
چکینکنلکک بودرجه سی ده کولونج . نهایت شو دفترک ایچنده -
کیلری کورمکه قرار ویردم .

زاله

آمان افندم ، آیاقلریکزه قاپانه یم . کورمیورمیسکز ،
نه قدر یالوار بیورم ؟

شهبأ — کولمکه چالیشه رق ، فقط متأثر ، دفتری آلمق ایچون
معاونت ایدرک

لکن ، پاشا ، ایشته چوجق ایسته میور ، البته کندینه
کوره بر سببی اوله جق .

سرور پاشا

اوو ! .. قوجه بر مسئله اولدی .. پک اعلی ! پک اعلی !
آل ، دفتریکی ایسته دیکک قدر صاقلا ! . (دفتری ذاتاً براوجنی
براقمیان زاله یه ترک ایدر) . هایدی باقهلم ، شیمدی اجلال

خامی کتیرمکه کیت .، نه تحف شی !. کل ، یولی کوستره یم .
مسافرلره اخلاقکه دائر ای بر نمونه کوستردک . (اونی صحنه نك
دینه کوتورر و یولی تعریف ایدهرک یواش سسله سویلر .)

نرمین صحنه نك اوك طرفنده ، شهبأیه

بیچاره چوجق ! نه قدر یتیزله نیور !.

شهبأ

یاوروجق !... (براز ملاحظه ایله) لکن بو او کیلک نه
غریب بر حس ! اک نازک بر آدمی اک وحشی بر جانوار حاله
کتیریور .

نرمین

انشته مده نازک بر آدم اولمقدن بشقه فضله اوله رق علم و
فن صاحبی اولق فضیلتی ده وار ...

شهبأ — باشنی صالایه رق و کوزلرینی یومارق دوداقلرینی بو کر .
بو صروده سرور پاشا ژالهی یوله چیقاردقدن صو کره
صحنه نك او کته کلیر :

آرتق کوروشه بیلیرز ، افندم .

مجلس : ۸

نرمین ، شهبأ ، سرور پاشا

شهبأ

پاشا حضرتلری ، دمین بر سداد بکدن بحث ایتدیگز :
بوسداد بك نره دن چیقدی ؟ دیمك عزلتگاهكزه اوغراپانلرده
وار . او حالده بو كوشه جك او قدر تنها دكل .

سرور پاشا

اوت ، بر آیدن بری .. مع التأسف !.. اوطوریگز ، رجا
ایده رم . سزه براز حالمدن بحث ایده یم . آجینه جق بر حال .
برازده رأ یکزدن استفاده ایتمش اولورم . بن شهر حیاتندن تماماً
چیقوبده کویده قاپاندقدن صکره دولاشیق مسئله لره بك عقل
ایردیره مز اولدم .

نرمین و شهبأ مراق ایله یاقلاشه رق

نه یولده دولاشیق مسئله لر ؟ ..

سرور پاشا

تعبیر دیگرله حسیات مسئله لرینه ...

نرمین ایله شهباً دها زیاده یا قلا شەرق
حسیات مسئله لریمی ؟...

سرور پاشا

پك اعلى بيلير سكر كه بن ايكي كره تاهل ايتشدم ،
ايكيسنده ده زوجه لرمله آسوده وسا كن ، متقابل بر اعتماده ،
متناظر بر محبته مستند ، راكد و مستريح بر عمر كچيردم . بونی
سزه سويله مكدن مقصد بعض شيلرده تجربه دن ، بهره دن محروم
اولديغمه اشارتدر . حال بو كه قضا اجلالی ، بد بخت قیزی ،
حياتك اك زياده غليانه معروض بر مجراسنه سوق ايتدی . سز
استانبولك درلو وقايع و حادثاته صحنه اولان بر زمينته ياشايور -
سكر . بو كوی حياتك سكر كون عزلق ايچنده بني شاشيرتان
شيلره احتمال سز پك قولايقله چاره بوله بيلير سكر .

شهباً -- پك زياده مراق ايله
البتہ افندم ! شهبه می وار ؟ ..

نرمین -- عين اثار مراق ايله
يچاره اجلال ! ..

سرور پاشا

دردلرمی تماميله آچيم .

شهبأ

پك ابي ايدر سكر ، افندم . جكينمه يكر ، تماميله سويله ييكزه .

نرمين ايله شهبأ سرور پاشايه دها زياده تقرب ايدر لر

سرور پاشا

اجلالك ازدواجي مشوم برازدواج اولمش ایدی . مرحومه
زوجه مده سويلردم ..

نرمين

تيزه مەمی ؟

سرور پاشا

خير ، ايكنجی زوجه مە . اجلال تيزه كزك حياتنده كلين
اولما مشدی .

شهبأ -- كندی كندينه

قاريشيق بر بيلمجه يه بکزه يور ..

سرور پاشا

اوت ، مرحومه زوجه مده سويلردم : « بو خورشيد بك
قفقاسيه اصيلزادكانندن ايمش . زنكين ، كوزل ، استانبولده
و اوروپاده اوزون مدت تحصيل و تربيه كورمش . بونلر پك
اعلى ، لكن نه قدر اولسه اوزاق برديارك محسولى . آراده

یوکسك داغلر ، درین دكزلر وار ؛ اصلنه ، نسلنه دائر
نه قدر معلومات آلسه ینه آز .» دیردم . مرحومه ده : «اوت
اما استانبوللیلری ده لزومندن فضله یاقیندن طانیورز .» جوابی
ویرردی . نهایت قرار ویرلدی . جریان حالی بك اعلی
بیلیرسکیز : بوزنکین ، کوزل ، تحصیل و تربیه کورمش کنج
مدهش بر سفیه ، صلاح قبول ایتمز بر قارباز ، حد و میزان
بیلمز بر سرخوش ، کیم بیلیر نصل بر سلسله اجداددن منتقل
بر مجلوبیت مریضانه ایله (کوزلرینی ایندییرهك یواش سلسله)
قادینلره مفتون بر چاپقین ایمش .

شهبأ -- آغزندن طاشمغه مهیا بر قهقهه بی الیه ضبط ایدهك
اوو ! .

سرور پاشا

بوتون قادینلرك آرقه سنه طاقیلیر ، زرده بر ائك کورسه
طیرناقلرینی اوزاتیردی .

شهبأ -- کولهك و نرمینه باقهرق
بونى بر آاز بزده بیلیرز ، دكلى نرمین ؟ ..

سرور پاشا

نصل ؟ سزله ده می صیرناشیدی ؟ قاریسنك خصملرینه ،
دوستلرینه قدر تجاوز .. شایان نفرت ! .

شهبأ -- بو فکرة اشتراك ایتدیکنه دلالت ایدن بر اشمئزازه
اوو ! ..

سرور پاشا

ایش یالکز بوندن ده عبارت قالمزدی . . بوتون کیجه لرینی
أوندن بشقه یرلرده وهان دائماً اک ملوٹ عالمدرده ، اک مردار
مخلوقلرله کچیریدی . اونی أوه عادتاً طاشیهرق کتیر یرلردی .
تعبیر معروفیله : کوفه لك . .

شهبأ

اوت ، اوت ، درت نعله کیدیوردی .

سرور پاشا -- آ کلامایهرق

درت نعله می ؟

شهبأ

یعنی کندیسنی پک چابق هلاک ایدیوردی ، دیمک ایسته دم .

سرور پاشا

او قدر چابق که اوچ سنه ایچنده نهایت اوروپاده بر دار -
التداوی یه قپانه جق برحاله کلدی . بالطبع اختلاطدن ممنوع . .
یچاره قیزمه کلنجه ، اوده بنم یانمه چکیلدی . نصل الیم بر حالده
اولدیغنی قولایجه دوشونه بیلیرسکز . اصل تأثری بو سفیهی
سودیکندن دکل ...

نرمین و شهبأ

تحف شی ... دیمك قوجه سنی سومزمش ... کندیسی می
سویله دی ؟ ..

سرور پاشا

کندیسی ... خیر ، خیر ، او اولسه شکایت ایتمز . بویولده
وقعه لرده حقیقت دائماً وقوعاتدن صکره میدانه چیقار ، بنده
بالاخره خدمتجیلرک افشا آتیله ایشه واقف اولدم . لکن مسئله
اوراده دکل ، قوجه سنی سوسین سومه سین ، بونک بویوک بر
فرقی یوق . اصل مصیبت یچاره قیزمک مظلم بر استقبال
قارشیسنده قالمش اولماسنده در . بوراده هرکس اونی اکلندیرمک
ایچون چالیشمغه باشلادی . شیخ افندی ... کویمزک شیخنی
طانیرمیسکز ؟ ملک خصلت براختیار ... هرکون ایکی ساعتی
اجلاله حصر ایتدی ... بن هر درلو چاره یه مراجعت ایتدم :
اوزون سیرانلر یاپدق ، قرتاله قدر اینه رک بالی عالملری ترتیب
ایتدک ، کیجه لری قارشى قارشى یه طاولة اوینادق : کشاد ،
میتجل ، کل بهار ...

شهبأ -- کولمک ارزولرینه غلبه چالهرق ، یواش سسله نرمینه
الله ایچون تازهبی اکلندیره جک شیلر ایجاد ایتمشلر ! ..

سرور پاشا

والحاصل المزدن کلن هر شیئی یاپدق ، فقط حس اولنه جق

بر فائده حاصل اولمادی . مع مافیہ انسان ممکن اوله بیلن شیدن
بشقه نه یاپه بیلیر ؟ ...

شهبأ

اوله یا ! . . دیرکن بو صروده بردن بره ؟

سرور پاشا — متعجب

بردن بره ؟ ..

شهبأ — دوام ایده رک

بردن بره سداد بک ظهور ایدیویردی ..

سرور پاشا

اوت ، بر یچق آی اول ... سداد چوقدن بری کوزدن
غائب اولمش بر عائله چوجنی ایدی که .. نهایت سنه لرجه ، ممالک
اجنبیه ده ، مختلف مأموریتلرله دولاشدقدن صکره استانبوله
عودت ایتمش ، و بحرانی ، غلیانی بر عمرک یورغونقلقینی
بزم آرامزده کچیرمک اوزره یاقه جفک بو ساکن صیرتنه قدر
کلمش ایدی . . . بن اونی اوزاقدن اوزاغه تعقیب ایدردم ؛
بعضاً دنیانک مختلف نقطه لرندن کوندرلمش برر قارت ایله بو کون
لوندرده ، یارین پترسبورغده ، او بر کون بیلیم نروده اولدیغی
خبر آلیردق . بردنبره اونی قارشیمده کورونجه شاشیردم .
او قدر دکیشمش ایدی که .. آرامزدن چکیلدیکی صیره لرده

بر چو جق دینه جك قدر كنج اولان سداد شیمدی عادتاً
 یاشلیجه ، جدی ، وقور بر آدم اولمشدی واو درجه دلفریب
 بر حالی ، نکته پرداز بر صحبتی ، مجلس آرا بر رفاقتی وار که
 در حال مجلوب اولدق . حتی شیخ افندی بیله . . اوت ، اوت
 شیخ افندی بیله ، اعتراف ایتک ایسته میور ، حتی معترض
 کورونیور اما حقیقت حالده اوده مجلوب اولدی . بالطبع بشقه
 یرده مسافر اوله جغنه تعطیلانی بوراده کچیرمه سنی ، بوراده استراحت
 ایتمه سنی تکلیف ایله دم . .

شهبأ -- کندی کندینه کبی ، کتم مطالعه ایدمه یه رک
 فنا احتیاط سزلق !..

سرور پاشا — متعجب
 نصل ، افندم ؟

شهبأ
 خیر ، هیچ برشی دکل ... (عقلنده کنی تعقیب ایدمه رک)
 دیمک هر کسی مجلوب ایتدی ؟

سرور پاشا

اوت ، تمامیه .. بکا ارقداشلق ایتمه باشلادی ، طاوله ده ،
 شطرنجده ، بزیغده ... صکره فقره کولفی .. انسانی کوله دن

چاتلاتیر ... او صره لرده عادتاً خسته اولان اجلال اییاشمهکه
باشلادی ، بنم علاجلرمدن زیاده سدادك فقره لرندن استفاده
ایتدیکی عادتاً کوزله فرق اولونیوردی ... اسکی نشئه سی ،
شطارتی بيله یرینه کلیوردی ...

شهبأ

وای وای وای !!

سرور پاشا

بن اولا ایشك پك فرقنده دكلم .. (اسکمله سنی سعدایه
یاقلاشدیره رق) برکون شیخ افندی ، اولدجه طوتغون برحال
ایله بکا کلدی : « قورقیورم که آغیله قورت صالیویردك ! ... »
دیدى ، « نصل قورت ؟ شیخ افندی .. » دیدم . « جناب
حق جمله یی سوء ظندن وقایه بیورسون ، لیکن شاید ابلیس
لعینك تسویلاتیله دوچار خطا اولمایورسهم سداد بکك اجلال
خانم حقنده .. »

– « امان شیخ افندی ، نه دیورسیکنز ؟ .. » – « دقت
ایدیکز ، پاشا ، دقت ایدیکز .. »

بونك اوزرینه دقت ایتدم ، حقیقه شیخك کرامتی وارمش .
اقتشاملری برابر سیرانه چیقیورلر ، یواش سسله قونوشیورلر ،
متصل آیری بولوشمق فرصتلینی قوللایورلردی ... والحاصل

بوتون احوال واطوار اشکار بر صورتده کوستریوردی که ...
 بوکا نه یامالی ؟ اجلالی بر طرفه چکوب جدیجه قونوشمق ؟ ..
 بوکا دیلم وارما یوردی . سـداده یول ویرمک ؟ .. اوده المـدن
 کله یوردی ... نه یامالی ؟ .. ایشته خانم قیزلرم ، سزدن صورمق
 ایسته دیکم رأی ...

شهبأ

اوح ! بن سزك یر کزده اولسه یدم هر شیئی کندی حالنه
 براقیردم ! ..

نرمین

امان سعدا ! .. اونصل سوز ؟ ..

شهبأ

نه یاپه لم ؟ قوجه سی او حالده اولان برقادیس ایچون ..

سرور پاشا

فقط سعدا خانم دنیاده بویله مسامحه نصل قبول ایدیلیر ؟ ..
 بنم قیزم ناموس و عفتله مجهز برقادیندر . خیر ، خیر ، بویله شی
 اوله مازدی . شیخ افندینک خاطرینه برچاره کلدی ، بنم فرط
 تأثر می کوره رک دیدی که : « پاشا ! مسئله مهم ! .. لیکن عنایت
 حقله بوکاده بر دوا بولونه بیلیر . سزك براوکی کریمه کز وار :

ژاله خانم درایت صاحبه سی ، مدبره ، عاقله ، اوصاف حسنه
ایله متصفه برخانمدر . اجلال خانمده کندیسنی بوراده یاننده
آلیقویدی . نه ایچون بوفرصندن استفاده ایتیهلم ؟ اکر توفیق
خدا رفیق اولورسه بلکه فنا کورونس بر حادثه ایی یه منقلب
اولور . سدادبك ژاله خانم پیدای علاقه ونهایت الامر اونکله
عقد رابطه ازدواج ایلیه بیلیر . بزده بوصورتده برینی مصیبت
کریوه سندن خلاص ایدرکن دیکرینی عدن سعادتیه ایصال ایلیه یرک
مضاعف بر فعل خیر ایشلهش اولورز . »

شهبأ

شیخ افندی چوق قورناز شی ...

سرور پاشا

اوت ، اوراسی او یله .. لکن اولجه سویله مشدم یا ، فاره
بی معنی بر مخلوقدن عبارت ، بر کره بویولده شیلری اکلایق قابلیتند
دکل ... اونده بویله بر فکر او یاند بر مغه چالیشد قجه .. بالطبع
غایت قبالی کله لرله .. هیچ ، هیچ برشی اکلایق ممکن اولمایور
اونک کندینه مخصوص کوچک مزیتلری وار . زمانک بوتون
کنج قیزلری کبی براز رسم یاپار ، براز موسیقیدن چاقار ، حتی
براز سسی بیله وار ، والحاصل تحصیل و تربیه جه فنا دکلدر .
لکن بوتعطیلارده ، دارالمعلماتده کچن شو صوک سنه بی متعاقب

کوشکه کلنجه هر شیئی ترک ایتش کوردک ، نه موسیقی قالمش ،
 نه تغنی ، نه ده رسم ... دها دو غروسی رسم دفترنی آچق ممکن
 دکل ... دمین سزده کوردیکز آ ... والحاصل نظر دقتی جالب
 ایده بیله جک هیچ بر شیئی قالمش ... کویا مخصوص کندیسنی
 بو حاله کتیریور .. کندیسنی جالب دقت بر تازه یاقمق نه یه متوقفسه
 بالالترام اوندن توقی ایدیور ... بوایشده براز دسیسه کارلق
 لازمدر ، دگلی افندم ؟ .. مثلاً ، باقیکنز ، اولکی اقشام سداد
 شوراده اجلالاک یاننده ایدی ، یواشجه قونوش-یورلردی ...
 ژاله ده بوراده ، او قویوردی . بزده شیخ افندیله شطرنج اوینا-
 یوردق . شیخ افندی بر ارالق غایت طبیعی بر ادا ایله ، و کمال
 مهارتله دیدی که : « ژاله خانم ، کچن کون بکا عالم اسلامده
 ظهور شیعیته دائر او قودینگکز بر کتابدن تفصیلات ویریوردیکز ؟
 لطفاً تکرار ایدرمیسکنز ، پک شایان مراق معلومات واردی .. »
 اکلا یورمیسکنز ؟ مقصد ژاله یه ابراز معلومات ایچون برفرست
 ویرمکدی .

شهبأ — قهقهه یه مهیا

اوو ! ...

سرور پاشا

بونک اوزرینه نه یاپدی ، بیلیرمیسکنز ؟ در حال ایاغه قالقدی
 و بر کله بیله تلفظ ایتیه رک باشنی آلوب چیقدی .

شهبأ — نهایت قهقهه یی صالیو یردرک

هاه ! هاه ! هاه ! ...

ترمین

شهبأ ! ..

شهبأ — هپ کوله رک

هاه ! هاه ! هاه ! .. آرتق اولدی اوله جق . هاه ! هاه !

هاه .. کندی می طوته میورم عفو ایدرسکز ، پاشا حضر تلی ..

هاه ! .. هاه ! .. هاه ! ... آمان شیخ افندی نه کوزل بر چاره

بولش ! . سداد بکی آلامق ایچون نه ای بر دوزاق ..

ترمین

شهبأ کندی کی تمامیه اونوتیورسک .

شهبأ

اوو ! .. لکن ، پاشا ، سز بوسبوتون عکس نه بر اصول

طوتمشسکز ، ماکنه یی ترسنه ایشله تیورسکز . بویه قورمه

ببک کی ازبرله نمش درس اوقویان ، شیخ افندی نك تعیرنجه

اوصاف حسنه ایله متصفه بر خانم قیز ، بو شیمدی بازار تأهلده

رواج بولان امتعه دن دکل ، بالعکس بونلر طلاقه سیمیت

ویره جک شیلر ...

سرور پاشا — بوزولهرق

اوت اما بو چوجقله بشقه نه اوله بیلیر ؟ ..

شهباً

دوریکیز، باقهیم، سز سداد بکی آ کلاتیر کن کوزلرمک اوکنه
یاشلیجه باشلیجه بر آدم کلشدی ، مثلاً اوتوز بش یاشلرنده
حتی بلکه قرقلق، تام توی دکیشدیرمه زمانی ... ایشته اصل
ارککلر بو سنده دوزاغه دوشرلر ... اما نه دییهیم ؟ بو ایش
سزک فارهیه کوره بر ایش اولمیه جق .

سرور پاشا

محقق ! .. بنمده فیکرم بو ! .. شیخ افندی یه مرام آ کلاتمق
ایچون اولیورم . البته فارهیه کوره بر ایش دکل ! .. دهاماهر
دها ذکی بریسنی بولمق لازم که .. والحاصل بزی بو برزخدن
قورتاره جق بر شیمه صروت ... (ژاله یی کوره رک) ایشته ینه
چیقدی ! .. لکن شو کندیکی ایشیتدیرمه دن کیرمک عادتندن
واز کچمیه جکمیسک ؟ ..



مجلس : ۹

اولکیلر -- ژاله

سرور پاشا

هانیا اجلال ؟ ..

ژاله

کلیور افندم .

سرور پاشا

سداد برابر می ؟

ژاله

اوت افندم .

سرور پاشا — نرمینله شهبأیه

باقك ، برده اونلری یالکیز براقیور . حقیقتاً بو قیزده
هیچ اذعان یوق .

شهبأ

هله بر کورهلم، شو سداد بك دینیلن مدهش آدم نه چشید
شیدر .

سرور پاشا

نرمين ، صحيح بكا بر فيكر ويره كز ، شو مشكل ايشده
بكا معاونت ايتسه كز ..

نرمين

اونك ايچون : هنوز كنج ، ديمشديكز ، دكلى ؟

شهبأ — يك تلاشله عودت ايدرك

اوو .. نرمين ، نرمين ! ..

نرمين

نه اوليورسك ؟ ..

شهبأ

پاشا ، خدمتچيكزى امر ايدرميسكز ؟ .. بنم ال چانطه مى
نرده براقدم عجبأ ...

نرمين

سويله سهك آ ، شهبأ ، نه وار ؟

شهبأ -- ال چانطه سنى ارايه رق

كيتده كور ! .. (نرمين صحنه نك ديبه دوغرو كيدر .
شهبأ پاشايه) چانطه م ، چانطه م ؟ .. امان افندم ، بريسي اولسه ده

بزه یار دیم ایتسه ، براز توزمزی طوپراغمزی آلسه ، اوستمزی
باشمزی دوزلتسه ...

نرمین -- کذا پک تلاشله عودت ایدهرک
دیمک پاشانک یکنی سداد بکمش ..

شهبأ -- هپ چانطه سنی ارایه رق
اوکا نه شهبه ؟ ..

نرمین
پا کیزه نک سدادی ...

شهبأ
شادیه نک سدادی ..

نرمین
بیاض یلدرمه لی خانمک ...

شهبأ
وساثره نک ... وساثره نک ... بزه اونی اورته دن غائب
اولمش ، بریرلرده بر تأهل دوزاغنه دوشوب قالمش ، اولمش
بیتمش ظن ایدیوردق . مکر او بورالرده دولاب چویریورمش ..
حقیقه پاشا ، شیخ افندینک حق وارمش . سز آغیله قورت
قویمشسکنز ...

سرور پاشا

بنی قورقوتیورسکز ...

شهبأ

خدمتجیکزی امرایتدیگز میدی ؟ .. اړنك قارشیدنه بو
قلقله می چیه جغز ...

نرمین -- ال چانطه سنی الهرق

حقیقهٔ براز چکی دوزن ویرسهك ...

شهبأ -- ال چانطه سنی بولهرق

آه ! نهایت بولدم . (صاغه توجه ایدهرك) بو طرفد نمی ،
افندم ؟ ..

سرور پاشا

خیر ، خیر ...

شهبأ -- (صوله توجه ایدهرك)

او حالده بو طرفدن ؟ .. چابق ، چابق ! .. اون دقیقه ده
حاضر لانیرز ... براز باشمزی دوزلتوب ... آه ! مکر سداد
بکمش ... امان ایش نه تحفلاشیور ... دکلی ، نرمین ؟ ..
قاله لم ، دیمکده حقیم یوقیمش ؟ .. چابق ! .. چابق ! .. درحال
قوقوسنی آلدیم ، آل سکا بروقه که صورمه کیتسین .. اون
دقیقه ده بیتر ، افندم .

(ال چانطه سندن بر كوچوك پودره قوطوسى چيقارير
وسيكيرلى سيكيرلى يوزينه سورەرك چيقار)

مجلس : ۱۰

ژاله ، اجلال ، سداد (بياض كتن وشياقدن كوى البسه سى ، صارى
استقارپينلر ، قوله سز كوملك ، قولار

اجلال

خير ، افندم ، خير . . . ينه اسكيسى كيدسكيز ، هيچ
دكيشمه مشكيز . كوكلكيز راحت اولسون . نه ، ژاله ،
هانيا مسافرلر ؟ ..

ژاله

باشلرينى دوزلتديرمكه كيتديلر .

اجلال — سداد

بو زحمت سزك خاطر كز ايچون .. شهرتكيزك تاثيرى ..
شهرت صاحبي اولمق نه ابي شيمش ! ..

سداد

استهزا ايتمه ييكيز ، رجا ايدرم .

اجلال

ژاله، سن بر آز كلسهك آ باقهيم؟ (صاچلرينى دوزلتهرك) دائما
 شو صاچك بويله آريلير .. (اونى تماشا ايدرك) او قصورك
 اولماسه .. آه، فارهده فاره، آه ميني ميني فاره .. ديمك آرتق
 معلمه لكدن واز كچيورسك، اويله مى .. شيمدى تام قاچ
 ياشنده سك، باقهيم ؟ ..

ژاله

اون سكز !! ..

اجلال

اون سكز مى ؟ .. او قدر اولدىمى ؟ .. آمان ياربى ! زمان
 نه چابق كچيور . مدهش شى ! .. (يواشجه ژاله نك البته پارماغنى
 قويه رق) بونك ايچنده نه لروار عجبم ؟ .. اسرار ! .. سدادبك ،
 شوكا بر كره باقىكز .. شو پنبه و بياض معمايه دقت ايدىكز ...
 هنوز بر چوجق ، فقط همان بر قادين اوليويرمش ... هنوز
 چيلغين صاچلر آلتنك اوستنده اوچيور ، فقط او آلتنك ايچنده
 درلو درلو فكرلر اويانمغه باشلايور . بواغز ؟ .. هنوز سسسز ،
 صداسز ، ليكن دوداقلر نيم كشاده ... بوكوزلر ، اونلرده هنوز
 صريخ بر افاده سزلمه يور ، ليكن رنكلر نده درلو انديشه لرك
 عكسلرى چالقانمغه باشلانمش ... كنجلك ! .. كنجلك ! ..

هنوز كندى كندىسى لايقيه بيلمهين ، فقط كندى كندىسى
ديكله يهرك بكلهين كنجلاك ! .. بن ده اونك كييدم .. آه ! بنم
كوزل ژاله جكم .. صاقين سن بكا بكمزه مه .. سن ارتق بويودم
ديه بنى سومكدن واز كچمه دكيا ، فاره جكم ، ينه بنى سوييور-
ميسك ؟

ژاله — ياواش سسله وكمال حرارتله
اوح !.. البته !..

اجلال — تبسم ايدهرك ، و اونك اداسنى تقليداً
اوح !.. البته !.. خاطريكزه كليورمى ، سداد بك ، آره
صره ارامزه سزده قاتيله رق هفته آراسنده كيدر ، اونى مکتبند
كوروردك... قاچ كره لر سزده درلو مهم ايشلر كزي براقير ،
بزمه برابر كليرديكز .. (ژاله يه) سنك ده خاطريكه كليورمى ؟

ژاله — كوزلرني اينديرهرك
اوچ كره !..

اجلال

يالكنز اوچ كرمى ؟ .. بابام سزك پك برابر كله كزه راضى
دكلاى : « قيز مکتبند اونك نه ايشى وار ؟ .. » ديردى . معلوم آ
هپ سزك او معهود شهرت مسئله سى ... نه اوليورسكنز ؟ ..
صورت ايدييورسكنز ؟ ..

سداد

بنمی ؟

اجلال

شبهه سز ... هپ صوصیورس-کنز ، پارمقلر کزده عصبی بر
حرکت وار ... ها ، صحیح ، بزبواقشام اوستی سیرانه چیقہ-
جقدق ، دکلی ؟ (ژاله یه) سنک یکی یلایر مهك حاضر می ؟

ژاله

اوت .

اجلال

اعلی ... بالطبع سن ده بزمه برابر کلیرسک . اولمازمی ؟

سداد — مغبر

اوخ ! ..

اجلال

نه دیدیکز ؟ ..

سداد — خوشه کیده جک بر ادا المغه چالیشهرق

اوخ ! .. دیدم .

ژاله

دیمک اولیورکه ...

اجلال

يکي يلديرمه کي کينمه کي ايسته يورم . بوشيق يلديرمه ، سکا
کيم بيلير نه قدر ياقيشه جق . فقط بزمسافر لري تماماً اونو تدق ..
بنم اوده قالمقلمغ ايجاب ايدە جک ... نه باس وار ؟ سن سداد
بکله چيقارسک .. دکلي سداد بک ، سز ژاله يي کزديرير سکز ...

سداد --- مغبر

آخ ! .. اوله بيلير ...

اجلال

نه دييور سکز ، رجا ايدەرم ؟

سداد — خوشه کيده جک بر ادا آلمغه چالیشه رق

مع الممنونيه ! .. دييورم .

ژاله — قورقاق برسس و طورله اجلاله

اگر سداد بک ارزو ایتمه يورلرسه ...

اجلال

ارزو ایتمه يور اولورمی هيچ ؟ ..

سداد

بالعکس فاره خانم ، بن امر کزه آماده يم ... دوشمه يه سکز

ديه لالا کزک الکزدن طوتماسی ده ايجاب ايدرسه ...

اجلال

فنا بر شاقه .. ژاله سزی یاری یولده براقاسین یوقسه...
اونك دوشمه یه جگندن، وهر کسدن ای قوشوب صیچرایه جغندن
امین اوله بیلیرسکز ... کونشك صیجاغی ده کچدی . اقشام
سرینلکنده نه لطیف بر سیران یاپه جقسکز ...

سداد — دیشلرینك آره سندن

اوت ، طریقتلردن بحث ایدهرک ...

اجلال

سداد بك ، چوجغه صائاشمايك ، الله عشقنه !.. (ژاله یه)
هایدی باقهیم، سن حاضر لان!.. وقت کلدی.. یکی یلدیرمه کله
کیم بیلیر نه کوزل اوله جقسك ... نه تحف شی .. اون سکزینه
کلیورمش .. فقط ممکن اولسهیدی ده هپ کوچك قالسهیدك..
دها خوش ، نصل دیمه لی ، دها فاره اولوردك ... (سداده)
اغزنندن فضله لاف چیقاردی، ظن ایتمه لی .. لکن او سسینر
سسینر محبتنده ، انسانه طاتلی بر صیجاقلق کبی یواشجه حلول
ایدن سوکیسنده اوپله بر حال واردی که ... خاطریمه کلیور ..
بر کون ... فنا کونلردن بری ... حیاتمدده او قدر فنا کونلر
وارکه ... لکن او کون اك فنا لرندن بریدی ... دائره مدده باپ
یالکزددم ... او یواشجه کیرمش ... بالطبع ایشیدلمه دن ...

ہر وقتی کبی . . . بن اغلا یوردم .. او بردن برہ بوزولہ رق
 دوردی، صکرہ یواش یواش، مینی مینی آدیملرلہ بکا یا قلاشدی ..
 یوزیمہ باقدی . کوزلری قیپ قرمنزی اولدی ... کوچو جک
 چکھسی تیتزدی، قوللرینی بوینہ دولادی، ویواشجہ قولانغہ
 « اغلامہ انہ حکم ! .. » دیدی . نہ ؟ .. بوتعبیری نرہ دن بولدی،
 قلبنک نرہ سندن چیقاردی . نہ ! .. بو کگہ اوزون برشی دکل،
 فقط بوتون حیاتم بردن برہ بو کگہ نک سحریلہ دکیشدی، اونک
 اوستمہ دوشیویرمہ سیلہ کویا وجودمدن بشقہ بر وجود، بر
 نہ چیقیویردی ... آہ ! بنم سو کیلی ژالہ حکم ! .. (چکوب
 اوپر) ہایدی کین، یاوروم ! ..

ژالہ چیقار

مجلس : ۱۱

سداد اجلال

اجلال

حقیقہ صورتی ایدیورسکیز ؟

سداد

البته ایده‌رم یا ... بن سزکله سیرانه چیقماق امیدنده ایکن
بکا فاره‌نی کزدیرمک وظیفه‌سنی یوکه تیورسکیز ... عادتاً
چوجق دادیسی اولدق ...

اجلال

بر کره ژاله آرتق بر چوجق دکدر ، اوکا پک خفیف
معامله ایدیورسکیز . ژاله‌نی تماماً آکلایه مادیغکیزه حکم
ایده‌جکم . بو چوجقک ایچنده بر قادین وار ... نه ایچون
اوکا بو قدر طاقیلیورسکیز ؟ اوکا قارشى بر شیکیزمی وار؟ ..

سداد

شبهه‌می ایدیورسکیز ؟ . یواش یواش عادتاً خصومت
ایده‌جکم . سزک فاره‌کنز بنم سیکیریمه دوقونمغه باش‌لادی .
دائماً بزم آرامزده دولاشیور ، سزه بر کله سسویله‌مک ممکن
دکل ... حقیقهٔ آرتق چوق اولیور ، هله سز پک لزومندن
فضله یوز ویریورسکیز ...

اجلال

بن نه‌لر جنسندنمده اونک ایچون ... ذاتاً اوللری سزده
بویله سسویله‌مز میدیکیز ؟ صوکره ، بن ژاله‌یه او قدر مدیون
شکرانم که ... اکر او اولماسه‌یدی ازدواجک بنی ایچنه

آتدینی او ذوق و صفا عالمنده بن نه حاله کلیردم... سز آرده صره
 استانبوله او غراده جقه بنی او عالمنده کوردیکیز، سزده او عالم لرك
 اك پارلاق اعضا سندن بریدیکیز... هنوز او نوته جق قدر
 زمان کچمه دی... او بحران سنه لرنده بن ده ایشته شهبأ قبیلندن
 آتشین بر مزاج صاحبیدم... یاراماز بر مخلوق اولمامه نه
 قالمشدی؟... تحفدرکه او زمان اطرافمی احاطه ایدن بوتون
 چیلغینار آلاینک ایچنده بکا اخلاقدن بحث ایدن بر مرشد
 ظهور ایتدی: سز!... همده نصیحتلر کزه نصل خلوص
 وصفوت، حتی برازده غریب بر محزونیت رفاقت ایدردی..
 اوت، کندیکیزی غائب ایدوبده حدت ایتهدیکیز زمانلر..
 بیلیرسکیز آ، بعضأده سرت بر آدم اولوردیکیز. خاطریکیزه
 کلیورمی، بر کون غالباً براز چایق برنتنجه ویرن دلیل کلرمدن
 برینه واقف اولدیکیزدی. بکا، برچو جق تکدیر ایدرجه سنه:
 « بویله شیلری بشقه لرینه براقیکیز، سزه ساده جه ناموس کار
 بر فادین قلمق یا قیشیر... » دیمشدیکیز... اعتراف ایدهرم که
 او زمان بو سوزه عادتاً قیزمشمدم... تام سزه یاراشه جق بر
 سوز!.. سداد بك، سز حقیقت حالده ناموس پرست، عفت پرور
 بر آدمسکیز...

سداد

استهزا ایتهدیکیز..

اجلال

خير ، خير .. واقعا اوللری استهزا ایدردم .. چونکه
 افعالکیزله اقوالکیز آراسنده مناسبت یوقدی ، انکار
 ایتمزکز آ .. لکن او زماندن صوکره چوق دوشوندم ..
 نهایت دوشونه دوشونه سزه منتدار اولق لازم کلدیکنه قرار
 ویردم (محبانه النی اوموزینه قور) ایشته ، او چیاغینلقلرک
 اک شدید بحرانی آراسنده انتباه ساعتلی اولوردی ، ایکی
 اکلنجه آراسنده ژاله خاطریمه کلیردی ، ایکی زیارت آراسنده
 اولنک مکتبنه اوغراردم ، و بر طرفه آتیلیویرمش اولان ،
 بابادن آنادن جدا ، طاله یوردندن اوزاق یشایان بویاوروجغه
 کیدر کوریردم . او قدر صیق دکل .. فقط بو بنده بر حس
 وظیفه اویاندریمغه کفایت ایتدی . او حس وظیفه نکل تماماً
 اویانماسنه بلکه یالکیز سزک نصیحتلرکز کافی کلیه جکدی ..
 دها صوکره لری حیاتمه اوبویوک زلزله وقوعه کلوب ددهرشی
 ییقیلیویرنجه ، او مدهش خستهلق بنی قوجه مدن آیریویرنجه
 بن کندی نفسی نصل اداره ایدردم . دوشونکیز بر کره ،
 اویله بر مصیبت که بنی قوجهمه قارشی ایفای وظیفه دن بیله
 منع ایدیوردی ، اوکا باقق ، اوکا وقف حیات ایتک امکانی
 بیله یوقدی .. نریمه طوتونمالی ، نهیه آصیلمالی ، آیاقلریمک
 آلتنده آچیلیویرن اوچورومدن قورتولمق ایچون یاپیشه جق

نه بولمالیدی ؟ اوله بر وضعیته دوشمشن ایدم که اورته ده بی
علاقه دار ایده جک بر وظیفه بیله قالماشدی ، فکر مده امید
بر خیالک اویانماسی بیله بر کنه قیلندندی . . ایشته بویله
بر هنکامده ژاله حیاته تصرف ایتدی ، قلبمی قابل استفاده
بر زمین حاله کتیردی ، بکا کوستردی که بز کنندی حیاته مزه
عائد سعادتلی ، بوتون سعادتلی غائب ایتسه . . بیله نهایت
نتیجه ده ینه بر سعادت وار : بشقه لرینک سعادتلی . . اوت ،
بشقه لرینه وقف حیات ایده رک ، اونلرک حصول سرورینه
چالیشه رق قازانیلان بر سعادت . . خیر ، خیر ، سداد بک
اوکا فضله محبت کوستریورم ، دیمه ییکز ، نه قدر فضله محبت
کوسترسه م ینه آذر . .

سداد

اوت اما ، سزک ایچون دوغرو اوله بیان بو مطالعه بنم
ایچون ده دوغریمیدر ؟ . . دوشونسه کز آ ، بو چوجق دائما
ایکیمزک آراسنده ، دائما . . برده او یتیشمه یورمتس ، پاشا
بابا کز ، شیخ افدیکز ، اونلرده کافی دکلش کی شیمدی
باشه ایکی ظبیر مسافر چیقدی . .

احلال

شکایته حقکزیوق ، موفقیتار کزک دفترینه علاوه اولونه جق
ایکی یکی صحیفه . .

اجلال

اوت ، اوت ، موفقیتلر ... استانبول و استانبولک بوتون
چیچکلری ، کبار عالمنه منسوبیت ادعا ایدوبده آنقلری تقلیده
یلتهنن یایمه بیکلری ، بونلرک هپسینی بر طرفه براقه لم ... بنجه
ارتق اونلر حقنده بر ایلیشیک قالمادی .

اجلال

اوو !. کویا تبدیل مذهب ایدیورسکنز ، اما ، پک شایان
اعتماد دکل ..

سداد

نیچون ؟.. سزده طرز حیاتکنزی د کیشدیرمه دیکزمی ؟..

اجلال

اوت ، فقط بنی مصیبت تربیه ایتدی .

سداد

بنی ده یاش ..

اجلال

اما یاپدیکنر ها . ذوق عالمنده یاشک بر حکمی اولورمی ؟
هم برارکک ایچون یاش دیدیکنر آفت زردن کورونور ؟..

سداد

قادينلردن.. ار ككلرك ياشنه قادينلرك كوزلرى آينه دارد..
 بياسه كز او آينه لرده ياشمك نه صريح حسابلرني مشاهده
 ايدىيورم .

اجلال

نصل ، رجا ايدىيورم ؟

سداد

بيك شكلده ، بيك لسانده ... بر طاقم اوفق اشارتلىر ،
 خفيف رنگلىر ، هيچلىر ، اوت ، اما ، بونلر ارتق اسكى سداد
 اولماديغمى غايت بليغ بر افاده ايله بكا تقرير ايدىيورم . بو كون اهميتنى
 غائب ايتمش بروجودم ، سزى تامين ايدىيورم كه بو حقيقتى واضحاً
 حس ايدىيورم . (حرارتلنهرك) اولجه ، قادينلرله پيداي معارفه
 ايتدكجه ، اونلرده بر خصوصى هيچان حصوله كتيرديكمه دقت
 ايدىيورم . سوراقده بيله اطرافدن كچن پچه لرك التنده فيصليتلىر ،
 كوزلرك ايچنده تجسسلىر ، فرق ايدىيورم . بنى فلان ويا فلانه
 بگزىتىلر اولوردى ، وبوتون بو بگزىتىشلردن عزت نفسمه بر
 بروسيله تفاخر چيقاردى . شيمدى ارتق كيمسه لره بگزىتيلمن
 اولدم . اولجه بر قاديننه حلولة چاليشسهم در حال كوزلرنده
 شيطنتكارانه بر فكر ك اويانديغه دقت ايدىيورم ، شيمدى عين

مقصدله تقرب ایتدیکم هر قادینک نظر نده « احباباقدن ایلری
 کیدیله من !.. » دین بر « ممنوعدر !.. » لوحه سی مرکوز ...
 بوصورتله شیمدی او قدر چوق احباب پیدا ایتدم که بودجه سنی ده
 یک فضلہ بولیورم .. ارتق حکم ایتله لی که زمان یورو مش ، و بن
 اونی تعقیب ایدمه مشم ، ارتق بو کونک آدمی اولمادیغمه قرار
 ویرمه لی . اوت ، اوت ، بو یک آشکار .. کندی کندیمه او
 درجه پیرانمش بر ماده نظریله باقغه آلیشدم که اسمم بیله کهنه
 بر متاع تأثیرینی پایور .. سداد ! سداد !.. بو زمانک بر آدمی
 اولسه یدم ، دها نواجاد ، دها اهنکدار ، مثلاً چفت بر اسم
 ایله مسما اولوردم ، دییورم . حتی قادینلره قارشى اوضاع
 و حرکاتده بیله اسکیک وار . بن اونلره حرمتکار ، خاطر
 شناس ، ظرافتپور اولق اعتیادندیم . شیمدی بویله می ؟ بو
 کون ارککلر قادینلره بیله نم نصل مخلوقلر مثابه سنده معامله
 ایدیورلر ، عشقک ، حرمتک ، مفتونیتک لسانی بیله محله اغزی
 سوقاق شیوه سی ... (کیتدکجه حرارتلنهرک) بن حالا اسکى
 لهجه نی استعمال ایدیورم ، قادینلره قارشى استعمال اولونه جق
 لسانده حالا ندیمک ، غالبک بر یادکار بیانی وار . اونلره تعلق
 ایتدکجه حسیاتمک زانو بزمن احترام اولان برحالی وار کیدر ،
 حتی بونده هیچ جعلیتکار دکلم ، تماماً صمیمیتپورم ، قادیناغه
 حرمت عقیده اساسیه مدر ، بوتون موجودیتله نفسی بو عقیده یه

ربط ایتشمدر .. والحاصل ، کندیمی بو کونک آدمی دینه جک
 بر حالدہ کورمه یورم ، جامکانده بکلیه بکلیه رنگی صولش بر
 قماش ، ارتق طاشنه میه جق ، طاقیله میه جق ، کوستریله میه جک
 کهنه بر چشید .. (بوسبوتون طاشه رق) فقط نه اولورسه
 اولسون ، بن نه ایدیسه مینه او یله قاله جغم ، دکیشمکه ، بو کونک
 آدمی اولغه چالیشمیه جغم ، بناءً علیه بر قادینه عرض مفتونیت
 ایتک ایچون مثلاً : « سکا عبای یاقدم ! .. » دییه میه جکم ...

اجلال

واه واه ! اختیار آدم ! ..

سداد

عفو ایدرسکز ، الای ایدیورم ظن ایدرسکز اما حقیقت
 حالده محزونم ، قلبمده بر عقدہ کدر وار . (بر اسکماه آلیر
 و براز اوزاقلانه رق اوطوریر) سزه سویلیه یم می ؟ بو سفر
 استانبوله عودتمدن صکره ، نشان طاشنده ، بوغاز ایچنده ، بویوک
 اطهده ، والحاصل یا تختک کبار حیاتنک ازدحام کاهلرنده غایت
 قیصه بر اقامتی متعاقب ..

اجلال

یا قه جق ده نیلن ..

سداد

اللهك تنها بر انزوا كاهنه چكيلمكه سبب نه در، بيلير ميسكنز؟ ..

اجلال

صوك وقعه عاشقانه كز .. بياض يلدير مه لي خانم ...

سداد — براز صيقيلمش

آي ! نهدن خبر الديكنز ..

اجلال

بويوك ظن ايديلن استانبول او قدر كوچكدر كه ، بر
منديل قدر ، هر آقشام درت اوچندن طوتوب ده بر كونلك
وقوحاتي طوپلاديكنزمي ، اورته يه بريكه جك اولان درت
جويزدن عبارتدر ..

سداد

خير ، اصل سبب بودكل . اصل سبب : بر كله دن عبارت ،
تصادفاً ايشيدلمش بر كله . سزك ده حياتكزي بر كله جك
دكيشدير مه مشميدى ؟ بر كون آقشام اوستي خريستوسدن
ديله دوغري اينيوردم .. بيلمم بوني سزه حكايه دن مقصد نه ؟
بالعكس مسكوت كچيله جك برشي ، وقعه بنم هيچ اهمه خادم
دكل ...

اجلال

سویله دم آ، مادام بن ننه لر جنسندن بر قادینم، بکا
هر شیتی سویله بیلیر سکیز .

سداد

اوت، یواش یواش یوقوشی اینیوردوم . اوکده ده عین
خطوه ایله ایکی خانم یورو یورلردی، اونلر بنی کورمه یورلردی،
اون کبی ازلمش طوپراقلرک اوزرندن خفیف خفیف ایلریله -
یوردق، آیاق سسارمی ییله ایشیتمه یه رک آرالرنده قونوشیورلردی .
بری دییوردی که : « سداد بکی بو سفر عودتندن صکره
کوردیکزمی ؟ » اوت کی جواب ویردی : « اوت، شبهه می
وار ؟ » - « سزک اطرافکزده دولاشیور، دکلی ؟ .. - عفو
ایدرسکیز، اجلال خانم .. وقعنه نک اوستندن بر قاچ هفته
کچدی ده اسکیدی صاییلیر .. »

اجلال

اوت، اوت، تاریخ قدیمدن بحث ایدیورسکیز . حال
حاضره تعلق یوق ..

سداد

اوت کی بیان مطالعه ایتدی : « نه تحف؛ حالاد کیشمه مش،
بو آدم ینه کنج، نه دیرسکیز ؟ .. » دقت ایدیورمیسکیز ؟

حالا !. ينه !. بونلر آرتق محتاج تسليت كورولن سنلر ايچون
مستعمل ظر فلردن .. بوتون بوسوزلري آرقه لرندن يورور كن
ايشيديوردنم ، وقلبمك اوستنده كويا بر پنجه واردی . ديكری
جواب ويردی : « اوت ، ينه ايجه ، ليكن آرتق براز ، نصل
نعير ايمه لی ، براز اسكي ترتيب اولمش .. » (حرارتلنهرك)
اسكي ترتيب !.. بونك بنده نصل بر تأثيری اولدی ، تصوير
ايدهم .. بردن بره موجوديتك ايچنده كويا بر شديك
چو كيويرديكنی ، يقيليويرديكنی حس ايتدم . اسكي ترتيب ..
بردن بره كندی كنديمه اعتمادي غائب ايتدم ودفعة قورقاق ،
كويا بر عجمی اوليويردم ..

اجلال

يك تحف !..

سداد

اوت ، اون بش ياشنده بر چوجق كبی .. بر شمشك
آراسندن كنديمی كوردنم : اختيار ، حالا كنجلكه مربوط ،
قادينلره مسلط ، كولونج ، يكرنج .. حالاده كندی حاله ،
حقيقت وضعيته واقف اولمامق ايچون مصر .. معلوم اولان
سوزلرله ، « ايش ياشده دكل . » ، « سنه لرك نه حكمی وار ؟ » ،
« كنجلك كوكل تازمه ليكنده در » قیلندن زوزكلكلره متسلی ..

اصل فنالق ، بر کره بورادیه دوشولدیمی ، آرتق قادینلره
 قرشی ارئه اولونان تقید بر اغفال نفسدن ، بر تشفیة صدردن
 عبارتدر ، قادینلرده او آثار تقیدی رد ایدهمدکلری ، اجتنابه
 چاره بوله مادقلری ، یاخود ، تعقیب اولونمقدن اوصاندقلری
 ایچون کرهأ قبول ایدرلر . آرتق عشق ، صاف ، منور بر
 عشق دکلدر ، عشقندن ذوقه ، ذوقدن ابتلایه ، ابتلادن
 نهایت سفافهت و ذلته دوشولور . قدمه قدمه اینن بر یول ،
 ایشته بن یولک اوستندهیم . .

اجلال

سودم آ ، سزده بر اساس ناموس وارده اونک ایچون
 بویله دوشونیورسکیز .

سداد — براز منفعل

اوت ، اوت حتی بواساس ناموسدن برازده فضلهجه بحث
 ایدیورسکیز . ایشته بو حکایه ایتدیکم وقعه اوزرینه دوشوندیم ،
 یاقه جقده چوقدن بری اونوتلش بر عمجه اولدیغنی تخطر ایتدم ،
 کندیسنی ارامایان بر چوق یکنلری اراسندن بری چیقارده
 کیدوب او عالم تنهائیده اوکا مسافر اولورسه ممنون اوله جغنه
 حکم ایتدم . بویکنده مجروح ، محزون ، مکدر بریکندی ،
 اونکده دیکلنمکه احتیاجی واردی . اوت اعتراف ایدیورم ،

حقیقهٔ قلبمده درین برغم وار ، بوندن صکره نه یاپه جغم ؟ ..
 نه اوله جغم ؟ .. بشقه لرنده حرص اقبال و اشتها و اردر ، هوس
 سعی وجدال و اردر ، حتی بلکه مساوی احوال ایله مالا مالدرلر ،
 بونلر هپ حیات قوتی کوروکله یین روزکارلردر . بنده بونلردن
 هیچ بری یوق ، ساده عشق وار ، عشق عادتاً بنجه بر مسلك
 مخصوص ایدی . بومسلكده ارتق یولك قاپاندیغنه حکم ایتدکن
 صکره برارالق بنده سیاسیانه قاریشمق ، یعنی هر کسه بکزه مك
 ایستهدم .. لیکن دوداقلریمی او بارداغك کنارینه دوقوندیرر
 دوقوندیرماز تیکسیندم . او حالده نه یایمالی ؟ ساده جه اختیارلامغه
 قرار ویرملی .. اختیارلامق ! .. آه ! بونه دیمکدر ؟ .. دوشونك
 برکزه .. کندی نفسی دائماً تحت نظارتده طوتمق ، کندی
 امالنك فریفته سی اولمقدن قورقمق ، حسیات قلبیه یی دائماً ضبط
 ایتمک بریاندن ارزونك دیکریاندن کولونج اولمق خوفنك تصادمی
 ارسنده خیرپالانمق ، کندی خولیا لرینك انقاضی ایچنه کومولوب
 مدفون یشامق ، موجودیتکزی ، هویتکزی باغلایان قیوددن
 بوشانوب بردقیقه سربست قوشامامق ، قوا کزدن ، قابلیاتکزدن
 برشهٔ دائمه ایچنده تیرمه مك ، آرتق هیچ برشیئه ربط عقیده
 ایدمه مک ، و ، آرتق سولمه مک ، سولمه مک .. حتی آرتق
 هیچ ، هیچ بروقت سوممه مک ! .. (ایاغه قالقار) هله بوصوک
 آجی ! .. آرتق سوممه مک آجیسی .. بر رایحه نك شامه کزه

تماسيله تيتره مه مك ، براتكك حيشيلتيسيله صارار مامق ، الكزه
تصادفاً كچمش بر منديلى دوداقلر كزده ازمه مك ، قورو بر
چيچكى ، صولوق بر كاغدى ، هنوز حياتى غائب اولماش بر لوله
صاچى ، دها ييلير مى يم ، نه يولده شيلرى اغلايه رق قوقلامامق
والحاصل برر احقلىقدن عبارت اولان فقط طاتلياغنه پايان تصور
ايديله مه ين بو كولونج لكن مقدس شيلرى ياپه مامق نه آجيدر ،
نه آجيدر ؟ .. انسان بونلردن بحث ايدر كن جهراً كولرده قلباً
اغلار ، بوتون بوشيلرك خاطره لرى ده قلبده ايسته اوخنده ايله
كريه نك اراسنده قالير . حياتك سعادتلرى ده بو خاطره لردن
بشقه بر سرمايه ميدر ؟ .. حتى بوتون حيات بوندن عبارت
دكيدر ؟ .. اصل انسان سومكه باشلادقن صوكره يشامغه
باشلامش اولمازمى ؟ ارتق سومه مك ده ايسته اولمكه باشلامقدر
آه ! اجلال خانم ! بيلسه كز ، انسانك الندن ارتق بورشته
حيات ده قاچنجه ، نه مسكنت ، نه سفالت ! .. عشق ايله مضطرب
اولمامق ، اصل اضطراب بودر ؛ حتى عشق ايله اكلنمك ، اوندن
بحث ايدر كن بر خنده استخفاف ايچنده اونى تزييف ايتك ،
ايسته اصل ماتم بودر .. خلاصه اوكوندن تابورايه كلنجيه قدر
هپ بو حزين فيكرلرك اراسنده يوواريلا ند ، نهايت ...

اجلال

نهايت او هيچ بر زمان اراييلمايان اختيار عمجه ني تخطر

ایتدم ، چونکه او عمجه نك ذوق و صفا ایچنده ، سرور و نشئه
عالمده طانیلمش بر قیزی واردی که البته ، اسکی اکلنجه عادتلری
محافظه ایدیوردی دیرکن .. برده کوردهیم که اوا کلنجه عادتلرینه
بدل .. لیکن سداد بك ، ای خاطریمه کلدی ، سز بوراده
کیم بیلیر ، جان صیقنتیسندن پاتلایورسکزدرد ..

سداد

خیر ، بالعکس ، عمریمك هیچ بر دورنده بودرجه مسعود
اولمادم .

اجلال

غریب ! ..

سداد

نه خولیا ایدیورم ، بیلیرمیسکز ؟ بویلهجه یشاق ، دأما ،
بو صمیمیتك سکون افسونکاری اراسنده ، بو اعتماد و احترام
متقابلك هوای آرامشی ایچنده الی الابد یشاق .. بو عالمی بکا
سز کشف ایتدیردیکز .

اجلال

سز ؛ بن دو غرووی سویلیهیم می ؟ سز تأهل ایدیکز ..

سداد

تمام ! .. بوسه - ویزی بکله یوردم . ایشته اختیارلق علامندن

بری دهـا ... تاهل ایتک ، اوت اوت ، مثلاً فارهی آلمق ،
دکلی ... بنی سزک حیلە کزی اکلاماش ظن ایدیورسه کز
یا کیلیورسکز .

اجلال

نه وار صانکه ؟ ..

سداد

او یله یا هر ایش بیتدی ده شیمدی چوجقلره قالدق . اختیار
لقدن بحث ایتدیمسه ارتق معتوه اولدم دیمه دم یا . . نهایت یاشم
اوتوز ، اوتوزالتی .. بویاشده برارکک چوجقلری دوشونه جک
قدر کهنه لشمش صایلاماز ، دکلی ؟ صکره سزک فاره کزه
قارشی بنده بر حس تباعد وار ، اوده بکا قارشی او یله .. بن
اونک نظرنده پک ییپرامش سکسانلک براختیارسه م ؛ حال بوکه
اوبنم ایچون هنوز قادین مثابه سنده تلیق اولونه میه جق برصیدن
بشقە نه اوله بیلیر ؟ ..

اجلال

بالعکس ، یاشلر کزک اراسنده برنسبت طبیعیه وار .

سداد

سبب ؟ نه دن او یله اولیورمش ؟ .. هم نه غریب فیکر ، رجا

ایده‌رم ؛ بونی معنی مخلوقی قوللاریمک اوستنه قویمق فکری
نره دن کلیور ؟..

اجلال

سزه دیدم آ ، اونی لائقه کلایه مامشسکز ..

سداد

شیمدی ایشک اساسنی درک ایدیورم. اونک ایچون ژاله‌نی
دائما ارامزه صوقیورسکز، بنی اوکا، اونی بکامدح ایدیورسکز..
بونی یاپان ده سزسکز ... نه ظالمانه برایش کوریورسکز ،
بیلیرمیسکز ؟ .. هم رجا ایده‌رم ، اولنمک ایسته‌ین کیم ؟ .. بن
اصلاً اولنمک نیتنده دکلم ، بلکه بر کون ... آه ، اجلال
خانم ، بکا تأهلی سودیره‌جک دنیا ده یالکز برقادین وار ...

اجلال

او حالده اونکله اولنیکز .

سداد

سربست دکل ! ..

اجلال

او حالده ، هیچ دوشونمه‌یک ، حقکز وار .

سداد

خیر ، بالعکس ، دائما اونی دوشونیورم ، حتی اوندن بشقه

برشی دوشونديکم يوق آه ! اکر جسارت ايتسه م اوکا نه لر ،
نه لر سويلردم ...

اجلال — اياغه قالفه رق

محقق اونك ايشيتمه مسي، ديكله م مسي لازم كلن شيلردن
بحث ايدرد بكنز، دكلى؟ ينه بوكا جسارت ايتمه يكنز. اونك
سزه قارشى اعتمادى، سزك اوکا قارشى حرمتكزى اخلال
ايدە جك برشيئه تشبث ايتمه يك. نه فائده مسي وار؟ سز نجيب،
اصيل بر قلبه مالكسكنز، فضله اوله رق قلبكزك چوق سومش
اولمقدن متولد بر رقتى، بر حرارتى وار. حياتدن بر چوق كام
آلمش اولديغكنز ايچون بو سزى كنجج براقش، ياشلانمقدن
محافظة ايتمش .. بوتون بومزيتلرى بر بشقه سنه صاقلايكنز،
اويله بريسنه كه سزك سويله دكلريكنزه اينانمق، اونلردن براميد
حاصل ايتك حقه مالك اولسون .. ذاتاً پریشان بر قلبى يكيدين
پریشان ايتمه كه، بلكه بولانمق استعدادنده بولونان بر فكري
تماميله قاريشدير مغه قيام ايتمه يكنز، اوت، اوت، بويله برشيئه
قالقشمايكنز ... (تبسم ايدە رك) هم ايسته سه كزده ممكن
اوله ماز، دكلى؟ سزدكليديكنز، اولجه چيلغين اولانلره عاقلانه
نصيحت ورن .. شيمدى اوصالانلره مجنونانه نصيحت ورمكه
نصل جسارت ايدرسكنز؟ (جديتله) بنم سوزمى طوتيكز، اوقادينه
هيچ، اما هيچ برشيدن بحث ايتمه يك. بن اوقادى طانمايورم،

لكن امينم كه سزك قورقاقلغه حمل ايتديككز سكوتى او سزك
ظرافتكزه عطف ايده جك و بونك ايچون سزه شكران ايله
دولو بر محبت بسليه جكدرد .

سداد

اوت ، ينه احبابلق عالمنده بر موفقيت !.. « سداد بك !
سزكه ارقداش اوله لم !.. » بونقرا تى ارتق از بر ايدر اولدم .
(ژاله كورونور) هايدى !.. ايسته فاره ظهور ايتدى ...
(مستهزيانه كوله رك) بزم نشانلى !..

مجلس : ۱۲

اولكيلىر ژاله يكي يلايرمه سيله صكره نرمين و شهبأ دها صكره سرور پاشا

اجلال — كيرن ژاله يه

اوو !.. كل باقهيم .. آرقه كى دون !.. بونه كوزل شى !.
يالكز شوراسنى براز قالدير مق لازم .. فوق العاده !. بيليرميسك
ژاله ، بويله نه خوششك !.. باقسه كز آ ، سداد بك .. كنجلك ..
بزم مسافر خانم افنديلىر كورسونلر ، شيق كوچك خانملىر ساده
بويوك اطه ايله بوغاز ايچنه مى مخصوص ...

بو صرەدە نۆمىنلە سەدا كىررلر

شەبأ — كمال حرارتلە اجلالە آتیلەرق
 آه ! اجلال !.. بىلسەك ايكي سەنەدر سنى نە اوزلەدم !..
 (اوپر)

اجلال
 سو كىلى شەبأ جغم !..

نۆمىن — دها وقار ايله اوپوشەرك
 بنى كورەجكك كلدىمى ؟

اجلال
 كوزمەدە توتىوردك ..

نۆمىن
 بىلسەك ، سنىك حالىكە نەقدر متأثرم ، اجلال ..

شەبأ
 بىندە سىزك بورادە ، بو يالسىزلاق ايچىندە يشادىغىزى
 دوشونىورم دە ..

اجلال
 اونك نە حكىمى وار ؟

شهبأ

بر بچق سنه دنبری یاقه جقده .. پک بیوک فدار کالق ! ..

نرمین

هر حالده پک نجیبانه برقرار ، تام سکا لایق بر اثر فراغت ،

اجلال ..

شهبأ

هیچ استانبوله اینه یورمیسکز ؟ بومدت ظرفنده هپ بوراده ..

میدیکز ؟

اجلال

پک نادر . انجق بر قاچ کره ایندم ، اوفق تفک مبیاعه سی

ایچون ..

شهبأ

مدهش ! .. بن سزی نه قدر سرور ایچنده ، اکلنجه ایچنده

دائما اشله دوستله کورمکه آلمشمده .. نه قدر بختیار ایدیکز ،

دائما کولردم ..

اجلال — باشنی صالایه رق

بختیار ! ظن ایتم ، فقط ، اوت ، دائما کولردم ..

شېباً

پك اوزون بر زمان ده كچمه دی ..

اجلال

اوزون زمان كچمه دی ، فقط كچمش زمان بندن پك اوزاق

قالدی .

نرمين

اوقدر غلبه لق ايچنده آليشمش ايكن شيمدی بويله ياپ

يالكنز ..

اجلال

پك اوقدر يالكنز دكل ! .. (ژاله نك چكه سندن چكوب

اوپه رك) هايدی ، سن كيت .. بن ده صكره كليرم ..

ژاله چيقار

شېباً

اوقدر يالكنز دكليسكنز ؟ .. ديمك اوقداشكنز وار ...

(كويا سدادی يكي كورييورمشجه سنه) آ ! .. كوزلریمه

اينانه ميه جغم ، باقسه ك آ نرمين ، سداد بك ..

نرمين كذا ، حيرت ايتمشجه سنه

سداد بك ! ..

شهبأ

نصل اولیورده سز بوراده بولونیورسکز ؟ ..

سداد — سلاملاشهرق

عجمجهه کلشدم ..

شهبأ

بز سزی غائبله قاریشمش ظن ایدیوردق ! ..

سداد

صحیفه وجوددن سیلنمکه باشلامشز بیله ..

نرمین

سزی کورمیهالی سنه لر کجدی ..

سداد

غالبا اولکی یازدن بری ..

نرمین

تحف ! ایکی سنه ایچنده د کیشمه مشسکز ..

سداد — آیریجه

باشلادی ..

شهبأ

يوق ، نزمين ، بن سنك فكر كده دكلم ، بالعكس ، سداد
بك كنجلكه دوغرو بر آديم دها اينمش ..

اجلال — يواشجه سداده

دقت ايديورميسكز ؟ ..

شهبأ

ديمك هر كس سزك غيبوبتكزه اغلار كن سز بوراده صا-
قلانيورديكز ..

سداد

صاقلانمق دكل ، سادده جه عموجه مك كوشكهنده ديكه نيوردم .

شهبأ

اجلاله قرابتكزه يكي واقف اوليورم . سن بيليرميدك ،
نزمين ؟

نزمين — معيندارانه كولهرك

سداد بكي بوراده كورونجه خاطريمه كلدي .

شهبأ

هر حالده بو قرابتده تهلكه كورويورم .

سداد

غریب شی ! او نه دن ؟ ..

شهبأ

اوت ، اوت ، اجلال سکا پدر بکک بو یکنندن صاقین !
بن بوراده اولمالیدم ده اوکا تهلکهک نک نصل او کنسه کیلیر
اکلاتمالیدم ..

نرمین

شهبأ ینه کندیکی اونوتیورسک .

شهبأ

اوت ، اوت ، بوراده قالسه یدق ..

اجلال

قالسه یدق ، نه دیمک ؟ البته قاله جقسکز ..

شهبأ

خیر ، خیر ، قابل دکل ..

نرمین

قالیرسه ق سداد بکک جانی صیقیلیر ..

سداد

امان افندم ، اونصل سوز ؟ ..

شهباً

سَنَكْ جَانَكْ صِيقِيَلَمَازِمِي ، اَجَلال ؟

اَجَلال

نَمِی ؟ اَكَلایَه میورم ، نه ایچون جَانَم صِیقِیلَه جَقْمَش ، رجا
ایده رم ؟

نرمین و شهباً

خیر ، خیر ، اوله ماز ، اوله ماز ...

نرمین

نه ایچون صایغیسزلق ایتمش اوله لم ؟ ..

اَجَلال

بو تعبیردن مقصدنه ؟ حقیقه اَكَلایَه میورم .

نرمین — معیندار

بوسکون و تنهائی عالمی تشویش ایتمک ..

اَجَلال — میدانِه اوردرق و کمال جدیتله

شیمدی اَكَلایورم ؟ فقط تمامیه یا کیلیورسکز ، بوراده
تشویش اولونه جق هیچ ، اما هیچ برشی یوق . قطعاً قورقما یکنز ..

نرمین

صحیح می ؟ .. سداد بکک کیردیکی یره ...

شهبأ

سوداده برابر کیرده ..

اجلال — ینه جدیتله دوام ایدهرک

اوت، بلکه، فقط سدادبک هرشیدن اول وظیفه شناس بر
آدمدر، بوراده بولونان قادینک سربست اولمادیغنه وذات الزوج
اولدیغنه ده واقفدر .

شهبأ

نه تحف شی ! .. انسان بر از الای ایتکدهده سربست
دکلیدر ؟ .. وظیفه ایله اکلنجه اراسنی بولمق ایچون اورتهده
نه مانع وار ؟ ..

اجلال — کمال وقار ایله

سن ! .. بن وارم ! ..

نرمین

اجلال ! .. شاقه یه تحمل ایدهمز اولمشسک .

شهبأ

نه قدر جدیلشمش ! ..

اجلال

اوت ، کوی قادینلرینه بکزه مشم ، دکلی ؟ .. حقیقه عیب

ایتدم ، سزلطیفه ایتمک ایسته یورسکیز .. بنده اکلایه مایورم ،
ارتق اکلایق قابلیقی سونمش .. عفو ایدرسکیز .

سرور پاشا — کیره رک ، یواشجه سعادیه

صندوقلر کیزی قارتالدن کتیرمک ایچون آدم کوندردم .

شهبأ — یواشجه

پک اعلی ! ..

اجلال — نرمینله شهبأیه

مادام که پدرم کلدی ، بر دقیقه مساعده ایدرمیسکیز ؟

شهبأ

امان افندم .

اجلال

ژاله بی یوله چیقاریمده ..

شهبأ

کیمکه چیقه جق ؟ ..

اجلال

سداد بکله ..

نرمين و شهبأ

بيورك ، ايشكنزه باقك ..

اجلال — چيقاركن يواشجه سداده

حقكز وارمش ! مسافرلرم حقيقه جان صيقه جق مخاو قلد ..

سداد

سعدا پك آچيق ، پك سربست ، لكن خوش ! ..

اجلال — تبسم ايدهرك

اوت ، اوت ، سزى كنجله شيور ديدىكى ايچون ، دكلى ؟ ..

آه ! بن سزى قلىكزك اك درين كوشه لرينه قدر او كرندم .

سداد و اجلال چيقارلر

مجلس : ۱۳

نرمين ، شهبأ ، سرور پاشا

(اسرار انكيز برصورتده اوچى برارايه طوپلانيرلر)

سرور پاشا

نه ديرسكنز ؟

شهبأ

پاشا ، سزك شيخ افدينك حقي وارمش .

سرور پاشا

- ار الرنده برعلاقه می وار ؟ ..

شهبأ

علاقه ؟ .. نرمین ، نه دیرسك ؟

نرمین

بیچاره اجلال ! ..

سرور پاشا

امان یاربی ! ..

شهبأ

اوت ، اوت ، لزومندن فضله فدا کارانه حسلر ، عالیجنابانه
فکرلر ، صکره هیجانلر ، فورانلر .. یا لسانی .. یا حالی ... سودا
برکره ایشه قاریشدیمی ، بونلرک هپسنی آلت اوست ایدر ...
بنجه مسئله غایت آچیق ! .. بر کره دوشونسه کزآ ، سز نه
دیدیکز ؟ اون بش آیدن بری بوراده یاپ یالکزم ، متمادیآ جان
صیقنتیسی ایچنده ..

سرور پاشا

یوق ، صیقیلیور دیمه دم ، یالکز خسته جه ..

شهبأ

قادینلرک یالکز بر خسته لقلری واردر ! جان صیقنتیسی ،
بونک ده تک بر دواسی واردر : عشق ! بنجه ، غایت آچیق
سویله یورم ، اجلال سداد بکی سویور ، بونی عادتاً کوزله
کورییورم .. بز ، قوجه مش قیزلر ، بویله شیلری فرق ایتمک
ایچون او یله کسکین بر شامیه مالکز که .. اکر اجلال سربست
اولسه یدی سداد بکی درحال داماد ایدردیکز ، ایش بیتر
کیدردی .

سرور پاشا

اوت ، ایشته داماد یاپیویرمکدن عبارت اولسه یدی .. بیچاره
اجلال ! .. نرمین خانم ! سزنی بوایشک ایچنده یالکز براقازسکز ،
دکلی ؟ ..

شهبأ

بزمی ؟ بزجه بویله برایشه کیرمکده بر تهله که کورمه یورم ..

نرمین

نصل ، سعاد ؟ ..

شهبأ

یوق ، یوق ، نزمین اجلالی بومشکل وضعیتدن قورتارمق
لازم، اوت ، اوت ، مطلقا ، هم بونه تحف بروظیفه اوله جق ! ..
دوشون برکره !.. (سرور پاشایه) برهفته یه وارماز ، بز بو
قورتدن سزک اوکزی قودتاریرز .

نزمین

اوت ، اما سعدا ..

شهبأ

یوق ، باق نزمین ، سن ایسترسهک کیت ، بن قالیرم ...
(نزمینی اشارت ایدهرک - سرور پاشایه) اوده قالیر! .. اوت ،
اوت ، قرار ویرلدی ، اوده قالیور ! .. ذاتاً اونک بایلدیغی
شیلردن بری ... نزمینله برابر ، مشترکاً ، سزک یکنسکزی
بورادن آشیره جغز ، بواویونی سزده تماشا ایدرسکز .. هایدی
نزمین ، یاریشه !.. باقهلم ، کیم اول یتیشه جک ؟ ..

نزمین

شهبأ ، سن کندی باشکه قوش ، بن یاریش ایدیجیلردن
دکلم .

شهبأ

دیمک ایسته میورسک ؟ ..

نرمین

بویله کوکل ایشلرینه قاریشماق مسلیکنده دکل .. ذاتابو
یولده ایشلردن چوق جانم یاندی ..

شهبأ

پك اعلى ، اویله اولسون ! .. بئتك باشمه باشلارم ، برین
یتیشیرده ارتارمده ..

سرور پاشا

بندن ده دما ! ..

شهبأ

یالکیز ، پاشا ، ارتق شطرنج ، طاولة ، بزیغ فلان تعطیل
اولونه جق . سزده قیرسیرانلری ، صندال عالمیری یاپیله بیلیرمی ؟ ..

سرور پاشا

یعنی ..

شهبأ

یعنی صندال عالمیرنده انسان دکره دوشه بیلیر ، قیرسیرانلرنده
یارلردن یووارلانه بیلیر ، ایکیده برده بویله قضالر ایچنده ارکک
کندیسنی تهلکهیه آتهرق سزی قورتاریر ، بوتون بو وقایع
خیالی تحریک ایده جک شیلردر . سداد بک براز خیالپرست

کورونیور .. صکره ، ها خاطریه کلدی ، بوکون کویده بر
تلاش حس ایتدم ، برشیلرمی حاضرلانیور ..؟

سرور پاشا

اوت ، یارین کوی دوکونی وار ...

شهبأ

امان نه کوزل .. کورمک ایسته دیکم شیلردن بری ...
سداد بک ، بزه رفاقت ایدر ، کچ وقته قدر دولاشیرز ، صکره
صولر قارارنجه .. بزیولمزی شاشیررز .. کوره جکسکیز ، برهفته
بیله سورمیه جک . یگرمی درت ساعت ایچنده قیزیگز تهلهکدن
قورتیله جق . (صحنه نك دینه کیده رک باقار) اوو ! .. بزم
صندوقلر کلیور ، جنکه کیرمک ایچون مهمات ... امان ! نه
تحف اوله جق ! .. نه تحف اوله جق ! .. اوو .. باقسه کزآ ،
بونلرک سیرانی نه چابق بیتدی ..

سرور پاشا

کیملرک ؟ ..

نرمین — کذا صحنه نك دیندن باقهرق

اوت ، عودت ایدیورلر .

سرور پاشا

لکن کیمدن بحث ایدیورسکیز ؟

شهبأ

فاره دن !.. سداد بکدن !..

سرور پاشا

نه اولدی ، نه اولدی اجلال ؟ ..

مجلس : ۱۴

اولکیلر ژاله اجلال سداد

سداد

براشی یوق ! برشی یوق ! .

سرور پاشا — اجلاله

لکن بتک بکیزک کول کبی ..

اجلال

بر آز قور قدم ده ...

نرمین

بر قضای اولدی ؟ ..

سداد — اهميت و يرميه رك

بر كوچك حادثه !.. يولدن چيقوب ده قيره صاپيله جق
يرده .. ژاله نك آياغى قايدى ..

نرمين

دير كن ؟

سداد

همان اوراده كوچك بريار واردر، ژاله بر كره دوشونجه ..

سرور پاشا

كوچك بريار دكل ، عادتاً ديك بر اوچوروم ..

اجلال

ژاله دوشر دوشمى ، ييلديرمه سنك اتكلرى ايچنده
يوارلاندى ...

سرور پاشا

آمان ياربى !..

سداد

آرقه سندن اينوب يتشمك ، وياقه لامق ممكن دكل ...

اجلال

او يتشنيجه به قدر ..

سرور پاشا

او حالده نه ياپدك؟

سداد — ساده جه

يارك بر آز ايلريسندن آتلايوب يووارلانمق اوزره اولان
ژاله نك او كنى كسديرمك ..

شهبأ

تبريك ايدرم ! بويوك جسارت !.

سرور پاشا

فقط بن اوراسنى بيليرم ، آتلايهيم ديركن خرده خاش
اوله بيليردك .

ژاله — اجلاله

سداد بك او قدر اپي آتلاركه بونده كنديسى ايچون بر
تهلكه يوقدى .

اجلال

بن اونك ايچون دكل سنك ايچون قورقدم .

ژاله

بنم ايچونمى ؟

اجلال — سوزینی کسه رک

اوت ، اوت ، کیمک ایچون اولاجق ؟ هایدی ، کیت ،
اوستکی دکیشدیر . توز طوپراق ایچنده سک . . (بر اشارتله
اوکا کیتمه سنی امر ایدر)

ژاله — متحسرانه

دیمک کوزل یلدیرمه می چیقارمالی ؟

اجلال

اوت ، اوت ، آرتق بو کون سیران یوق .

ژاله

یارین ؟ .

اجلال — دالغین

یارینی صکره دوشونورز . بو کون بیتدی . (صبر سزلانه رق)
هایدی باقه لم ، بنی اوزمه رجا ایدرم ، کیتسه ک آ ، کیت باقه یم ،
فنا حالد سیکیرلندم ...

ژاله چیقار

سرور پاشا — یواشجه شهبایه

کور دیکیزی ؟ سز خیالی غجیقلایه جق قضالر ترتیب ایتک
ایسته یوردیکیز .

شهبأ — عین صورتله

های چاقین قیز! .. حقمی ییدی ..

سرور پاشا

نصل؟

شهبأ

نصل اوله جق؟ یار مسئلهسی . خاطریمه کلن شیلردن
بریدی . فقط بشقه قضالرده ترتیب ایتک ممکن .. (اجلال
صاپ صاری ، بردنبره برصندالیه نك اوستنه پیغیلیر) آمان ،
آمان ، نه اولیور؟ . (اجلاله قوشار)

سداد — کذا

اجلال! ..

سرور پاشا — کذا

نه اولیورسك؟

اجلال — حالسز

بیلمم .. هیچ برشی دکل، یالکیز برآز باشم دوندی ده ..

نرمین — برکوچك شیشه اوزاتهرق

برآز نشادر روحی ..

شهباء — سرور پاشايه

کورديکزمی ؟ پک آشکار دکلی ؟

اجلال — شیشه پی رد ایدهرک

خیر ، خیر ، برشی یوق .. قورقودن سیکیرلر مه بر فنالق

کلدی ده ..

سداد

فقط اورته ده برشی یوق ...

اجلال — نشئه لی کورونمکه چالیشه رق

قباحت ژاله نک ... سز اونمکه اکلنیوردیکز ، « الکی بکا

ویر ، دوشرسک ! » دییه الای ایدیوردیکز . اوده سزه

معرفتلینی کوسترمک ، اوچوروملرک کنارنده صیچرامق

ایسته دی . نه ایسه بیتدی .. (ایاغه قالقهرق) ایشته کچدی .

ارتق بوندن بحث ایتیه لم ، رجا ایدهرم .. (زورله کوله رک)

آه ، اوژاله آه ! .. (ژاله کیرر) نصل ؟ ینه می چیقده کلدک .

ژاله

بر تلغراف ! ..

اجلال

بکامی ؟

ژاله

شیشلیدن ظن ایدەرم .

اجلال — تلغرافی آلوب آچار وزورله نشئه لی کوروئمک ایستیه رک
بر کونده نه قدر وقعه .. اومولمايان مسافر لر ، بکلنمه یین
برقضا ، دیر کن بر تلغراف ، بر کونده اون بش آیلق وقوعاتدن
زیاده حوادث .. (اوقور) امان یار بی !..

سرور پاشا

نه وار ؟ نه وار ؟

اجلال

در حال استانبوله اینمه لی .

سرور پاشا

همان شیمدی می ؟

اجلال

در حال .. در حال ..

سرور پاشا

خسته خانه د نمی ؟

اجلال

اوت .

سرور پاشا

نه دييورلر ؟ (النى اوزاتير)

اجلال — تلغرافى ويرميه رك

سبب كوسترميه رك بنى ايسته يورلر .

سداد

او حالده ؟ ..

اجلال

او حالده همان يوله چيقمالي ..

سداد — اجلاله

بنده سزه رفاقت ايده يم . . .

اجلال

خير ، خير ... سبب ؟ ..

سداد

بو كاده اذن يوقى ؟ ..

اجلال

قرتاله قدر اولور ، اكر مسافرلر برابر كلك ايسترلر سه ..

يا خود كويك كنارينه قدر ...

شهباء

اوت ، اوت ، دو کون حاضر لقلرينى ده کورمش اولورز.

سداد — اجلال

ديمك برابر كلديكمه راضى اولمايورسكز ؟

اجلال

اوت ، اوت ، مسافرلره رفاقت ايدرسكز . مساعده ايديكز ،

كينهيم . (ژالهيه) سن بكا يارديم ايت ..

(كيدرکن تلغرافنى اوقويه اوقويه چيقار)

ژاله — رفاقت ايدهرک - يواشجه اجلاله

نه قدر متأثرسك !. (تلغرافى کوستردرك) بونده برشيلر

وار مطلقا ...

اجلال

بونده مى ؟ .. کيم بيلير ؟ بلکه حياتمك بوتون خلاصهسى ..

کل ، کل ...

سرورپاشا — يواشجه شهباء و نر مينه (اوچى براراده طوپلانيرلر)

کيدیور !! ..

نر مين — يواش

کيتمه يور ، قاجيور .

شهبأ — دوشونن سدادی کوستره رك
 عودتنده اونى بوراده كورمیه جك، بن بو وظیفه یی اوستمه
 آلیورم .

سرور پاشا

بووقعه تام بزم ایشمزه موافق .. حقیقهٔ اکلایورم که سز
 اجلالی تهله که دن قورتاره جفسکز . شیخ افندی اوپله ممنون
 اوله جق که .. بن ده کیدوب اوطه لر کز ایچون امر ویرهیم ..

نرمین

امان ، پاشا انشته ، اوطهم بر خالی یرده ، کورولتیدن
 اوزاق بر طرفده اولسون .. او قدر اویقوسزلقدن راحتسزم که ..
 هیچ اولمازسه اویقویه بدل سکوت اولسون ! ..

سرور پاشا

مستریح اولکز ! ..

صاغدن چیقار

نرمین — سداده دوغری ایلریله یرک و ایجه یاننه صوقولق
 ایستیه رك

نه دوشونیورسکز ، سداد بك ؟

شهبأ — نر مينك او كندن كچه رك ، يواشجه
 يوق .. نر مين ، مادام كه سن قاريشمق ايسته مه دك ، ايشى
 بكا براق ...

متبسم ، سدادك ياننه ياقلاشيركن ، پرده اينر



پرده : ۲

عين منظره

مجلس : ۱

ژاله يالكيز صكره سدادله شهبأ دها صكره نر مين

پرده قالقنجه ژاله صاغ كوشه ده ، يوزى حضاره متوجه
 بويوك بر دقتله آل دفترينه رسم يامقوله مشغولدر . بر آاز صكره
 سسلر و قهقهه لر ايشيديلير ، ژاله در حال دفترينى قاپار وجيبنه
 قور ، آياغه قالقهرق عجله بر ككتاب آاير و كويا مطالعه يه
 دالمش كورونور . سدادله شهبأ كورولتيله كيررلر و ژاله يي
 كورمزلر .

شهبأ -- سداده

بالعكس بك ايركن دوندك . نه ايچون يورولمش اولهيم ؟
 بو كوى دوكونى اودرجه اكلنجه لى ايمش كه .. هله زورنا ايله
 داوولله اوينايان دليق-انليير ... كوره شن پهلوانلر .. بوتون
 كوكده لك ، قوللرك قوتى ، تناسبي ميدانه چيقيوردى .

سداد

نرمين خانم يورولمشدى .

شهبأ

نرمين ! او دائما يورغون . آ كلامشسك زدرآ ، نرمين
 بيتيك برقادى بقدرد .

نرمين — كيدهرك وعنف ايله

هر كس سزك كى قوى اوله ماز .

شهبأ

اويله اوله ميانلره آجيرم .

سداد

بونلره نه اوليور ؟ .. (آريجه الندن باستونى ، منديلىنى
 ماصه نك اوستنه قور) .

نرمين

اجلال كیده لیدن بری بر هفته اولیور، بر کون دیکلنمه دک..
کوی دو کونی، سنت دو کونی، پهلوان کوره شی، قرتالده
صندال سیرانی، مهتاب عالمی... بیلیرمی یم، دهانه لر؟ بن
آرتق بو کوی اکلنجه لرینک هپسندن تیکسیندم. اوف!..
(صوله اوطورر) بونلرده نه ذوق وار. دکلی سداد بک..

سداد

نه دییه یم؟.. (جیلرینی قاریش دیره رق ماصه نك اوستنه
بر طاقم کوچوک شیلر قور)

شهبأ — غنف ایله، متعرضانه

بك فضله اینجه لك کوستریورسکیز.

نرمين — عینيله

لزومی قدر اینجه اولمایانلره بویله یاقیشیر. (سدادده)
سداد بک؟

سداد — نرمينه

افندم؟

شهبأ -- جیلرینی بوشالتمقده دوام ایدن سدادده

سداد بک؟..

سداد

افندم ؟

شهبأ

بونلر نه ؟ .

سداد

هنوز صرف ایدله مش فستق ، بادم ، فندق ، اوزوم ،

شکرله مه ...

شهبأ

اوو ! .. نه اي . بزه تقسيم ایدرسکزر ، دکللی ؟ ایسترسه کزر

قرعه چکه لم ..

سداد — شهبأیه

نصل ایسترسه کزر .

نرمین

سدادبك ، سوبله سه کز آ ..

سداد

امر ایدیکز ، افندم .

شهبأ

حقیقه سدادبك ، بو کون ینه قرتاله اینه جکزر ، دکللی ؟

بو کون آرتق بکا کورک چکه مک درسی ویره جکسکزر ، وعدیکزی

اونو تمادیکز آ ...

سداد

امان افندم ، هیچ بویله برشی اونوتولورمی ؟

نرمین — شهبایه

همان ایر کند نمی کیدیلہ جک . او قدر مفصل یمکدن صکره ..

شهبأ

اوت ، اوت ، مفصل یمک . بن بویله یم . سز نه پیرسکز ،
نه ایچرسکز ، نه او یورسکز . عادتاً بر ملک ، بومعلوم ..

نرمین

دارلمه یك ، آجانم . . . بن سزك صحتکیزی دوشونہ رك

سوبله دم .

شهبأ

ا کسک اولمایک ، افندم ...

نرمین

قرتاله اینمک ایچون وقت کله سی یه قدر سداد بک بزه شعر

اوقور ...

سداد

امر ایدرسکز .

شهبأ — نرمینه

ینه می شعر ؟ .. اوف .. دون کیجه کی کبی دیسه کز آ ..
پکی اما کوپه کوندوز شعر هضم اولونورمی ؟ دها ایسی شوراده
سده طوپ اویناسه ق ..

سداد

نصل ایسترسه کز .. طوپ اوینایه لم .

نرمین

لکن ، شهبأ براز سداد بکه مساعده ایدیگزده نفس آلسون .
دائما حرکت ایتک علتنه مبتلا سکنز . سز قبالده اولانلرک هپسی
کبی ..

شهبأ — یرندن فیرو لایه رق ، غضوبانه

قبالمده نه وارمش ؟ .. بن سزدن دها ایری یم ظن ایدیور .
سه کز .. بلامک اولچوسی تام آلتش ، هر حالده سز کککندن
فضله دکل ..

نرمین — معترض

اما یا کلش ها ...

شهبأ

هیچ یا کلش دکل .. تریزینک دفتری شاهددر .

نرمین

اوت اما ، بویجه فرق وار .

شهبأ

فرقی وار ؟ اصلا ... (سداده) بزی اولچرمیسکنز ؟

سداد

مع الممنونیه ! ..

شهبأ

آمان ، بر آرشون یوقی؟ بر سجیم، بر شریت، اولچوله جك
 برشی... (ژاله یی کوره رك) وای ! فاره ... ینه کوشه لرده،
 هر وقتکی کبی .. فاره ده مطلقا اولچوله جك برشی واردر ...
 (ژاله یه دوغری کیدر ، النده کتابی کورر و بر کره باقدقن
 صکره الندن آلیر) اوو ... بنم کتایمی آلمش؟ .. شوکا باقیکنز..

سداد

ژاله نك اوقویه مایه جفی بر شیمی؟ ..

شهبأ — یواشجه سدا ده، وکوزلرینی سوزهرک
 پك آچیق صاحیق بر حکایه ...

— — —

مجلس : ۲

اولمکیلر سرور پاشا

النده جریده لر و مکتوبلر

سرور پاشا

بوصباحك محصولاتی ...

سداد - ژاله یه

فاره خانم ! چوجقلر اویله شیلر اوقورمی ؟

سرور پاشا — ایلر بله یه رك

ینه نه یایمش ؟

ژاله — سداده یواشجه
بکا آزار ایشیتدیره جکسکیز .

سرور پاشا
نه وار ؟ نه اولمش ؟

سداد — طبیعی
برلطیفه ایتدمده .. (سرور پاشا اوکا بر مکتوب ویرر)
تشکر ایده رم !.

شهبأ — ژاله دن آلنان کتایه باقهرق
ترسنه طوتیوردی، شو حالده قباحتنی عفو ایتدم. (سرور
پاشایه) اجلال دن بر خبر یوقی ؟

سرور پاشا — یاواش سسله
حالا بر خبر یوق !.. پک غریب !.. (بر دمت مکتوب
ویره رک) بونلرده سزک ...

سداد
نه قدر مکتوب ...

شهبأ
اطهیه یازمشدمده ... بریکن مکتوبلریمی کوندرمشسار .
(معیندار) بکا بویله برچوق یازانلر واردر ... (سرور پاشا
نرمینله ژاله یهده برر مکتوب ویرر) زواللی نرمینک یالکیز بر
مکتوبی وار، ژاله نکیکندن فضله دکل .. غالباً اوده بر مکتوب
رفیقه سندن ...

نرمين

خير ، بالعكس ، بنم شاعرمدن ...

شهبأ

اوو ! .. هله كورهلم ..

نرمين — هيچ سسنى چيقارمايان سدادە

ايسترميسكيز ، سداد بك ؟.

سداد — تربيهلى

اكر صايغيسزلق اولمازسه ...

نرمين — اوكا تبسم ايدەرك

سزك سوريكيزى طوتيورم . (كوزلرني سوزەرك كندى

كنديسنه اوقور)

شهبأ

پوف ! .. چوجق آغزى .. ياخوداسكى ترتيب بر ياوه اوله جق !

نرمين — بك منفعل ، شهبألك النده كيلره اشارت ايدەرك

ترزيلرله قوندوره جيلرك ، شكر جيلرله قويومجيلرك حساب

پوصله لرندن اييدرا ...

شهبأ — پرحدت

حساب پوصله لريمى ؟ (اونلرى سدادە اوزاتەرق) سداد

بك ، اوقوييكنز ، رجا ايدەم .

سداد — ردايدەرك

امان افندم ، نصل اولور ؟ ..

شهبأ — سدادك الندء كنه اشارت ايدءرك
 اويله يا ، سزك او قونه جق بشقه شيلر كز وارء . مطلقا بياض
 يلديرمه ليدن .

نرمين
 امان ، شهبأ ، نه قدر ايلرى كيديورسك ؟

سداد
 هيچ دكل . امين اولك ، نه بن بياض يلديرمه لى ي دوشونيورم ،
 نه ده بن اونك خاطرينه كليورم .

نرمين
 اوخ ! سداد بك ... انكار ايمه ييكز ..

شهبأ
 هر كسجه معلوم بر شى كه سزك اونك حقنده درين بر
 مفتونيتكز واردى . بوراسى محقق ... اما كوزلاكنه مى ،
 ظرافتنه مى ... بلكه ده دائما بياض يلديرمه لرينه مى ؟

سداد
 بلكه يو صوك شيئه ...

شهبأ
 ديمك ، بياضدن او قدر حظ ايدىيورسكز ؟

سداد
 بك زياده .

شهبأ — آیرجه

بونی او کرشمس اوله لم .

نرمین

بیاض او قدر کبار بر رنگدر واویله یاراشیر که ...

شهبأ — متجاوز، نرمینه

اوت ، کنجهره ..

نرمین — مقابله

وايجه لره ...

شهبأ

اینجهره می ؟ .. صحیح ، حسابمزی کورهمدک . پاشا، رجا

ایدهرم ، سزده بر ایپ وارمی ؟

نرمین

ینه می ؟

شهبأ

آلتش، دیورم ، آلتش ... سزی قولایجه براقه جقمی یم،

ظن ایدیورسکیز ؟ پاشا ، بولدیگز می ؟

سرور پاشا — آرانهرق

لکن کوزیمه برشیلر ایلدشمه یور .

شهبأ

نصل اولور ! هبیچ ، براولچونه جک شی بولونماسین . هاه ! ..

ژالهیه قوشار وبلندن کهرینی چیقاریر

ژاله

امان افندم ، کرمی براقیکز ...

شهبأ

شیمدی ، شیمدی !.. بردقیقه !.. (کیدوب آینه ده
قوشانه جق اولور ، وایکی اوجک آراسینده بویوک بر فاصله
قالدیغنی کوره رک) آ !.. آ !..

ترمین

براز قیصه جه کلدی غالباً ...

شهبأ — نرمینک بلنه قویغنه چالیشه رق

بکامی ؟ ساده بکامی ؟.. هله سزی ده بر کورده لم ... ذاتاً

بوده بل دکل که ...

سداد

چوجق بلی ...

شهبأ — ژاله یه کمرینی اعاده ایدهرک ، سداده

سزده دائماً بوچوجغه صا تا شیرسکز . آه !. قورده لاسی ..

کیدوب ژاله نک صاچلرندن قورده لاسنی چیقاریر

ژاله — کندیسنی قورومغه چالیشه رق

ایکن ، شهبأ خانم ، صاچمی ، باشمی بوزیورسکز .

شهبأ — دوام ایدهرک

دور ! دور ! .. قورقه ، آجانم ... (ژاله نک صاچلری

اوموزلرینه دوکولور) تمام ! .. اولدی اوله جق !..

سرور پاشا

ژاله !.. اوتانمئورميسك ، عيب دكلى ؟

ژاله

آمان افندم ، قباحه بنده مى ؟

شهبأ

اوو !.. صاچ دكل چاغلايان .. سداد بك بو طرفه باقمايك

سداد

انفس ! برصاچ صويي ايچون اعلاننامه رسمنه بگزه يور.

ژاله صيقيله رق قاچار

شهبأ

يچاره فاره !.. ينه قيزجغزك كوكلنى فيرديكز. (قورده لايي
اوزاتهرق) ايشته امتحان ساعى كلدى . اونوتمه، نرمين، تام
آلتمش !..

نرمين

مطلقا بك زياده صيقه رق . . .

شهبأ -- پرحدت

بنمى ؟ صيقه رقى ؟ .. (قورسه سنك اوجنى چيقاروب

كوستره رك) ايسترسهك باق ! . (سداده) اولچو كز...

نرمين

حاجت يوق ! حاجت يوق ! . بن بحثى غائب ايتمه راضى

اوليورم .

شهبأ

باقك ، باقك ، واز كچيور ، شاهد اولك ، بحثي غائب ايتدى .

سداد

اصل غائب ايدن بيم !

شهبأ

طوپ اوپنار كن زيانكزى چيقاريسكز . هايدي ،

طوپلرى حاضرلايك ..

سداد

كيدىيورم .

نرمين

سداد بك ، كلير كن لطفأ يلبازهمى كيتيريرميسكز ؟

سداد

مع الممنونيه ..

سرور پاشا

فاره يي ده برابر آليك ، صابيلر كزى يازار ..

شهبأ

سداد بك ، بلكه يورم .

نرمين

يلبازهمى اونو تماييكز .

سداد -- چيقار كن كندى كندينه

بونلره نه اوليور ، الله عشقنه ؟ ..

مجلس ۳

نرمین، شهباء، سرور پاشا

شهباء — نرمینه

سویله، الله عشقنه، نرمین!.. بری بریمزی ا کلايه لم،
سن بوايشه قاریشیورميسك قاریشمايورميسك؟

نرمین

بنمی؟ آی بن قاریشدمی؟

شهباء — حرارقله

اوح! قاریش قاریشمه، بنجه مساوی! فقط نهیه قرار
ویره جکسهك آچیق سویله، هله قاریشدیغك حالدہ قاریشمايورم
دیقه!..

نرمین

مرامکی آ کلامیورم!..

شهباء

اويله برا کلايورسك كه... ايكیده برده، سدادبك شونی
یاپسهك آ، بونی یاپسهك آ.. سدادبك شویا صدیغی ارقه مه قویویریکنز،
سدادبك یلپازه می کتیریویریکنز!.. کویا بن ا کلامازمشم کبی..
عادتا بنم ایشیمه انکل اولیورسك.

سرور پاشا — اوزاقدن قولاق ویررکن ، آرایہ کیرہرک
شہبأ خانم ، رجا ایدہرم ...

نرمین

ایشکزی یولنہ قویہ مادیغکنز ایچون اوفیکہ کزی بندن
چیقارمق ایستہ یورسکنز .

سرور پاشا

رجا ایدہرم ، نرمین خانم ...

شہبأ

ایشم یولندہ دگلی ، ظن ایدیورسکنز ؟ ...

نرمین

ہر حالہ ازدواجہ یناشہ جق کی کورونہ یور ، پک صوغوق

دوریور ...

شہبأ — عزت نفسی رنجیدہ اولمش

صوغوقی ؟

نرمین

آی ، صوغوق دورمیورمی ؟ پاشا انشتہ مک بیلہ دقتنی

جلب ایتشدیر .

سرور پاشا — محترانہ

واقعا ازدواجہ پک متایل دکل ...

شہبأ

صوغوق بولونیور فرض ایتسہک بیلہ قباحہ کیمک ؟

سرور پاشا

هیچ شبهه یوق که قباحه اجلالده . اونک عقلی فکری
اجلالده ...

شهبأ

ایشته بونده یا کیلیورسکز . او کیده لی بر هفته اولدی ،
نه اجلال اوکا مکتوب کوندردی ، نه ده او اجلاله دائر معلومات
آلق ایستهدی .. امین اولک ، هر وقت بویله در ، بو ایستده
اصل صمیمیت ، جدیت قادین طرفنده .. اوساده ارککلک
اویوتنی اجرا اییدیور .. آه ؟ ارککلر ... بر کره بن اوکا
پنجه می طاقسه م کوستیرم ..

نرمین -- مستهزی

ایش ترسنه اولماسون ده !

شهبأ

بنمی ؟ بن هیچ برشیدن قورقام . بکا طیرناق کچمز ...

نرمین

نه اولورسه اولسون ، سدادبک تهله که لیدر .

شهبأ

اومی تهله که لیدر ؟ اما یاپدیکز آ ، ایشته بر هفته در ، بوراده
اوچ قادین اره سنده تک باشنه اولدیغی حالدده ...

سرور پاشا

اوچنجیسی کیم اولیور ؟ ...

شهبأ

بن ژاله بی ده صایورم ، نهایت اوده برقادین دگلی ..؟
 اونکله برابر، اوچ کشی یز. فقط هانکیمزه قارشی جدی بر
 تشبثی وار ..؟ تهلیکلی اولق بویله میدر ؟ هله فارهی قارشی
 او قدر الای ایدیور که بعضاً حدودی بیله تجاوز ایدیور .
 بزه قارشی اودرجه رعایتکار که رعایتک بودرجه سی ده عادتاً بر
 تزییف ... اعتراف ایدرم که بن بوآدمی ا کلامیورم . ارتق
 اوصانجمی کلش ، یوقسه صیقیلقانی ؟ ا کر یاقه جقده قالماسنه
 بر سبب یوقسه نه ایچون بورادن کیتمک بیلمه یور ..؟

سرور پاشا

اجلالی بکله یور. اوده البته کله جک، ایش ینه طوتوشه جق.
 شهبأ خام ، بن سزک یر کزده اولسه م هیچ فتور کتیرمه م ..

شهبأ

بنمی فتور کتیره جکم ؟ خیر ، خیر ، سز بنی دها او کره -
 نه مه مشسکز ... شهبأ شکارینی قولایجه صالیویرمز . فقط ارتق
 ایشه بر نتیجه ویرمک لازم کلدیکندن بویوک چاره لره مراجعت
 زمانی ده کلدی .

سرور پاشا -- متحاشی

وای ، سزک شمدیکیلردن بویوک چاره لر کز می وار ؟

شهبأ

اول امرده ، شیمدیدن تیزی یوق ، تپه دن طیرناغه بیاض

کینه جکم . بو آدم بياضدن حط ايدر مش . بر کره اونك خوشنه
کیدن رنکه بوياندقدن صو کره ... آرتق اوته سنی بکا براقك .
(يواشجه نرمينه) کورك درسی اك اي چاره لردن بریدر .
هله بر قضا ايله دکره دوشرسه م ...

نرمين -- کذا يواشجه

نصل ؟ نصل ؟

شهبأ -- دائماً يواش

بن دکره دوشونجه اوده بالطبع آتلايه جق و بنی قور -
تارمق ایچون ... ا کلايورميسك ؟ قورتاردقدن صکره برده
آیلتیق لازم کله جك ، بن آیلنجه یه قدر اکر او بایلمازسه
شاشارم . نهایت اعلان عشق ... دکر قضا سنك نتیجه سی
اعلان عشقدن بشقه نه اوله بیلیر ! اعلان عشقدن صکره ده
ازدواج ...

طیشاریدن سدادك سسی

شهبأ خانم !

شهبأ

طوب او یونی ... (طیشاری یه سسلنه رك) کلیورم ، کلیورم .
(نرمينه) رجا ایدرم . ، آغز کدن بر کله قاجاسین ... برده
یا قاریشیرسك یا قاریشمازسك ، ایکیسندن بری ... قاریشه جقسه ك
خبر ویر ، او قدر ! .. (صحنه نك دینه دوغری کیدر)

ژاله (شهبأیه برطوپ ویرهرك)

طوپكز بنده ! . .

شهبأ ژالهك النذن طوپي آلیر و طیشاری ، سسلنهرك

کلیورم ، کلیورم ! . . قاجده اویون ؟ . . (نرمنه یواشجه)

خبر ویر ، او قدر . (طیشاری یه فیرلار) هایدی باقهلم ،

باشلایهلم ! . .



۴ : مجلس

نرمن سرور پاشا اره صره شهبأ

(بعضاً شهبأنك طوپ آتاركن ياخود طوپي آلمق ایچون صحنهك
ارقه جهندن كچدیكى كورونور ، برحركت اویونك تصادفاتنه كوره
مرتبدر ، بعضاً ایكى طوپ اراسنده بر جله سویله مك ایچون صحنه یه
کیرر .)

نرمن

بوکا نه اولدی ؟ چیاغین قیز ! . کویا بن قاریشیورمشم . . .

رجا ایده رم ، پاشا انشته ، بنده بویله بر حال فرق ایتدیكزمی ؟ . .

سرور پاشا

سز می ؟ اصلاً . . . ذاتاً مناسب ده دکل ، مادام که هنوز
قوجه کزک تحت نکاحنده سکز . (آریجه) شیخ افندی
دید که : « بری موفق اوله مایورسه براقک دیکری غلبه
چالسون ! . . » بنده میدانی اوته کنه براقیورم . . . (نرمینه)
مع مافیه سداد سزه قارشى نازکانه داورانه بیلیر .

نرمین

البته ! . . اگر شهباً موفق اوله مایورسه قباحه کنديسنک .
یوزینه کوزینه بولاشدیریور . . .

شهباً دیدن ، بوصوک جمله یی ایشیدیر وباشنی صوقه رق
تشکر ایده رم ! . .

نرمین یوکسک سسله جواب ویرمکه چالیشه رق
فکریمی آچیق سویله یورم . (سرور پاشا) بویله چیلغینلقلرله
اجلالی اونوتدیرمق امیدنده ایسه پک بوش . . .
شهباً صوک کله یی ایشیده رک ، باشنی اوزاتیر ، وجوانی فیولاتیر .
کوریرز ! . .

نرمین سرور پاشایه ، دوام ایده رک
ایشی ترس طرفندن طوتیور . اونى یورمق ، شاشیرتمق ،

بوکالتمق ایسته یور . سداد بک ارتق مکتب چو جفی دکل آ...
 قاعده خارجنده طاشقینقلر ، تربیه مغایر دلیکله تمامیه
 معکوس بر تاثیر حاصل ایدر ... سداد بک ظریف ، نازک ،
 خصوصیه کون کورمش ، دنیای الهمش ، حتی قالبورینی ده
 آصممش ، پیشکین بر آدم ... اوکا ارتق قوشان ، اوینایان ،
 صیچرایان بر عشق دکل قولتوقده اوطوروب اویوقلایان بر
 ازدواج لازم . دهها زیاده حسیاته عائد بر ذوق پیشنده در .
 عمرنده چوق صفا سورنلرک عاقبتی بود کلیدر ؟ کوکل اویالامق .
 اونی آولامق ایچونده حسیات زمیننده دولاشمق ایجاب ایدر .
 (مزیفانه تبسم ایدرک) شهبایه کلنجه حسیات زمیننده بک
 یایاندر .

شهباینه ایشیده رک ، دیبدن

دوام ایت ، دوام ایت ...

نرمین

هله لسانی ! هله اطواری !.. هیچ قادینلغه مخصوص
 اینجه لک وارمی ؟ بلکه بعضاً خوشه کیده بیلیر ، فقط هر حالده
 جدیتله ، حرمتله سویله جک اولانلردن دکل ...

شهبای کنده ، دیبدن

نه لردن دكلش ، نه لردن دكلش ؟ . .

ژاله ديبدن

شهبأ خانم ، نوبت سرك . . .

نرمين سرور پاشايه

سرك فكر كز بودكلى ؟

شهبأ ديبدن ، جواب يتيشديرهرك

سويلنلردن دكلسم بيله ترجيح ايديلنلردنم . . .

نرمين

اونده شهبه وار ؟

شهبأ

بوني سنده پك اعلى بيليرسك .

نرمين

بنمى ؟

شهبأ

خاطريكزه كلير آ ، چكن قيشن . . .

نرمين

بن سنك قسمتكه مانع اولق ايسته مدم اما سن الكه قويدىغم
قوشى قاجيردك .

شهبأ

كورورز ، كورورز ! . .

نرمين

بن كوروله جك شيتى شيمديدن كشف ايديورم .

شهبأ طوپنى آتوب تكرار صحنه يه باشنى اوزاتهرق

يا سكا شعر كوندرونه نه ديرسك ؟ . .

نرمين بوغولورجه سنه

شاعرمى ؟

شهبأ ايلريله يهرك

اوت ، سنك ظن ايتديكك شاعر . اوده بنم ارقه مده ...

نرمين

اينانديره بيليرسهك . . .

شهبأ دها ايلريله يهرك

آي ! اينانميورميسك ؟ اينانمق ايشكه كلز . . .

ژاله

شهبأ خانم ، شهبأ خانم ، نوبت سزك ! . .

شهبأ متهور

بـنـم يـرـمـه سـز اوينا يـكـز . (نـرـمـيـنـه) دـيـمـك اينا نميـورسـك .

(ژاله او يونه قوشـار كن) دور ، دور ، كليـورم . (نـرـمـيـنـه)

دـيـمـك اوـده بـنـم اـرـقـهـمـه دوشـمـه يـور . .

نـرـمـيـن

سـنـكـمـي ؟

شهبأ

او ت ، بـنـم . . .

نـرـمـيـن

نـرـدـه باقـهـلم ؟

شهبأ

كـچـن هـفـتـه ، اـطـهـده . . .

نـرـمـيـن

دـيـكـلـه تـه بـيـلـيـر سـك ! . .

شهبأ

مہتابدہ ، سن ایا نیقولادن قالمق ایستہمہدیک ، بن
یالکز معدنہ دوغری کیدرکن ... سن یالکز قالوبدہ اونی
جلب ایتک ایستہیوردک اما او بالعکس سنی براقدی ...

نرمین

اوت ، اوت ، خبرم وار .

شہبأ

خیر ، خیر ، هیچدہ خبرک یوقدی . بودہ می سنک
اذنکله ؟ ایشتہ کوریورسک یا ! . سنک مزیتلرک وارسہ
بندہدہ کندیمہ کورہ بر طاقم مزیتلر وار . بلکہ سن
دہا شاعرانہسک ، فقط بن دہا جاذبہدارم . . .

مرور پاشا — آرتق مداخلہ ایدہرک

لکن خانملر ، مباحثہ بی براز حدوددن طاشمش
کوریورم .

شہبأ

اساساً سداد بک بنجہ ہا اولمش ہا اولمامش . . .

نرمین

یا بنجہ بشقہ درلومی ؟

شهبأ

بن بچاره اجلالی قورتارمنه چالیشیورم . . .

نرمین

بنمده سویله دکلرم هپ اونی دوشونهرک . . .

شهبأ

اگر سن قاریش-مق ایسته یورسهك ، میدان آچیق ، بن
چکیلیرم .

نرمین

بن هیچ قاریش-مق هوسنده دکلر ، و سنك موفقیتكده
دعا ایدهرم .

شهبأ

او حالده کورورسك .

نرمین

اوت ، کورورم .

شهبأ

های های ! کورورز .

مجلس : ۵

اولکیلر ژاله صکره سداد

ژاله کیره رک

بیتدی !

شهبأ

نه چابوق ؟

ژاله

آلتش بر ، سز قازاندیکز ، شهبأ خانم .

شهبأ

بن دکل ، اصل سز اوینادیکز .

سداد کیره رک

غائب ایتدم (شهبأیه) نه آرزو ایدرسه کز ویرهیم . امر

بیورک .

شهبأ معنیدار

صکره سویلرم . شمدی کیدوب حاضر لائمالی . (نرمینه)

بیاض ! .. (جهراً) قارتاله اینه جکز ، دکلی ؟ .. (کچرکن

ماصه نك اوستنده شكرله مه و سائره يي كوره رك (آء هانيا
بونلري قرعه چكه جكدك .

سداد

قرعه چكيله جك شيلر دكل . ساده جه توزيع ايده يم . .
(سرور پاشايه فندق ويره رك) پاشا ...

سرور پاشا

اوو! .. بونلري قيره جق ديش نرده د ..

سداد (شهبأيه)

سزه جويزله اوزوم ...

نرمين — مستهزيانه آيرهجه

قارين دويوره جق شيلر ...

شهبأ اشتها ايله ييه رك

اوح ! نه اي ! ..


سداد — نرمينه

شكرله مه ...

شهبأ كوله رك آيرهجه

پاپاغان بسلر کبی ...

نرمینله شهبأ و سرور پاشا چیقارلر .



مجلس ۶ !

سداد ژاله

سداد (بردن بره ژاله بی کوره رک اونی اونوتدیغنی فرق ایدر،
و درحال خاطرینه بر لطیفه کلهرک ماصه نک اوستندن مندیلمی آلیر ،
ایچنه بر غزته بوکوب صوقه رق اونی بیک حالنه قور ، و ژاله یه
اوزاتهرق)

سزی اونوتدم ظن ایتهمیک ، فاره خانم ! .. معده کزه
دوقونور دییه آبور جوبور ویرمکدنسه ده سزه ده بر بیک
تقدیم ایدیم ... چوجقلره اک مناسب هدییه ... او قدر کوزل
دکل اما ، ینه قبول ایدیکز . (بیک لارینه طوتوشدیرر)

ژاله محزونانه کوزلرینی ایندیره رک

سداد بک ! ...

بیک اللرندن دوشر

سداد

واه ! واه !... بیک دوشدی . آمان بر یری اینجینمش
اولماسون (یردن آلهرق) اوصلی چوجقلر هیچ اویونجاقلرینی
قیرارمی ؟ . . بو یاپدیغکنز پک فنا ، فاره خانم ...

ژاله بردن بره باشنی قالدیرر ، و ، کوزلرینی تا سدادک یوزینه
دیگر

کمال تأثرله و فرط متانتله

عفو ایدرسکنز افندم ، بنم اسمم ژاله خانمدر .

سداد متحیر

نصل افندم ؟ (درین بر سکوت . بو مدت ظرفنده سداد
ژاله یه باقار ، ژاله هپ او وضعیتده ، کوزلرینی ایندیرمز .
سداد (در حال اکتساب جدیت ایدن برادای حرمتکارایله
باشنی اکه رک) عفو کنزی رجا ایدهرم ، ژاله خانم ...

ژاله ، متین ووقور ، چیقار



مجلس : ۷

سداد صکره نرمین

سداد کندینه کلهرک و پک متعجب

هله ! هله ! باقک شو کوچک فاریه ... عفو ایدرسکیز
 افندم ، بنم اسمم ژاله خانددر . نهده متعظمانه سویلهدی !
 (کولهرك) ها ها ها ! .. فنا حدتلندی .. کیم بیلیر ،
 بکانه قدر عداوتی وارددر ... واقعا ، بنده چوق صاتاشیورم ...
 نهدن عجبا ؟ ... بو یاشده قزقر او قدر تحف اولورکه
 قزاروب بوزاردرلر ، بو رنکلرک اراسندن مینی مینی معصوم
 روحلری کورولور ... (صول طرفندن نرمین کیرر . سداد
 کورور) آل اوته کنی ... بوکاده معصوم دییه میه جکیز یا ...

نرمین اسرار پرور

شهبأ یوراده دکلی ؟

سداد

شهبأ خانم بوراده یوق افندم . برابر چیقما مشمیدیکیز ؟

نرمین

بلکہ اوکا منتظر سکنز دیہہ صوردم .

سداد

بہمی ؟

نرمین

صحیح بکہ میور میدیکز ؟

سداد

خیر ، هیچ بکہ میوردم .

نرمین ایلر یلہ یرک

او حالہ کیرہ یم .

سداد آریجہ

مرا می نہ در عجبا ؟

نرمین یرلشہ رک

شہبأ نہ ای قیزدر ، بوتون معناسیلہ ای ... لیکن او قدر
قانی قاینار و دائماً حرکت ایدر بر مخلوق کہ ہر شیدہ رفاقت
ایتمک ممکن اولمایور . ہلہ ہم کی طاقتسز ، مجالسز اولانلر
ایچون ... ارہ صرہ اوندن قاچوب استراحت ایتمکہ مجبور

اوليورم. ديمك بلكه ميوردىكيز؟ صحيح سويله يورسكيز، دكلى؟
صاينغىزلق ايتىش اولميهيم...

سداد

نه ايچون صاينغىزلق اولسون؟

نرمين

امان سداد بك. بونده صاقلانە جق نه وار. او عادتاً
سزى قوغلايور... سزده كويا فرفنده دكلىش كې داورانيو-
رسكيز. بوده بك فضله... شهبأ لا قىدلەكە لائق دكل،
دوخرۆسى، هيچ اولمازسه بودرجه سنه... براز انصاف.

سداد

هيچ اولمازسه بودرجه سنه!.. (آريجه) رفيقه سنى اى
مدافعه ايدىيور. (جهراً) مسئله درجه يى تعيين ايتمكده...

نرمين

نه قدر مشكل پسندسكيز. بللى كه قادينلر سزه يوز ويره
ويره شمارتمشله. شهبألك كىندينه مخصوص جاذبه سى وار.
بونى انكار ايدە مزسكيز، هله شاقراقلى... شاقراق دكلدر،
وييه مزسكيز آ...

سداد

اوت ، برنوع شاقراقلق ...

نرمین

واقعا کبارانه براداسی وار دییه ادعا ایدم ، برازطامیانه ده ،
لکن بو النده دکل ... موروث برشی ...

سداد

نصل ، موروث ؟ ...

نرمین

اوت ، بابا جهتندن ... باباسی پس پایه لکدن توره مه بر
آدمدی . فقط هر حالده کوزل بر قیز اولدیغنده شبهه یوق .
براز مروت ایدیکزده اعتراف ایدیکز ...

سداد

کوزل ؟ بلکه ...

نرمین

یعنی کوزلدن مقصد متناسب دیمک ایستهرم ... مثلا بوی
برازدهایو کسک اولسه یدی عادتاً متناسب دیمک ممکن اولوردی ...
براز دهابوی ایستردی ، شیمدی براز فضله شیشمان کورونیور ،
براز سودنه حالی ا کدیریور . بوکا چاره بولمق ایچون کندیسنی

صیقور فقط خطا ایدیور ... بر شیش-مان قادین نه قدر
 صیقی کینیرسه او قدر فنا اولور فضله سمن ... اورتهدن
 قالدیر یله ماز ، بر طرفدن صیقینجه دیکر طرفدن میدان چیقار .
 یالکز یرینی دکشیدیرمش اولور ، واکثریت اوزره هیچ
 مناسب اولمایان یرلره طاشه رق انسانی شیشکین بر طولومه بکزه .
 تیر ...

سداد آیریجه

فنا کیریشدی ! .. (جهرآو سرداشانه) دیمک ، وجودینی
 فضله صیقور ؟

نرمین

عادتا پایلایه سییه .. تصور ایدیکز ، بیچاره قیز ...
 (کوله رک) برکون ، خاطریه کلیور .. لکن نقل ایدهمیه جکم ،
 مناسب دکل ...

سداد

سویله یک ، سویله یک ، نه باس وار ؟ ...

نرمین

خیر ، خیر ... سرینی فاش ایتمک مناسب دکل .

سداد

رجا ایدرم. بر کون ؟ ..

نرمین

هایدی سویله میهیم ؟ او قدر فنا برشی ده دکل... بر کون
 ترزی یه کیتمشدک . ای کمزک ده ترزیسی بر در . شهبأ بر دو کون
 انوابی دیکدیرمشدی ، او تجربه ایدیله جکدی ... دیرکن اونی
 صیقمق لازم کلدی . بو ایشی کورمک ایچون شریتلری ایکی
 طرفدن چکن ایکی قیز واردی . . . ایکی قیزک قوتی انجق
 کفایت ایده بیلیردی ... بو مهم عملیات اثناسنده بن ده آرقه سنده
 دوریوردیم .. (کوله رک) هاه هاه ! .. خیر ، خیر ، حقیقه
 سویله میه جکم . بونی حکایه ایتک ای برشی دکل ، وازچیورم ..

سداد مصر

بر کره باشلادیکنز ... سزارقه ده ایدیکنز . نه اولیوردی ؟ ...
 سویله ییک ، سویله ییک ...

نرمین

سزده هیچ مرحمت یوق ...

سداد

نه کور یوردیکز ، باقلم ؟ ..

نرمین نقل ایتدجکه تقلید ایدهرک

شیمدی اونی صیقما یورلرمیدی ؟ هر دفعه سنده ، شریتر
براز کر کینلشدجکه یواش یواش شهبانک اوموزلری یوکسه لیور ،
و قوللری قباره رق یوقاری قالدیور ، عادتاً برر قواب شکلی
آلیوردی . بو هم کولنه جک هم آجینه جق بر حالدی . نهایت
صوک بر غیرت دها اولدی ، شهبأ بو حاله کلدی ...

(کوله رک) هاه ! هاه ! هاه ! (بردن بره توقف ایدوب
و صومورتقان بر حال الهرق) یوق ، یوق ... سز بکابونلری
سویلتمه ملیدیکز ، سز فنا یورکلیسکز ...

سداد کوله رک

هاه ، هاه هاه ! ..

نرمین جدی

عادتاً بیچاره شهبأ ایله اکلنیورم ظن ایدیله جک . حال بوکه
بالعکس بن اوکا حسد ایدهرم . بنم کبی مریض ، مجروح ،
دائماً حساس ، دائماً متأثر بر قادین ، خسته روحلی ، ملول
فکرلی بر مخلوق اوله جغه ... بر هیجله صار صیلان ، سیکیر-

لهن ، بحران کچیرن ، بوتون حیاتی علاجلره مدیون اولان
و محققینه علاج یوزندن اولمکه محکوم بولونان بریچاره ..
بن بالعکس اونک طاشقین صحتی ، دائماً ذوق و صفا ، نشئه
و سرور پیشنده قوشان قوتی ، حسیات ، خیالات ایله مناسبتی
اولمیشی ، حتی درین اویوییشی ، دویمق بیلمه یین اشتهاسنی
قیسقانیورم ... بچاره شهبأ ! ... نه یاپسه ، ین سنزك مزاجکزی
ا کلا یورم ، خیالکزه موافق اولمیه حق ...

سداد متبسم

اوت ، حقیقه ، پک خیال ایله مناسبتی اولماسه کرک ...

نرمین کوله رک

اوت ، او قدر شیشمانقله خیال ، یکدیگرینه برازییکانه
دکلی ؟ بن سزی آ کلا یورم ، سداد پک . سزده بکا بکزه -
یورسکز . فکر مزده ، حسلر مزده بر قرابت وار . عینی
شیلردن نفرت ایدی - ورز . اوت ، اوت ، سنزك روحکزی
عادتا کوزلرمله اوقویورم . سزده شعره مفتونسکز ، حتی
دون کیجه مهتابده سنزكده بنمله برابر آیه عین حسله باقدیغکزه
دقت ایتدم ..

سداد

دوڼ کيجه می ؟

نرمین

اوت ، سده ... شهبأ دها سفرده ایدی .

سداد

ها ، اوت ، اوت ... (آریجه) ساده جه سیغاره اچموردم .

نرمین

نه کوزلدی ، دکلی ؟ ایسترسه کز بو آقشام ینه چیقارز .

سداد

مع الممنونیه ... (آریجه) پک ایلری کیدیورز .

نرمین

سز کله ایکی ارقداش کبی ...

سداد آریجه

ینه احبابلق دائره سنه کیریورز .

نرمین

سز براز چکینکن ، براز قورقاق دوریورسکز . واقعا

حقکز وار ، کیم بیلیر حیاتکزده نه قدر خیانتلره تصادف

ایتمشسکزدرد. سودا عالمنده چوق سویلن چوق الداتیلیر... انسان،
بنده او یله یم، حساس اولنجه پک چابوق یاره لانی، و یاره لر
تکرر ایتدکجه بر احتراز، بر اجتناب حسی اویانمغه باشلار..
حال بو که انسانک روحنی آچماسی، یورکنی دوکمه سی او درجه
طائیدر که... بکا حکایه لر کزی اکلایرسکزد، سزی اولانجه
قلبمله دیکله رم... دیمک قرار، بو کیجه سده...

سداد

اوت، بو کیجه سده! ..

نرمین

ایکی ارقداش کی...

(نرمین تبتیر)

نرمین

قلبمده بر خلجان حس ایتدم. دایما بویله یم، اک اوفق
بر تأثرله...

سداد

هیچمی؟

نرمین

(برایله قلبی طوتار دیگر الیه سدادك الی آلوب قلبنه کوتورمك
وضعیتده ایکن شهبأ کیرر ؛ نرمین کندیسنی طویلار ؛ الی چکر ،
یواشجه سداده)

بو آقشام سددده!..

(شهبأیه باققسزین چیقار ، شهبأ مستهزیانه کوزلریله
تعقیب ایدر) .

سداد

عادتا بر اعتراف عشق ! .. (شهبأی کورر) شیمدی
اوته کی ! .. نه اولیورز، نه اولیورز ، یاربی ! ..



مجلس : ۸

سداد شهبأ

شهبأ مستهزیانه

بر طرفکزدن یاره لاندیکزیا ؟ .

سداد

ياره لایمقی ؟ نعل ؟ کیمک طرفندن ؟..

شهبأ

شیمدی شورادن چیقان نحیف ، مریض خانم طرفندن ،
بایغین نرمین طرفندن ... اوت ، اوت ، صاقلایک ... سزک
اوزر کزده سحرلی ، زهرلی ایکنه لرینی تجربه ایدیوردی .

سداد — آبریمجه

بوده باشلادی ، عین ترانه یی برده بوندن دیکلیه جکزی .

شهبأ

کدرلرندن ، سیکیرلرندن ، علاجلرندن ، شعرلرندن بحث
ایتمشدرمطلقا !.. بن اونک زمزمه سنی بیلیرم . اویقوسزلقلرینی ،
چارپینتیلرینی ده علاوه ایتدی یا !.. آه ! بوقلب ! (نرمینی تقلید
ایده رک) بن اضطراب چکنلرک یاننده دوره مام . درحال
چارپینتیلرم قالقار ، نه زمان بویله برینه تصادف ایتسه هم همان
قاچارم ... (حال طبیعی سیله) همان قاچارمش ، کوردیکز می بر
کره ، شو زواللی ، ضعیف یورکلی قادینی ؟.. دیمک براز ده
کلمکده کجیکسه یدم خسته قلبی یوقلامق اوزره ایدیکز : مشاوره دن
صکره معاینه ... انکار ایتیه ک ، کورددم .

سداد

نه ایچون انکار ایدیم ؟ بوتون مصاحبه سادهجه برمعاینه
طیبه حدودندن ایلری کیتمه مشدی .

شهبأ

دیمك سزه خلعجان قلب اویوننی اوینادی ! باقیکنز ، نصل
چارپیور ؟ .. بالطبع سزده باقدیکنز ، غایت قولای ، اردهده کی
دیوارده غایت اینجه ...

سداد

نرمین خانم ، او قدر جیلز می ؟

شهبأ

جیلز نه دیمك ؟ رجا ایدهرم ، عکسنی ادعا ایتمهك ، بی
برسر فاش ایتمهكه مجبور ایدرسکنز . ایکیمزكده ترزیسی بر ...

سداد

اوتنه کنك عینی ! .. (جهراً و سرداش) بحث ایدهرم که
براثواب تجربه ایدرکن سزده حاضر بولوندیکنز .

شهبأ

اوت ، بر سینه اول ، دها قوجه سیله برابر دی ، بیلیم
اوندن صکره افتراق بلکه براز یارامشدر ... حاضر بولوندم اما
اونک مساعده سیله دکل ، هیچ او یله احتیاطه مغایر شیمی یاپار؟ ..
بن متصل اوداده ایدم ، لکن اثوابی تماماً کوردم ... ایچی
کاملاً دولو ایدی . دولو ! .. هم نصل ؟ هر طرفه پامو قمر
صوقولش ایدی ، صکره ده ترزینک باش قلفه سیله مکالمه سنی
ایشیدییوردم ... « رجا ایده رم ، براز دها دولغونجه اولسون ! »
دیوردی ، باش قلفه اعتراض ایدیور ، « اندامک زک ظرافتی
غائب اوله جق ! .. » دیوردی . او بوینه : « خیر ، خیر ، دها
دولغون ایستهرم ، قوجه مک بویله خوشنه کیدر ... » دییه
تپنیوردی . (کوله رک) هاه هاه هاه ! ..

سداد — کوله رک

هاه هاه هاه ! . (آریجه) بوده ای کیریشیور ! ..

شهبأ — کوله رک

هاه هاه ! .. بیچاره قوجه سی ! .. اوده بر خیالپرستدی .
ا کلاشیلان سز اوکا بکزه یورسکز ... هاه هاه هاه ! .. یاشی
اولدجه ایلریله مش ، صحیفه لرله مکتوب یازمقدن اوشنمه یین ،
کوه زه قادینلردن حظ ایدرسه کز ، سزی شفقله برابر او یاندیروب

کیجه کوزلرینه اویقو کیرمه دیکندن ، صباحه قدر سزی دو-
شوندیکندن بحث ایدن شاعرانه روحلردن ذوق آلیرسه کز
هیچ تردد ایتمه یك ، نرمین خانم حاضر در .

سداد

اوت ، اما شهبأ خانم ، بنده ارتق یاشلیجه بر ارککم .
بوندن صکره حیاتی انحق ساکن و آسوده بر محبته وقف ایده
بیلیرم .

شهبأ

احتیاطکارانه بر سوزا .. لیکن بیلیرمیسکز ، سداد بك ،
سز کیتدکجه مراقی دعوت ایدیورسکز ؟ ..

سداد

غریب ا .. او نه دن ؟ ..

شهبأ

سز هیچ ، اما هیچ فرض ابتدیکم کی بر آدم دکلسکز .
صحیح ، سز تهلهکلی بر آدمیسکز ؟

سداد

سز حکم ایدیکنز .

شهبأ

یوق ، حقیقة ، سز نصل بر آدهسکنز ؟ بونی سویله یویر -
سه کنز آ ! خیر ، خیر ، سویله مه یک ... اوئی سزه بن سویله یه یم .
الکزی بکا ویرک ، باقه یم ...

سداد

الیمی می ؟ ..

شهبأ

معاینه طیبه دکل ، قورقما یک ..

سداد — النی ویره رک

نه ایچون قورقه یم ؟ دها قورقه جق قدر چو که دم ...

شهبأ — الله باقه رق

اوو ! اوو ! تبریک ایدهرم !

سداد

خیردر انشااه ... سبب ؟

شهباء

سبب؟ شوچوقور جفك ايچىندە شوچىزكى يى كورىيور مىسكنز؟.

سداد

اوت ، نه اولمش ؟

شهباء — اوتانىيور مشجە سنە

ايشتە بو ، بر محبته دلالت ايدىيور ، بريسنىك محبته ...
 اويلە بريسنىك كە پك اوزاقلردە دكل .. (نهايت سويلەمكە قرار
 ويرەرك) سزى شاين تبريك بوليورم .

سداد

بالطبع مقصد برقادينك محبتى ...

شهباء

اوت .

سداد

كوزلى ؟

شهباء — متواضعانه

اوت .

سداد

کنجمی ؟

شہا

اوت .

سداد

کبار طاقندمی ؟

شہا

سزك بشقه طاقله نه مناسبتكز اوله بیلیر ؟

سداد

بوده تحف ! نه دن اولماسین ؟

شہا

اوو ! .. دیمك ؟ ..

سداد

خیر ، خیر ، اولاً سویله یك باقم ، بو قادین ...

شهبأ

سز حکایه لر کزی اکلایک ، اولاً ...

سداد

شو قادین ، شو قادین کیم اولیور ، اونی اکلایم ...

شهبأ

بیتدی ، بیتدی ، هپسنی سویله دم ، بشقه سویله به جک شی
قالمادی . سز اکلایک ، باقم ؟ ...

سداد

امان ، نصل اولور ، رجا ایدرم ، هم اکلایه جق نه وار ؟ ..

شهبأ

مثلاً فرض ایدیکز که ، بکا براعتراف یایمق ایسته سه کز نه
دیردیکز ؟ ..

سداد

نه می دیردم ؟ ..

شەبأ

اوت ، اوت ، نه دیردیکز ؟ ..

سداد

غایت سادە ...

شەبأ — (آیریجه)

جسارت ایدەجک . (جهرآ) سویلەیک ، باقەم ...

سداد

سز اولاً او قادینی سویلەیک .

شەبأ

خیر ، خیر ، خیر ...

سداد

شیمدی بورادەمی ، اونی سویلەیک .

شەبأ — (سدادک یوزینە برقهقهه صاوورەرق)

کشف ایدیکز . (درحال جدی برطور الەرق ویورویەرك
آیریجه) بواثوابلرله بودرجه سی کفایت ایدر . شیمدی بیاضلری

کیمه‌لی ، اوندن صکره ایش قولای ! ... (سدادده)
کشف ایدیکنز ! ...



مجلس ۹

سداد صکره یالکنز

ایکینجی پی‌ده آتلاتدی . آه بو قادینلر، هله استانبولک بو
نوع مستثناسنه منسوب اولان قادینلر ... خدعه و فساد ایله
مملو مخلوقلر ... اونلر ایچون بوش دورمق ممکن دکل ،
قارشیلرنده آتیه‌جق هدف یوقسه هیچ اولمازسه دیواره آتهرق
مالک‌لرینی غائب ایتمک ایسته‌مه‌ین نشانجیلر کی دائما قورشونلرینی
صیقورلر . مع مافیہ ، نه نوعدن اولورسه اولسون ، قادین
دکلی ، ینه جاذبه‌دار ... لیکن بونلر حقیقی معناسیله قادیمنی ،
یوقسه کدیمی ، دائما دلیکلرک یاننده بر فارمنک ظهورینه
مترقب ... (بر شی ارایهرق کیرن ژاله‌یی کوردک) ایشته
فارمدن بحث ایدرکن ... نه دیمشدی ، نه دیمشدی ؟ . (اونی

تقلید ایدەرك (عفو ایدرسكنز ، افندم ، بنم اسسم ژاله خانمدر ! .
 شو یارامازه باقك بر كره ! ... فقط نهده كوزل سویله مشدی .
 نه ارایور عجبا ؟ . (تماماً كیرن ژالهیه) ژاله خانم ، برشیمی
 غائب ایتدیكنز ؟ (سكوت . آیریجه) وای بېك شاقاسی حالا
 هضم اولونماش . (جهراً) حالكزه باقیلیرسه بك مهم بر
 شی غائب اولمش غالباً ... بر قماش پارچهسی ، یاخود ، بر
 مجوه ، بلكهده سزك معهود رسم دفتری ..

ژاله غایت متأثر ، ارامقده دوام ایدەرك

جیبیدن دوشمش اوله جق . بوراده اویناركن ...

سداد

اوو ! دیمك او غائب اولدی ، هیچ کیسه نك كورمه سی
 ممکن اولمایان او اسرار محزنی دفترا ! .. وای وای ! .. شو
 حالده تأثر کزی آكلارم ! .. (آیریجه) مطلقاً ایچنده بنم
 كولونج رسملرم واردر . (جهراً) بنده سزه یاردیم ایدەیم می ؟ ..

ژاله متلاشیانه

خیر خیر ! ..

سداد آیویجه

محقق وار ! .. (جهراً) معاوتمی ردمی ایدیورسکز ؟

بکا انفعالیکز وار. (براز مستهزی) کین او قدر ایی بر حس
دکدر ، ژاله خانم ! .. کوریورسکز آ ، ارتق فاره دیمه یورم ،
فاره کله سنی تماماً خذف ایتدم . بیک او یونی ده ملغا ، هر شی
ملغا ... حتی ژاله اسمی ده خوشکزه کیتمزسه او نی ده خذف
ایتمکه حاضرم ... ده ها کلفتله خانم افندی دیرم ... مادام که
لا ابالی کمیدن خط ایتمه یورسکز ... بونی بکا پک درشتانه حس
ایتدیردیکز ، ویردیککز درس کافیدر ، بوندن صکره سزی
قیزدیره جق برشی یاپارسه م ... بوندن صکره ، سزه قارش سزک
موقعکزده ، سزک سنکزده بر خانمه قارش نه یایمق لازمه
اونی یاپه جنم .

(سداد سویلر کن ژاله کوزلرینی ایندیرر ، نهایت اللریله
یوزینی قایار و یواش یواش ، ایچین ایچین اغلایه رق اوطورر)
اوو ! ... بونه دیمک ؟ .. شیمدی ده اغلامقمی چیقدی ...
فاره ! .. یوق ژاله ... ژاله خانم ... نه اولیورسکز ، رجا
ایدرم ؟

ژاله کیتمک ایسته یهرك و كوز ياشلارنى كوسترهمك ايچون
باشنى چویرهرك

هيچ ، هيچ بر شى يوق ! .

سداد اونى طوتهرق

پكى ، اما نه ايچون ، نه ايچون ؟ .

ژاله عيني اويون

خير ، خير ! ... رجا ايدهرم ، بنى براقك .

سداد عيني اويون ، ژالهي اوطوتهرق

يوق ، يوق ، سويلهيك .. مطلقا ا كلامق ايسته يورم ! ...
بيك مسئله سندنمى ؟ بونك بر شاقا اولديغندن امين دكليسكز ؟
بشقه نه اوله بيلير ؟ بونده نه يولده بر معنى تصور ايديله بيلير ؟ .
(ژاله خيچقره رق اغلار) ليكن صحيحدن آغلایور ... فقط
ژاله خانم ، مادام كه مقصد شاقادن بشقه بر شى دكلدى ... هله ،
هله ، يا وروم ، باريشه لم ، رجا ايدهرم . اولمازمى ؟ حقيقه نه
يا په جقمى شاشيردم ... (ماصه نك اوستنده قالمش اولان بىكى
كورور و بردن بره اونى آلوب ويرهرك) ايسته ، ايسته ،
بىكى تىكرار اليكز ، و هر ايش بيتسون ...

ژاله سدادی ایتەرك و آجی بر سسله

اوف . . . یایما یكز . . .

سداد

یوق ، یوق ! . . جدی سویله یورم ، الیکز الیکز . . .
 بونی جییكزه قورسكز ، نه زمان بن سزه جانكزی صیقه جق
 بر شی سویلر سه م اونك اوجنی بكا کوسترسكز . بو آرامزده
 بر اشارت مخصوصه اولور . . . (ژاله نك التفات ایتدیكنی
 كوره ك جدیدله شیر و بیک یواشجه ماصه نك اوستنه قور) فقط
 بنده جدی اوله جغم دییه اوماجی کی دائما صورت آصه مام یا . . .
 (ژاله نك طغیان سرشکی) ینه می ؟ لیکن مادامکه بر دها یا پییه -
 جغم دییه وعد ایدیورم . . .

ژاله کوزلرینی سیله رك و کمال عزم ایله سدادده باقه رق

سداد بك ! رجا ایدرم ، بن سزه نه یایدم ؟ بكا قارشى
 نه یكز وار ؟ نه ایچون بكا بویله سویله یورسكز ؟ . .

سداد

سزه می ؟ بن سزه هر کسه نصل سویلر سه م او یله سویله -

یورم .

ژاله آجی بر معنی ایله

اوت ، هر كسه سويله ديگكز كې ...

سداد

پكې ! نه اولمش ، بونده نه وار ؟

ژاله حرارتله

نه می وار ؟ سزك اغز كز دن هر چيقان كله ده يا بنمله بر
استهزا يا خود بنی تریف قصدی وار . بوده هر دقیقه ، هر
وسيله ایله ... سیرانه چیه جق اولسه ق ، چوجق كې المی
طوتمقدن بحث ایدرسكز ، برشی سويله مکه تشبث ایتسه م درس
تقریر ایدیور اولورم ، بن کوچك بر چوجق حكمنده يم ،
بویم دها سرپيلمه مش بر چوجق بوي ، صاحلرم صاح صوي
اعلانرينك رسمي ، صكره اسمم يوق ، بنی دائما او معهود
لقبله چاغیریورسكز ...

سداد

مادام كه اونی اورته دن قالد یردق .

ژاله

صكره ده بكا بېك ویریورسكز .

سداد

اوندن ده واز کچدک .

ژاله

عادتا بنی استهزالر کزله تعقیب ایدیورسکیز ، بکا اشکنجه
ایدیورسکیز ، بکا عداوتکیز وار ...

سداد رد ایده رک

اوو ! ..

ژاله

اوت ، اوت ، سزه آغیر کلیورم ، هر کسه آغیر کلدیکم
کبی . . . فقط آرتق بندن خلاص اوله جقسکیز . . هم سز
هم اوته کیلر . . . اجالال کلیر کلز ، بن ینه کیدوب مکتبه
قایانه جنم . . .

سداد

نصل ؟ ..

ژاله

تعطیللارده مکتبتک خدمتته باقارم .

ژاله

بن پک اعلی بیلورم که بوراده نه موقعمک، نه یاشمک هیچ
بر اهمیتی یوقدر . بن بوراده معناسز ، حکمسز بر مخلوقدن
عبارتم ، تیتیزانه جک ، خیرپالانه جق بر صیغتی . . .

سداد دها جدی

لکن ژاله خانم ، پک ذوقه موافق اولمادیقنده بنمده متفق
اولدیغم کوچک ، بی معنی بر شاقایه بودرجهده اهمیت ویره رک ...

ژاله

ا کلامیورسکیز ، سداد بک ... بنم بو اوده بر موقعم ، بر
حکم اولمادیغنی کورمیورمیسکیز ؟ اکر بنی بورایه جلب
ایدن اجلال اولماسه حتی بکا تحمل اولونمیه جغنی ا کلامیور-
میسکیز ؟ بن بوراده قاله آلتیه جق ، موجودیتی حس ایدلمیه جک
بر مخلوقدن بشقه نه یم ؟ بن بو اؤک تماماً بیکنه سی یم ؟ بو اؤک
باباسی بنم بابام دکل ، صوکره حقمده کوچک بر محبت بیله حس ایتیه-
دیکنی ، نه قدر چوجق اولورسه م اوله یم ، تماماً بیلورم ،

کورویورم . . آه ! انسان سوله دیکنی حس ایتک ، بونه
 آجیدر ، نه آغیردر ! .. فضله اوله رق دائما تعذیب ایدلک ،
 استهزا اولونمق ، هیچه سایيلمق ... بیلسه کز قلیمده نه درین
 براضطراب وار ! . بشقه بری ایچون ، بشقه وضعیته کوره پک
 بی معنی اولان شیر بکا ، بنم وضعیتمه کوره مادتا ظالمانه ،
 حتی محقرانه بر اهمیت آلیور ... هایدی ، بونی بشقه لری حس
 ایتمه سین ، بو ممکندر ، فقط سز ، سز . . . نصل اولورده
 بونی دویوب آ کلامازسکیز ...

بر قولی ماضیه دایار ، و باشی النک ایچنه آله رق ایچین ایچین
 آغلار

سداد تماماً جدی .

حقکیز وار ، ژاله خانم ! . شیمدی آکلایورم . یکا نه
 معذرتهمده بونی دهها اول آکلایه مامش اولمقدن عسارتدر .
 سزک براز ضرور کزله شاقالاشمق املنده ایکن اصل قلبکیزی
 جریحه دار ایتدیکمه واقف دکلم . شمدی کورویورم که
 شاقالرمده نه حسه ، نه ده ذوقه مطابقت وار . فقط سزی
 اینجیرکن بر قصد ایله حرکت ایتمه دیکمه اعتقاد کز واردر آ...
 سویله پک ، رجا ایده رم سویله پک ، بویله فرض ایتمه یورسکیز آ...

ژاله هب او وضعیتده

خیر ، سداد بك ، خیر ...

سداد

بن سزی او قدر كوچك كوروب طانیدم كه ... حالا
ظن ایدیوردم كه بوچوچق كسوه سی آلتنده قادین روخی
انكشاف ایتمه مشدر ... آ كلا یورمیسكز ؟ ..

ژاله ینه او یله

اوت ، سداد بك .

سداد

شیمدی ندامت ایچنده یم ، کوریورسكز آ ، هم كال
صمیمیتله ، سزه یمین ایده رم . آرتق بكا اغبرار كز كچدی می ؟ ..

ژاله هپ او یله

خیر ، سداد بك .

سداد

هپچ اولماز سه شاقینلغمه بك آغیر بر جزا ترتیب ایتمه ییكزه .

آرتق آغلاماينكز ، رجا ايدەرم ، آغلامقدن واز كچيكز ...
 هم بكا باقايكز ، عفو ايدلديكمي طاتلي سىيا كزده ، وتكرار
 انجلا بولان كوزلر كزده اوقويەيم ... اوت ، اوت ، براز
 مرحمت ايدك ، هايدى باقهلم ، كوچك فاره ...

ژاله — باشنى چو يرمىهر ك سربست ليله ماصەدن بېكى آلوب صالار

سداد

آ ! .. صحيح عفو ايدرسكز ، ژاله خانم ... ايشته
 كور ييورسكز آ ، بوايسته مەدن اوليور . بونك اپچون كو جنمك
 موافق انصاف دكل ...

ژاله يواشجە باشنى قالديروب كوزلرني ديكەرك وآفیر آغیر
 ديمك بكا قارشى بر نفرتكز يوق .

سداد

بىمى ؟ اصل سزك بكا عداوتكز وار ...

ژاله

ديمك بنى كولونج ، آلينگان بولمايورسكز ؟

سداد

نصل ؟

ژاله

اويله يا ، سزه بو قدر ستملر ياپوب شكائتلر ايتديكم
ايچون ... دارلما ديكزمي ؟

سداد

خير ، اصلا ... ته قدر محترز ، نه قدر چكينكن ! . . .
(آيرمجه) هم چوجق هم قادين ... بر خليطه ! ... غايت
شايان مراق بر خليطه ...

ژاله

بيله هم نصل جسارت ايتدمده بوتون او شيلري سزه
سويلهدم. لکن يوره كم ار قدر دولمشدي كه كنديمي ضبط
ايدمه دم ، آ كلايور ميكنز ؟

سداد

بالعكس سزه متشكرم ... حقيقةً نصل اولوب ده فرق
ايمه دم . سزك كي اون سگنر ياشنده بر كننج قيزه . . .

ژاله

اون طقوز ! ..

سداد

اون طقوز می ؟ تحف ! .. بن ظن ای دییوردم که .. نه ایسه ،
 دیمک جرم دها بویوک آرتق اونوته لم ، بونلر کچیدی . بکا
 الکیزی ویرمز میسکیز ؟ (کندی آلهرق) نصل تیتزه یور ؟ ..
 دیمک بن سزی قورقوتیورم ...

ژاله قورقاق

اوت ! ..

سداد

اوت ، اما بن اوپله قورقوله جق بر آدم اولمق ایسته مم .
 بن سزکله دوست اولمق املنده می ! (آریجه) بر احبابلق
 دها ! .. عادتاً بنده بر احبابلق اختصاصی حاصل اولدی ! ..
 (جهراً و متبسم) و مادام که آرتق باریشدق ، شیمدی او مکتبه
 کیدوب قایانمق ، هله مکتبک خدمتنه باقمق مسئله لرینی ، اوچرکین
 بختلری بر طرفه براقه لم ... قرار ویردک ، دکلی . ارتق مکتب
 حکایه سی قاپاندی ...

ژالہ

نصل قاپانیر ؟ .. اورایہ کیتہ یوبدہ نرہیہ کیدہ رم ؟ ...

سداد

نصل ؟ ..

ژالہ محترز

بہی اورادہ سونلر وار ...

سداد

لکن سزی بورادہدہ سونلر وار . بن کندمدن بحثہ

جارت ایدہ میورم ، چونکہ ارامزدہ دوستلق دہا پک تازہ ...
فقط اجلال .

ژالہ

او خ ! .. اجلال یقیندہ طول قالیر ، اولنیر . بہن ؟ ..

سداد

سزده ...

ژاله محترز

بڼې ؟ ... اصلاً ..

سداد

اما يادېکړه ها !.. کویا حیاتی طانیوب او کرڼه دن حیاتدن
واز کچمک ممکن ایش کبی سویله یورسکړ . خصوصیه سړک
قدر حیاته بختیار اولماسی ایجاب ایدن بر قیز ...

ژاله

خیر ، بن بختیار اوله جق بر قیز دکلم .

سداد

نه بیلیرسکړ ؟

ژاله جهراً دوشونیور . شجه سڼه

بن کندي مقدراتمی پک ایی بیلیرم ، سړ نه دیرسه کړ
ده پیکړ ... هم پک اوزون بر وقتدن بری اونی او کړندم ،
تا والده مک وفاتی کونندن بری ... اوزمان ده پک کوچکدم ،
سداد پک ، فقط برشی تماماً خاطر مدد در ... اولمک اوزره

بولونانلر استقبالی کورورلر. سز بوکا اینانیرمیسکیز ؟ ... بنی
اونک یتاغنه اوطورتمشلردی، تایانی باشنه ... صاب صاریدی !...
صاری ! صاری ! .. وسونمک اوزره اولان ایری کوزلریله
بکا باقیوردی، سونوک فقط طاتلی، شفقتلی کوزلریله ... النی
باشمک اوستنه قویمشدی، غیرارادی برحرکتله، آغیر آغیر،
یواش یواش، هیچ دیکشمهین بر اطراد ایله صاحچلریمی
اوقشایوردی ... بکا بر سوز سویله میوردی، فقط کوزلری
بندن ایرمایوردی، و ایچین ایچین، کندی کندینه: «زواللی
چو جق ! .. زواللی چو جق ! ..» دیدیکنی حس ایدیوردم
بو ضعیف، اوزاقلانان، کیتدکجه ده اوزاقلره غائب اولان
برسیدی. نهایت بر زمان کلدی، بوکله لری یالکیز بر نفس،
بر صولوق شکلنده حس ایتدم، الی چارشفک اوستنه دوشدی.
بنی کوتوردیلر. «زواللی چو جق ! ..» اونک صوک سوزی
بو اولدی، اووقدن صکره قاچ کره لر، قاچ کره لر بونی تخطر
ایتدم ... بنی لیلی بر مکتبه آتدیلر، اصل یالکیزلق حسنی
اوراده دویدم. وقت وقت اجلال کلوب بنی کورردی، او قدر
نادرکه ... اوزمان سربست دکلدی بر چوق وظیفه لری، ایشلری،
اکلنجه لری واردی. براز صکره ینه او یله وظیفه لری ایشلری،
اکلنجه لری اوله جق. خیر، خیر، نجه دارالمعلماته قاپانمق، صکره
معلمه اولمقدن بشقه یاپیله جق نه اوله بیلیر !..

سداد کندی کندینه .

زواللی چوجق ؟ .

ژاله

کوردیکزمی ؟

سداد

خیر ، خیر ، هیچ اویله دکل ... نه ایچون قاپانه جقسکیز ؟
نه ایچون معلمه لکه وقف حیات ایده جقسکیز ... او مکتب عالمیری ؟ ..
بن سزی او عالمده ایکی دفعه کورمشم . . .

ژاله

اوچ ! . . .

سداد

اوت ، صحیح ، اوچ دفعه ! .. او یوکسک دیوارلر ،
او ایچ ایچه قاپیلر ، او قرا کلک قوغوشلر . . . یینه اورایه
کیرمک . . . سبب ؟ بر طاقم وسوسه لر ، مبهم فیکر لر . . .
دها سز حیاتک نه سنی کوردیکز ، نه لذتی طاتدیکز ؟ . .

ژاله

کورولان قسمنی آ کلامق ، کورولمه یین قسمنی ده تخمین
ایتمک ایچون کفایت ایتمز می ؟ .. اوخ ! بنجه او قدری یتر...

سداد آریجه

شییمدی قادین روحی اویاندی ! ... فصل قادینلخی
حس اولونیور . (جهراً) ممکن دکل ! .. دوشونک بر
کره ! .. حیاتی بوتون بویله بوغمق ... بشقه بر سبب
وارسه اونی بیلمم . . . باقک ، قیزارییورسکیز ! (آریجه)
مطلق مینی مینی برسر گذشت ! .. بر حکایه سودا... (جهراً)
دیمک بشقه بر سبب وار ؟ ..

ژاله شاشیرمش

خیر ، خیر ، نه سبب اوله جق ؟ ..

سداد

ایشته ، ایشته ، پک اشکار . . . بشقه بر سبب وار ! ..
(آریجه و تبسم ایدهرک) پک تحف ! (جهراً) سویله یک ،
باقه لم ، نه سبب وار ؟ ..

ژاله صیقلمش

چونکه ... چونکه بوتون حیاتی معلمه لکه حصر ایتک
ایچون یمن ایتدک ...

سداد

ایتدک ، دیورسکیز ، کیمکه برابر ...

ژاله

ایکی رفیقهمله برابر ... کهرله سوزان ! ..

سداد

سوزانمی ؟ ... دورک باقیم ، هانیا ، اسمر ، غایت کوزل ،
یوکسک بویلی بر قیز دکلکی ؟ صوک دفعه اجلاله برابر کلدیگمز
زمان قاپیدن باقان ..

ژاله

ساده صوک دفعه می ؟ .. هر دفعه سنده ، یالیکز او دکل
هپسی ... سز کلدیگمز وقت ... سزی هپ طانیرلر .

سداد

بښمې ؟ نړه دن ؟ ..

ژاله - صيقلمش

بيللم ، غالبا آرامزده بر قرابت وار ديه ...

سداد - آبريجه

پك تحف ! ... (جهراً) ديمك او چ كشي يمېن ايتديكنر ؟ ..
نه يولده يمېن ايتديكنر ؟ ..

ژاله

يمېن ايتدك كه ... بنمله ا كلنميه جكسكنر يا ؟ ...

سداد

نه ايچون ا كلنميه ؟ بالعكس پك جديته مراق ايديورم .

ژاله

يمېن [ايتدك كه بو تعطيللري اولرمزده ، حيات ايچنده
كچيرد كدن مسكره تكرار مكته كيرنجه كندي كنديمزي

يوقلايه جغز ؛ اكر حياتى شايان نفرت بولور سهق قطعياً ازدواج
ايمه مك اوزره معلمه لكه عهد ايدى جكز

سداد آريجه

ايشته شيمدى چوجق روحى ميدانه چيقدى . پك ، پك
تحف ! . . (جهراً) حياتى شايان نفرت بولمق ايچون ديمك
ايكى يچق آيلاق بر تجربه كفسايت ايدىيور . پك اوزون بر
تجربه دكل ... پكى ! .. عجبا رفيقه لركز بو كونه قدر نه فكر
حاصل ايتديلر ؟ . . .

ژاله

كهه حالا فكرنده ثابت ! ... صسوك دفعه كوردى كمده
اويله سويله دى ، فقط او قدر سوسليدى كه ...

سداد

ه ؟ . . .

ژاله

سكرده متصل كزمكدن ، اكلنمكدن بحث ايدىيوردي .

اونك ايچون كهر دن براز شهه ايد يورم .

سداد

اوت ، اوت ، اكلاشييلان كهر خانمك يمينه پك اعتماد
جائز اوليه جق . يا سوزان خانم ؟ .. بكا اويله كليور كه ، بيلمم
نهدن ، سوزان خانمده امنيت ايدهميه جكسكز . . .

ژاله پك شاشيرمش

سوزان اولنيور .

سداد

كورد يكرمي بر كره ؟ ..

ژاله

داييسنك او غليله ...

سداد

هپ بويله اولور ؟ ..

ژاله

نشانليسي دها برچو جق ... طوي يكرمي بش ياشنده ! ..

سداد ممنون

دیمک یکرمی بش یاشنده اولانلره چوجق دیورسکمز ؟ . .
 (آریجه) بونه خوش قیزمش ! . . . (جهرآ) دیمک اوکا
 واریور ؟ . .

ژاله

اوت ، دمین کلن مکتوبده ا کلاتیوردی . لکن صحیح ،
 مکتوب نه اولدی ، نرهیه قویدم ؟ . . .

اوستنی ارار

سداد

ژاله خانم ، سزده اونک کبی یاپارسکمز ، سزده اقربادن بر
 چوجق بولورسکمز ، ا کلا یورمیسکمز ؟ . . اوت ، اوت ،
 بیلورم ، سزک نه دای زاده کز ، نه خاله زاده کز وار ، فقط
 البته بر دانه ظهور ایدر ، هیچ شبهه ایتیهک ، هم شمیدین
 خبر ویردیم ، او هر کیمسه ، بن اونی هیچ شایان مرحمت
 بولمایورم ، ا کلا یورمیسکمز ؟ .

ژاله دائما ارايه‌رق

اوده‌می غائب اولدی ؟ ..

سداد

نه آرایورسکیز ؟

ژاله پک متأثر

سوزانک مکتوبنی ! .. اوده غائب اولدی ! .. (بردن
خاطرینه کله‌رک) آ.. دفتریمک ایچنه قویعشدم... امان یاربی!...

سداد

هراق ایتمه‌یک . آرار بولورز .

ژاله قورقه‌رق

خیر ، خیر ، سز آرامایک ، سز آرامایک ...

سداد

نه تحف !.. بوراده برابر آرامقدن نه اولور ؟ ..

ژاله

خیر ، خیر ! .. بکا وعد ایدیکنز ...

سداد

نه ایسترسه کز وعد ایدیورم ، ایشسته ، یمین ایده رم ،
دهاسی وارمی ؟ کوکلکیز راحت اولسون ...

ژاله اطرافنده آرابه رق

آمان یاربی ! .. هم دفتر ، هم مکتوب ... مطلقا طوپ
اوینارکن دوشمش اوله جق ، (خاطرینه کلهرک) بلکهده
اوطه مده در . بر آراق اوطه مه چیقمشدم ... کیدوب باقه یم ...
بکا یمین ایتدیگز .

سداد

اوت ، اوت ...

ژاله یالواره رق

پک رجا ایده رم ! ..

چیقار



مجلس : ۱۰

سداد يالکيز صکره سرور پاشا

سداد

پک تحف ! .. غریب بر خلیطه ! .. فقط بو دفترک
ایچنده نه وار ؟ .. صکره بو معلمه لک هوسی ... مطلقاً بر
حکایه سودا ! .. آه ! بو کنج قیزلر ... عجیباً بو دفتر
نره لرده در ! ...

سرور پاشا سدادی کورمیه رک کیرر النده ژاله نک
دفتری واردر . پک متهیج .

اولور ایش دکل ! .. اینانه میه جم ! .. (دفتری آچه رق
پاقلرینی چویرر) سداد پک آیاقدہ ! .. سداد پک آتده ! ..
سداد پک یاردن آتلار کن ! .. سداد پک مکتبده ! .. والحاصل
سراپا سداد ! .. آه ! بو فاره ! .. دیمک بو قدر دقتله صاقلامه
سنک سببی بو ایمش ... هله مکتوب ؟ .. رفیقہ سنک مکتوبی ..
(کوستره رک) غایت واضح ! .. (قرار ویرمش) مطلقاً بونلری
کورمه لی ... اوت ، کیم بیلیر ... سداد بونی کویا تصادفاً

بوليورر ... مطلقا ! .. لکن نصل ؟ .. (سدادى كورر
ودفتري صاقلایه رق) اوو... (جهرآ) شهبأ خانمى مى بکله يورسك ؟

سداد متخير

خير ، بنمى ؟ .. نه ايچون ؟ ..

سرور پاشا

هانیا قارتاله اينيله جكدى ...

كيزليجه دفتري ماصه نك اوستنه ، سدادك الديونلرينك ياننه قور .
سداد دائما ذهنى مشغول وارايه رق

او قدر اولدىمى ؟

سرور پاشا

الديونلريمى آرايورسك ؟

سداد

خير ..

سرور پاشا دفتري الديونلرك يانندن آلوب باستونك اوستنه
قويه رق

نه خوش بر قیز دكلى ؟

سداد هب ذهنى مشغول آرايه رق

غایت تحف ! .. نه صفوت ، نه معصوميت ! ..

سرور پاشا متعجب

شهبأ خانم مى ؟

سداد

آح! شهبأ خانم دن مى بحث ايديوردى كنز ؟ اوت ، نه خوش
قیز ! ..

سرور پاشا

عجبا باستونكى مى آرايورسك ؟

سداد

خير ، خير ...

سرور پاشا دفترى تـكرار آلىر

قرتاله اينمك ايچون حاضر لانه جقميسك ؟

سداد چىقمق اوزره يورور

اوت ..

سرور پاشا دفترى سدادك كتابىك آلتنه قويهرق

كتابكى آلميه جقميسك ، سداد ؟ اونوتيورسك ...

سداد

كورك چكمك ايچون كتابه پك لزوم يوق ظن ايدهرم ..

هپ آرايهق چيقار



مجلس : ۱۱

سرور پاشا صكره شهباز

سرور پاشا

قابل اوله مادی ... فقط بهمه حال كورمه لی ... هله شو
سينى قیزه باقك بر كره ... اما بكا مكسبك اسكى مدیره سی

سويله مشدى ... (دفتري تكرر سدادك الديونلرينك آلتنه
قور) نه اولورسه اولسون . الديونلرك آلتنه قويورم ، البته
الديونلريكي آله جق يا ! .

شهبأ بياضلر كينمش اوله رق كير .
ايشته بن حاضرم ! . جنك اثوامي كيدم .

سرور پاشا
نه كوزل : ... سزه ده نه ياقيشيديور ! .. سداد شيمدى
چيقدى ، سزك حقه كزده نهلر ، نهلر سويله دى ! ..

شهبأ

اونلري البته بوكاده سويلر . بر كره ترتيب دائره سنده
اويونمي اوينايه يم ده ... ديمك ، نرمين خانم ، ار ككلر بنى سوه مزلر ،
بنمله اولنه مزلر مش ، اويله مي ؟ كورورز ، باقه لم ...

(نرمين كذا بياضلر كينمش اوله رق كير) اوو ! .. بوكاده
نه اوليور ؟ ..

مجلس ۱۲

اولکیر نزمین

شهبأ آیریجه

اوده بیاضلر کیمش ...

سرور پاشا آیریجه اندیشه ناک

اوده بیاض !!

شهبأ

نم اویونمی بوزمق ایچون !!

نزمین صرائیانہ

نمی ؟

شهبأ

نه بایسهك نافله * ایسته دیکک رنکه بویان، هیچ برفانده سی

اولمیه جق • هیچ بر شیک او کنده کجه میه جکسک ، او بنی ،
 بنی آله جق ، حتی یاریندن تیزی یوق ••• براز صکره آچیقجه
 طالب اوله جق ، هله بنی بر کره بوغولمقدن قورتارسین ، آقشامه
 ده نشانلانه جغز •

سرور پاشا شهبائی کوتورمکه چالیشه رق

کلك ، کلك ، شهبأ خانم ! •••

شهبأ

کورورسک ، کورورسک ! ••• (سرور پاشایله چیقار)

مجلس ۱۳

نرمین صکره سداد

نرمین

بوکا تحمل اولونا ماز ! ••• خیر ، خیر ••• دایانه میه جغم ! •••
 البته اجللاک تهله کدن قورتولماسنی ایستهرم ، لکن بو قیزک

ادبسنز لکنه، حیا سنز لغنه ده صبرایدنزه آرتق بردرس ایسته دی ...

سداد کیره رک

بر شیلر بوله مادم !!

نرمین آریجه ، سدادی کوره رک

شیمدی اوکا او کره تیرم !! (جهراً) سداد بک ؟ ..

سداد

افندم !

نرمین

سنزه آرقداس اولالم ، دیمشدم دکلی ؟ ایشته بر آرقداشلق
خدمتی کوستره جکم ...

سداد

نه چابق !!

نرمین

سنز شهبان صاقینکیز !!

سداد

ذاتاً صاقینیورم ...

نرمین

او قدری کافی دکل . او سنزک علیهمکیزده براویون ترتیب

ایندی ، سزی دوزاغه درشوره جک ...

سداد

غریب !... او نصل او یونمش او یله ؟ ..

نرمین

اوت ، براز صکره کورک چکر کن ، بر آراق کویا
موازنه سنی غائب ایده رک د کزه دوشه جک ، بالطبع سزاتلایوب
قورتاره جقسکز ، کویا بایله جق ، بالطبع سز آییلته جقسکز ...

سداد

نه ؟ .. صکره ؟ ...

نرمین

صکره سنی بیلمی یم ؟ .. بن بویله صیغه لره آلیشیق دکلم ...
آ کلاشیلان ایش او قدر ایلری کیدنجه بر دهاکری
دونه من فکرنده ! .. بو آقشام سزکله نشانلانه جقمش ..
حقیقه سزه وارمق نیتیلهمی ، یوقسه سزکله کلنمک مقصدیلهمی ،
اورالرینی بیله مم . شو یاپدیغم شی بک اینی بر شی اولماقله برابر
سزک دوزاغه دوشمه کزه ده وجداناً راضی اوله میورم .

(شهبائی کوره رک) شهبأ ! .. (یالکز سداده) سزه

هیچ بر شی سویله مه دم ! ..

سداد

مستريح اولكيز! ..

نرمين چيقار .



مجلس ۱۴

سداد شهبأ

سداد كندينه كندينه

شهبأ خانم ! آرتق بو سفر چوق اوليورسكز ...

شهبأ

سداد بك ! هانيا بزم قارتال سیرانی ؟ . سزى بگله يورم ...

سداد

بهوده بگله مشسكز ...

شهبأ

نصل ؟

سداد

ديمك ، شهبأ خانم ، سزى بنى دوزاغه دوشورمك هوسنده -

سکیز ، اوله می ؟

شهبأ بردن بره شاشیردرق

نصل ؟ نصل ؟ ..

سداد

اوت ، بکا حدمی بیلدیرمک ایچون اوله جق ، البته ...
 بونی آ کلایورم ، او حالدہ مساعده بیور کزده بندہ مقابله
 سزه بر نصیحت ویرهیم .

شهبأ

نه نصیحتی ؟ ..

سداد

سز تعقیب اولونه جق یولی فنا انتخاب ایتدیگز . بکا اعتماد
 ایدیگز ، شهبأ خانم هر شیئه جرات ایتک ، هر شیئ
 سویله مک ، هر شیئی یایمق ، عادتا تبدیل جنسیت ایدرجه سینه
 قادیلقدن چیقوب ار ککشمک ، خوشه کیده جک بر اصول
 دکلدر .

شهبأ طاشهرق

نرمین فساد قاریشدیردی .

سداد

بز، ارککلر، بودرجه هیجان و غلیان ایله دولوبرقادینک
فکراً بوش اولدیغنه، خوشه کیتمک ایچون بو قدر دوکولوب
صاحیلمه نك آلتنده تهی بر قلب کیزلندیکنه ذاهب اولورز.

شهبأ هپ اویله

کیم بیلیر نه لر سویله دی! ...

سداد

وبویله حقیقت حالد کندیلرینی منسوب اولمادقلری بر صنفه
بکرتیمکه منسوب اولملری لازم کلن صنفنک ده خارجه چیققدقلرینه
حکم ایدهرز ...

شهبأ

لکن نه دیورسکز؟ ..

سداد

آرتق بو صورتله کندیلرینه مدیون اولان حرمت منقطع
اولونجه هر کونا قیمتدن ده ساقط اوله جققلرینه قرار ویررز.

شهبأ بونالهرق

اوو! .. بو نه آغز!.. (زورله کوله رک) هاه هاه هاه!..
(مستهریانه) سزک حرمتکزه لایق کورلمزسه ک بیوک بر زیان

ایتمش اولمایز، سداد بک. . سزک نزمین خانمکزه تشکرایده رم!...
 (متهور) آه! او نزمین! . . (بک متأثر و متهور) بکا
 عمرمده ایلک دفعه اوله رق بویله بر لسان قولانیلیور!...

حدتله چیقار

مجلس : ۱۵

سداد صکره ژاله

سداد

درس بک سرت اولدی، اما تماماً مستحق! .. نه چیلغین
 شیمش! .. فقط حالا دفتری بولا مادیق! .. براز دها آرامالی! ..
 (کتابی اله جق اولور، آلتنده دفتری بولور) وای! .. بو
 نصل شی! .. مکر بوراده ایمش! .. تصادفه باقک... ژاله نک
 دفتری! ... حال بوکه او بیچاره، دفتری نره لرده ارایور. . .
 (دفتری انه آلیر) شونک ایچنده کیلری کورمکی نه قدر مراق
 ایدیورم! . . . (آچه جق اولور، توقف ایدر) ارامیه جغمی
 وعد ایتدم اما، مادام که تصادف خدمت ایتدی... (آچار)

اوو ... بنم رسمم ! یاردن آتلار کن ! ... (بر یاپراق چویرر)
 ینه بن ... شیمدی ده مکتبده ! ... ایشته مکتبک زیارت
 اوداسی ... ۱۷ کانون اول اجلاله برابر کیتدی کمز کون
 اوله جق (عینی اویون) آی ینه بن ! ... ۳۶ نیدسان ! ...
 (عینی اویون) آل بر داها ! ... ۱۲ حزیران ! ... پک
 تحف شی ! ... هله ! هله ! ... (دفتردن بر مکتوب دوشر ،
 یردن آلیر) بونه اوله جق ؟ (بر طرفی اوقویه رق) « بکا
 اینان ! ... او سنی سویور ! ... » ها ! مکتوب ! ...
 ایشته ! ایشته ! .. فرض ایتدی کم حکایه سودا ! .. (تکرار
 اوقور) بکا اینان ! ... او سنی سویور ! ... (دوام ایدرک)
 « مادام که سندن تنفر ایدیور کییدر ، مادام که دائما سکاصاتا
 شیور و سنی اینجیتمکه لزوم کوریور ، بونک معناسی غایت
 آچیقدر . سنی سویور ، ایشته او قدر ! .. » سوزان خانم
 یاشنه کوره غایت منطق صاحبی بر مدقق ! ... (دوام
 ایدرک) بالطبع سندن ده سداد .. (بوغولور جه سنه) سداد می ؟ ..
 ممکن دکل ... (کوزلری تکرار مکتوبده) سداد ؟ ! ..
 (ژالهی کورور) کلیور ! ..

دفترله مکتوبی صاقلار ! غایت شاشیرمش بر حالده در

ژاله اندیشه ناک

بوله مادام ! .. سز بوله بیلدیکزمی ؟

سداد پک متأثر

بن ارامادمکه ...

ژاله

بن تکرار آرایه جغم !...

چیمق اوزره یورور

سداد اونی توقیف ایده رک

نه ایچون صانکه ؟ ... براز اوطورسه کز ا ... باقک
آقشام اولیور ، آرتق بوله مازسکز ، بوندن صکره نه سز
بوله بیلیرسکز نه ده بشقه لری ... کوکلکز راحت اولسون

ژاله

مطلقا بولمق لازم !..

سداد

خیر ، خیر ، براز اوطوریکز ، رجا ایده رم ... آرتق
کوز کورمن درجه ده قارا کلک اولدی (آریجه) سداد !..
(جهراً) هم آرتق دوست اولسادقی ؟ ... شمیدی به قدر
غائب ایتدیکمز وقتی تلافی ایتلی ... شویله طورک ، باقهیم ...

سز کله براز قونوشسه ق اولمازمی ؟ پک رجا ایدهرم ! . .
 (آریجه) مطلقاً بنم ! . . بشقه بر سداد خاطریمه کله یور...
 (جهراً) یکانه تحف باقیورسکز ! . . . نه اولیورسکز ؟ . .

ژاله

حیرت ایدیورم ده . . . سزی بوراده یانی یاشمده ، بنمله
 قونوشور کورمک بکا او قدر غریب کورونیور که . . . دها
 بو صباح . . .

سداد

اوح ! . صباحدن هیچ بحث ایتلم . بو صباح دها
 بربریمزی طانیما یوردق که ... پک چوق زماندن بری طانیشمقله ،
 برابر . . . دوت سنه دن بری ، دکلی ؟ خاطر یکره کلیورمی ؟
 مکتبه ایلاک کلیشم ، غالباً . . هو هو ! ۱۷۰۰ کانون اولده ایدی . .

ژاله

آی ! خاطر یکرده می ؟ ..

سداد

البته ! (آریجه) محقق ! . . (جهراً) ایکنجی سفر ،

۲۶ نیسانده ایدی ، اوچنجیسی ... دورک باقیم . . .

ژاله

۱۲ حزیران ! .. اونی اونوتمشسکز ...

سداد

سزده اونوتمامشسکز ... (آریجه) محقق ! محقق بنم ! ..

ژاله

حتی پک ایی خاطر مده در که بو اوچنجی کلشسکزده ...

سداد

یعنی ۱۲ حزیرانده ...

ژاله

اوت، ۱۲ حزیرانده او قدر صیقیلیر کور و نیوردیکز که مهادیا
اسنه دیکز . حتی سوزانک پک خوشنه کیتمشدی ، بکا « سنک
سداد بک نه قدر سربست ! .. هیچ صیقلمه دن متصل اسنه دی .
یاراشمیورده دکل ... » دیمشدی ..

سداد کیتدجه دها متأثر

دیمک ، مکتبده بنم آدم « سنک سداد بک ... » ایدی ...

ژاله

او دلی قیزلر ، او یله دیرلردی .

سداد

ديك ، بشقه يوقدى

ژاله

بشقه نه ديك ؟ ..

سداد

يعنى مکتبه کلنلر آراسنده بشقه بر سداد بك دها يوقدى ،

اويله مى ؟ ..

ژاله

خير ! ..

سداد آبريجه

آرتق شهبه يه امكان يوق !! .. (جهراً ، مسعود) آه !

سو کيلي چوجق ! ..

ژاله متحير

نه اوليوسکز ، افندم ؟ .

سداد کنديسنى ضبط ايتمک ايسته يه رک

نه مى اوليورم ؟ .. دنيا ده هيچ بکله ننه ين ، اومولمايان اک

طاتلى سوينج ...

ژاله

نه سوينجى ؟ . . .

سداد

نه ايچونمى ؟ . . . چونكه آرتق باريشدق . . . سزده بوكا
سوينه ديكزمى ؟ . . . سويله سه كنز آ سو كيلى ژاله ؟ . .

ژاله كوچوك بر تعجب مسعودانه ايله

آ . . .

سداد

نه وار ؟

ژاله

بكا هيچ بويله خطاب ايتزديكز ؟ . . .

سداد

دارلديكزمى ؟ . .

ژاله

خير ، خير ، ! . . . (آيريجه ، رقتله) سو كيل ژاله ! . .
(جهرآ) نه قدر ابي يوره ككز وار ، سداد بك ! .. ديمك
اجلالك حقى وارمش ، بنم ايچون اساساً كوچك بر توجهكز
اولديغندن بحث ايدردى . . .

شداد

الہی اجالہ ؟ .. کوچوک بر توجہمی ؟ .. بالعکس
 پک بویوک...

ثرالہ متبسم

او حالہ قلبیکزک غایت درین بر گوشہ سنده صاقلار مشسکیز.
 حقیقت حالہ . اوت ، اوت ، انکار ایتہیک ، سز بندن عادتاً
 نفرت ایدردیکز . بعض زمانلر اولوردی کہ نفرتیکز پک زیادہ
 آشکار اولوردی ... بن تماماً آ کلاردم ، واولہ محزون اولوردم کہ ...
 اصل محزون اولیشم ، نہ ایچون بندن نفرت ایتدیککیزی
 آ کلامقلہ برابر چارہ بولہ مایشمدن نشأت ایدردی . بن قورقاق
 واونانغاج ایدم ... انسان قورقاق واونانغاج اولدیمی ؟ بونک
 نہ قدر فنا بر علت اولدیغنه واقف دکلسکزدرد . انسان کویا
 کندی کندیسنک ایچندہ زنجیرلرہ اورولش بر محبوس کیدرہ .
 اورادن قورتولق ، سیکینوب چیقمق ایچون نہ یاپسہ کز
 کویا زنجیرلر کز دہا زیادہ صیقیشیر ، محبسکزک دیوارلری
 دہا زیادہ دارالیر ؛ بر ہیجان صاراریرسکیز ، ہر شیدن
 قیزاریرسکیز . اکر آغز کزدن برسوزچیقسہ کندی سسکزدن
 اورکرسکیز ، صوصہ جق اولورسکیز ، سکوتیکز سزی
 قورقوتور ... بویلہ ، بویلہ ، کاملاً شاشیریرسکیز ، کندی

کنديکزي پيرسکيز ، وقلبکيزدن دیرسکيزکه « واه واه !
نه قدر يازيق ! .. بردرلو کنديمی طانته میورم ، بویله لکله نی
اصلا طانیوب او کره نه میه جک . نی بی معنی بر مخلوق ،
احق بر قیز ظن ایديور . قباحث اونک دکل ، قباحث اصل
بنم ! .. (کنديسني طوپلامق ایسته یه رک) « اونک » دیمکدن
مقصدم ، یعنی ...

سداد

پکی ، فقط انسان بو درجه قورقمق و اوتانمق ایچون
کنديسنيک سوله دیکنه ، کنديسندن خوشلانمادیغنه قناعت
ایتمه لیدر . بوده پک آجی برشیدر .

ژاله

پک آجی ! .. فقط سز بو آجیلغنه نصل واقف اوله بیلیر -
سکيز ؟ سز حیاتیکزده دائماً سولمشسکيز ...

سداد

نره دن بیلورسکيز ؟ ...

ژاله

هر کس دن ایشیده ایشیده او کرندم ... بوراده ده آزمی
کورپیورم . باقسه کز آ ، نصل سزک اطرافکيزی آلیورلر ،

سزك پيشكزي قوغالا يورلر ... بن بو خانملره نه قدر غبطه
ايد يورم ، بيلسه كز . هله نرمين خانه ؟ ..

سداد

نرمين خانمي بندن قيصقانيورميسكز ؟

ژاله برسكوت

خير ، اويله قيصقامج دكل . (بر سكون صافدلانه ايله)
اونك قوجه سي وار .

سداد آريجه ، مېتهج

نه معصوميت ! ..

ژاله

بر شيمي سويلهدم ؟ ..

سداد

خير ، خير ... (آريجه) معصوميت حقيقي اولونجه نه
قدر جاذب برشيدر ! ... (جهراً) ديمك نرمين خانم ؟ ..

ژاله

اوت ، نرمين خانم او درجه سويليدر ، او قدر قاني
صيجا قدر كه ... يا سويله ديكي شيلر ، اونلري سويلر كن سسنگ

حلاوتی ... بن ده اونك كې قونوشمق ایستردم ... كوله -
 جكسكز ، سداد بك ... بن بعضاً اوداده يالكز قالنجه ،
 آينهك قارشيسنه كچرك اونك كې يورومكه ، اونك كې
 اوطورمغه ، اونك كې سويله مكه چالیشیرم .. اودرجه اوزه نیرم كه ..
 لیکن ممکن دكل ... هیچ بکزه ته میورم ... صکره نرمین
 خانم اوقدر کوزل كه ... تنك پنبه لیکی ، دواقلرینك قبر میزینگی ،
 کوزلرینك ایریلکی وباغینلگی ... اوته کی ده اویله یا ... بیلمم كه
 نه یاپیورلرده بویله اولیورلر ؟ ...

سداد

بن اونلرك نه یاپدقلرینی بیلیرم . لیکن سزده کی حیات
 تازه لیکی اونلرك هیچ بر شیئنه غبطه ایتمه كزه حاجت بر اقاماز .
 سز بكا اعتماد ایدیکز . شهبأ حقنده نه دوشونیورسكز ؟ ..

ژاله

شهبأ خانم ؟ .. اونك حقنده فکرم ایی دكل ... او هیچ
 خوشمه کیتمز . واقعا اوده کوزل ، لیکن بن اوکا بکزه مک
 ایستهمم ... اونده اویله بر پرواسزلق ، حتی ، بر حیا سزلق
 وار كه ... صوکرده دائماً سزك آرقه کزده ، عادتاً سزك

اوموز كزده ، سزه يايشيق ... اوندن قطعياً ، اما ذره جه
حظ ايمه يورم .

سداد

او حالده ، اونى قيصقانيورسكيز ، آ كلايورم .

ژاله

شهبایمی ؟ ..

سداد

اويله يا ! . اونك قوجه سی ده يوق ! ..

ژاله دوشونهرک

اوراسی اويله ! . . فقط قيصقانمغه کانجه ... نه ايچون
قيصقانهیم ؟ .. (سدادده ، بردن عقلنه بر فيکر کلهرک) آه ،
ديمك سز اونى سوييورسكيز ؟ ..

سداد بختيار آياغه قالقه رق

ژاله ..

سرور پاشا ايله اجلاک کورولتولری ايشيديلير . ضحنه نك
ديبنده کورونورلر ايجه قارا کلق اولمشدر .

ژاله كذا آياغه قالقهرق قورقش

بريسى كليور . قاچهلم ! . .

صاغدن قاچار

سداد مسعود صولدن قاچهرق

قاچهلم ! قاچهلم ! . . تكرر يكرمى ياشنه كلدم ، اووخ . .
نه كوزل ! نه كوزل !



مجلس ۱۶

سرور پاشا اجلال (دورور و باقنير)

سرور پاشا

هان بويلهجه ، بكا بر خبر ويرمه دن ، كليويريورسك .
نه ايچون شميدى يه قدر بر شى يازمادك ؟ كورو مجهك نه ايسته .
يورمش ؟ سنى بويله اوزون مدت آليقويان سبب نه ايمش ؟ . .
ديك بوتون حياتكى تبديل ايد بيله جك بروقه . . . سويله سهك آ ،
اكال ايتسهك آ . . .

اجلال

دمین بوراده کیم واردی ؟

سرور پاشا

بوراده می ؟ ...

اجلال

اوت ، بوراده بر قادیله بر ارکک واردی ، دمین . . .
کورمه دمی ؟

سرور پاشا

بر ارکک ؟ ...

اجلال

ارکک ، معلوم ... سداد بکدن بشقه اوده ارکک یوق .
لکن قادین کیمدی ؟ همان قاچدیله . دیمک کیزلیجه بولوشمشله ...

سرور پاشا بردن بره عقلنه کلهرک و کندیسنی ضبط ایده میهرک
او حالدیه شهبادر .

اجلال

نصل ، بابا ؟ . .

سرور پاشا

بر شی سویله مه دم ...

اجلال

اوت ، اوت ، ایشیتدم ، شهبادر ، دیدک .. .

سرور پاشا

او یله می دیدم ؟ .. بلکه شهبادر .. سدادله قونوشمشلردر ،
بوده غایت طبیعی دگلی ؟

اجلال

او یله ایسه نه ایچون قاقیشدیلم ؟ مادام که قاقیشدیلم ،
دیمک صاقلانمغه لزوم کوردیلر .

سرور پاشا

ظن ایتیم . هم بزه نه ؟ .. سن حکایه کی یتیر ، بو مهم
وقعه نه ایش ، باقهلم ؟ ..

اجلال

خیر ، بو آقشام سویله مکدن واز کچدم ؟ یارین اکلاتیرم .

سرور پاشا

نه ایچون یارینه براقیورسک ، صانکه ؟ ..

اجلال

رجا ایدرم ، شیجمدی بر شی صورمه ! .. پک رجا

ایدیورم ، باباجغم ، اوستمه وارمه . . شونلره عودتمی خبر
ویرسهك . . .

سرور پاشا

پکی اما بردن بره نه اولدی ؟ بغته خالك دكیشدی . .

اجلال

دیمك ، شهبأ اولدیغندن امینسك ؟ ..

سرور پاشا

لكن بو ساعتده ... اوت ، بشقه کیم اوله بیلیر ؟

اجلال سونجلاه

دوغری ! دوغری ! .. (هیجان ایله اوپهرك) باباجغم !

باباجغم ! . .

سرور پاشا آیریمجه

ینه نه اولیور ؟ .. ایرکن کلدی ، براز دها کچیکمه لیدی ...

سرور پاشا چیقار

اجلال یالکز ، یورویهرك و دوشونهرك

حق و ار بشقه کیم اوله بیلیر ؟ .. (تبسم ایدهرك) شهبأدر ،

مطلقا شهبادر . (توقف ایدهرك و بردن بره حزن ایله مستولی

اوله رق) یا ژاله ایسه ؟ .. (کندیسینی بر صندالیه یه صالیویرر

ودیر سکترینی ماصہیہ دایایوب باشنی اللارینہ آلہرق (خیر، خیر،
 ہلہ آرتق شیمدی ژالہ اولماسیندہ کیم اولورسہ اولسون . . .

اوچنچی پردہ

عین منظرہ

مجلس ۱

سرور پاشا صحنہ اور تہ سندنہ

شہبأ صاغ طرفدہ نرمین صولده طرفدہ

سرور پاشا

ایرکن ایرکن ! . . پک ایرکن کلدی . نرہدن باشلادیسہق .
 ینہ او نقطہ دہیز . . . بزم یکن بکلہ یکیدن باشلایہ جقلر . ہیچ
 شہہ ایتہ یورم ، تکرار باشلایہ جقلر . . . دون بیلہ ، کلیر کلز ،
 او قدر تحفلشدی کہ . . . اولابو حالنہ سبب شیشلیدہ کی
 اقامتیدر دیہ ظن ایتشدم ، کیم بیلیر اورادہ کی کورو محجہ سندنہ
 نہلر اولمشدر دیہ دوشونمشدم . . . تصور ایدیکز بر کرہ ، جریان

حالدن بکا قطعياً معلومات ویرمک ایسته میور . حتی گورمجه سینه
 خصوصی برمکتوب یازدرق حقیقت حالی صورمغه لزوم کوردم...
 جواب بکله یورم ... بو صباح اجلال دها متهیج ... سزده
 اوپله کورمدیکزمی ؟..

نرمین

اجلامی ؟ .. خیر ، بنجه اصل دوندن بری متهیج و ذهنی
 مشغول کورونن سداد بکدر .

سرور پاشا

اوت ، اوده اوپله ... ایشته سویلیورم آ ، ایش یکیدن
 آلوله نیور . آه ! نه مصیبت ! نه مصیبت ! . بر کره اشتشاره
 ایتسهک ، بر چاره بولمغه چالیشسهق ... بنجه تهلیکه هر وقتدن
 دها بویوکدر شیمدی نه یاپه جغز ، سز سویلهیک باقهیم ،
 نرمین خانم ؟ ..

نرمین

آه! پاشا انشته ... بنم هیچ مجالم یوق . بو کیجه ینه کوزلرمی
 یوممادم ... صوک درجه مضطربم ، قلبدن ... بو صباح پک
 شدید ... ذاتاً هیچ بر شیئه قاریشمادم که ... پک اعلی بیلیور-
 سکز آ ...

شهبأ حشمه

یا ؟ ..

سرور پاشا اوکا دونه رق

شهبأ خانم ؟ ..

شهبأ مستهز یانه

خیر ، خیر ، هیچ بر شیلره قاریشامش اولان نرمین خانمه
صورو کیز ، اونک بندن زیاده معلوماتی وارد در .

سرور پاشا نرمینه دونه رک

خانملر ، پک زیاده رجالیده رم ... هیچ بر زمان بودر جهده
اتفاقه محتاح دکلدک .. نرمین خانم ؟ ..

نرمین

شهبأ خانمه اینا نایکزه ، پاشا انشته ... سکوتی مطلقا بر محویت
اثریدر ، غالبیتی صاقلامق ایسته یور ... امنیم دکنر قضاسیله
بایغیناق تأثیرینی حصوله کتیر مشدر . سداد بکله بولوشدیلر ،
کوروشدیلر ، نشانلاندیلر ، بلکه بوکون ایکنندی به دوغری
بزه وداع ایدوب نکاحلرینی قید یرمق اوزره اطه به کچه جکدر ...
هر شی عیناً تخمین و ترتیب ایتدیکی یوله جریان ابد جکدر .

سرور پاشا

اوت ، حقیقه ... دون اقشام بوراده ؟ ..

شهبأ مهور

آخ ! ..

نرمین

اوت ، بولوشلمادی می ؟ ..

شهبأ اوکا باقهرق

اوت بولوشلمادی ...

سرور پاشا

یووق ! .. عفو ایدرسکز . . . مساعده بیورك ...

نرمین

تحف ! .. نه ایچون بولوشلمادی ؟ ..

شهبأ دونهرك

نه ایچون اوله جق ؟ ا کلاشیلان سسداد بکه « احتیاط
ایدیکز ! . . » دیمش اوله جقلر ، ترتیبی خبر ویرنلر ، گوزینی
آچانلر بولونمشدر البته ! .. (عصبی کولر) هاه ! .. هاه ! .. (ضبط
اولونمش بر حدتله) فقط بکا بو اویونی اویسایان یاننه کارقاله جق
ظن ایتمه سین . ایشیدیورمیسک ، نرمین ؟

نرمین

ایشیدیورم ، قرداشم ، اما ا کلابہ میورم ...

شہباً مستہزی

صحیحی ؟

سرور پاشا

مساعده بیورک ، اصل آکلامیان بنم ... دون آقشام
بورادہ بولوشلمادی ، ادعاسندہسکز . فقط درن آقشام بن
بورایہ اجلالہ کلدیکم زمان بورادہ سدادلہ برائر بولونان
کیمدی ؟

شہباً

نصل ؟

نرمین

دون آقشام می ؟

شہباً

بورادہ می ؟

یکدیگریلہ باقی شیرلر

سرور پاشا

اوت ، دون آقشام ، قارا کلقدہ ، یمکدن اول . . . برقادین . . .

نرمین و شهباء
بر قادیمنی؟

تکرار باقیشیرلر

اوت ، بز کیرر کن در حال قاچدی ، پک اعلی کوردم .
شهباء

قادیمنی می؟

سرور پاشا

اوت .

نرمین

برابرمیدیلر؟

سرور پاشا

اوت .

نرمین و شهباء

دیمک کوردیکیز؟

تکرار باقیشیرلر

سرور پاشا

اوت ، اوت ، اوت ، تماماً ... ساده بن دکل اجلالده

کوردی ، کوردک فقط طانیهمادق ...

شہباً بر قہقہہ صالیویرہ رک

ہاہ ! ہاہ ! ہاہ ! .. ماشاہ ! ماشاہ ! .. مکمل ! ..
ہاہ ! .. ہاہ ! .. یوق ، حقیقہ ... پک مکمل ! .. آفرین
نرمین ! ..

نرمین

سکا نہ اولیور ؟ نہ دیورسک ، اللہ عشقنہ ؟ ..

شہباً

نہ دیہ جکم ، غالبیت سندہ ! .. یوق ، یوق ، بوکا حیران
اولدم ؛ تبریک ایدہ رم ، مہارتکدہ شاشارم ! .. (پرمقلمینک
اوجنی اوپر ...) نہ کوزل ! ..

نرمین

نصل ؟ نصل باقیم ؟ ..

شہباً

یوو ! .. آرتق اعتراف ایت ! ..

نرمین مہور

بنی اعتراف ایدہ یم . یعنی سنک یاپدیغکی بنی اوستمہ آلیم ؟ ..
(سرور پاشاہ) او قادیں شہباً ایمش ، پاشا انشتہ ، بشقہ سی
دکل ، ایشک دوغروسی بو ! ..

شەبئاً كذا متهور

يووق !، آرتق چوق اوليور . باقك بن اصل ايشك
دوغروسى سويليەيم ... دون آقشام بورادە بولونان سىندك .
هم اجلاللە ، هم بىللە ، هم ھىكسەلە اكلندك ، مەئادىا ھىمزلە
آلاى ايتدك ، ھىمزلە اويون اوينادك ، يالەكز كندى
ايدەككى بويامغە باقدك ...

نرمين بايغىنلقار كچىرەرك

اوو ! .. بودرجەسنە تھمل اولونماز ...

شەبئاً

ايشك دوغروسى بو ! .. او سداد بىكە كلنجە ، بن دە اوکا
پايى ويرىرم ... (صاغدن چىقار)

نرمين يارى بايغىن

آه ! نەمدەش مخلوق ! ..

سرور پاشا تقرب ايدەرك

نرمين خانم ! كندىكزى طوپلايك ! ..

نرمين بايغىن

طيقانيورم ... اوليورم ! .. بو قادىن بنى اولديرەجك ! ..

سرور پاشا متقيد

نرمين خانم ، آجانم ، لطف ايديكز ...

نرمين بردن بره آياغه فيرلايه رق

خير ، خير ، صوك غلبه اونده قالميه جق ، كورورز ، باقهلم ،

كيم كيمدن اوستون چيغه جق ؟ .. (عجله چيقار)

مجلس ۲

سرور پاشا اجلال صوك مجاسك نهايتنده كلشدر ، نرمينك
چيقيشنه باقار

سرور پاشا نرمينك چيقيشندن صوك درجه متخير ، كنديسني
اونك ترك ايتديكي قولتوغه صاليويرهرك
آ آخ ..

اجلال كيرهرك

آ كلاشيلان بن هر كسي قاجيورم ، پك تحف ! ..

سرور پاشا قيزيني كورهرك آياغه قالقار آيريجه
اجلال ! .

اجلال

اوتاما، نه اوليور ؟ بو اوده بر شيلر وار ، سزك هيكره
نه اوليور ؟..

سرور پاشا صيقلمش

هيچ برشي دكل ، قيزم هيچ برشي دكل !.. سني تامين
ايدهرم كه اورته ده هيچ بر بشقهلق يوق ... يالكيز سن بشقه
درلوسك . عودتكدن بري بر تحف حالك وار . سوبله باقهيم
نهيك وار ؟..

اجلال

نهمي وار ؟ تحفسك ، بياجغم !.. دون آقشام بن بورايه
كلير كلز كيزلي بر ملاقاتك تا اورته سنه دوشرم . بوتون او
اسرار ايله دولو كيدير . هر كسك بكا نظرلرنده بر غرابت ،
عادتا بر صيقلقانلق حس ايدهرم . سوأللر مه آنجق جواب
ويريلير ... يمكنه كيمسه آغزينه بر شي قويماز ، يمكنه صكره
هر كس بر طرفه چكيلير ، زمين سده مهتاب سير ايتمه چيقار ،
شهبأ او طه سنه كيدوب ياپمه نشئه سيله قيزارمش كوزلريني صاقلامغه
لزوم كورر .. اوت ، اوت ... قيزارمش كوزلريني ... بللي كه

آغلامش .. امينم شهبأ آغلامش ... سن ده بوتون كيجه اويويه
مادك .. انكار ائمه ... اوطه كده ضياواردى ...

سرور پاشا

او حالده سن ده اويهمادك ، ديمك ؟ .. (آريجه) كورد -
يگزمى بر كره ؟ ..

اجلال

حتى ژاله بيله بنى كورر كورمن اويله بر هيجه - انله بوينه
آتيلدى كه ... سداد بكه كلنجه ايكي دفعه بكا سوز سويله مك
اوزره تقرب ايتدى ، ايكسنده ده بر شى سويله مه دن چكيلى .
هر كسده بر صاقلانيش ، بندن بر قاقيش وار ؛ يواش سسلرله
قونوشوليور ... هر كس عصبي ، هر كك ذهنى مشغول ،
هر كسده بر اجتناب واحتراز حالى ... صوكرده ده بونلره نه
ايچون شاشديغمى صوريورسك . نهيم وار ؟ ديه بنى استنطاق
ايدوريورسك ؟

سرور پاشا

اوت ، صوريورم ، چونكه بن سنى پك ابي بيليرم . اولاء
نه ايچون كورو مجه كك اوندنه نه جريان ايتديكندن بكامعلومات
ويرميورسك ؟ البته سنى دعوت ايچون مهم بر سبب واردى ؟ .

او مهم وقعه ندر ؟ .. دون بكا نقل ايتك اوزره ايدك ،
 صوكره ، بردن بره صوصيوريدك ؛ آغزندن بر كله آلنه مادی .
 سبب ؟

اجلال

ايسته كورييورميسك ؛ بكا جواب ويره جككه ينه بنی
 استنطاق ايدييورسك . هر شيدن اول ، بوراده نه اولوب
 بيتيور ، اونی آ كلامق ايسته يوزم .

سرور پاشا

هيچ ا.. تأمين ايدهرم كه هيچ بر شی يوق . هم نهدن
 مراق ايدييورسك ؟

اجلال صيقيلمش

نهدنی مراق ايدييورم ؟ .. سبب يوق . ساده بر مراق ،
 آ كلامق ايسته يورم . بن قادين دكلی يم ؟ تجسس بر حس طبیعی
 دكلی ؛ يالکيز آ كلامق آرزوسنده يم . ديمك سن اويله ظن
 ايدييورسك كه او شها ایدی ...

سرور پاشا

شهبأمی ؟

اجلال

اوت ، دون آقشامکی ، سداد بکله برابر اولان ... سن
اوله سویله دک .

سرور پاشا

اوت ، اوله سویله دم ، چونکه اوله ظن ای دیوردم .

اجلال متلاشی

دیمک ، شیمدی اوله ظن ایتیه یورسک ؟

سرور پاشا

بیلیم ، نه سویله یهیم ... آرتق آ کلایه میورم که ... بلکه ده
نرمین خامدی .

اجلال

هر حالده ایکیسندن بری ؟ ...

سرور پاشا

البته !

اجلال

او ایکیسندن بشقه سی اوله ماز ، دیمک ؟ ...

سرور پاشا

محقق . بشقه کیم اوله بیلیر ؟

اجلال

اوت ، حټك وار ، بشقه کیم اوله بیلبر؟ ... برطرفده سداد
 بك ، برطرفدهده بوايكي آشفته قاین بولونجه ... (کولهرك)
 هاه ! هاه ! هاه ! ... ها بری ها اوته کی ... مسساوی ! ...
 تحف ، و (کندی کندینه) ضرر سز بر شی ...

سرور پاشا

قیصقا نایور ، شاشیله جق ایش ! ...

اجلال جدیلشهرك

پکی ، او حالده شهبانك کوزلری نهدن قیزارمش ایدی ؟
 صوکره ژاله ؟ ... سن دوندن بری ژالهی کورمه دکی ؟ ...

سرور پاشا

خیر .

اجلال

محقق ، سداد بکی ده کورمه دک ؟ . .

سرور پاشا

خیر ...

اجلال

ایشته ، ایشته ! ... البته بر سبب وار . بو طبیعی دکل .

ایشی تماماً آ کلامق ایسته یورم ، اونی بورایه کوندرمک ممکن
اولمازمی ؟ ...

سرور پاشا

کیمی ؟

اجلال

سداد بکی ...

سرور پاشا

مناسب اولورمی ؟ نه یاپه جقسک ؟ نه صوره جقسک ؟ ...

اجلال

اوح ؛ رجا ایده رم ، باباجغم ، مستریح اولک ، بکا اعتماد
ایدک ، قیزیکنز مناسب اولمیه جق برشی یاپارمی ؟ ... (سدادی
کوره رک) آ ! .. ایشته حاجت قالمادی . کلیور ... بر آزیالکنز
قالسه م ...

سرور پاشا آیریجه

ایواه ! ... یکیدن باشلایور ... نه یاپمالی ، بیلمم که ...
اجلال (اونی چیقمنغه تشویق ایدرجه سنه اوقشایه رق و بر
یاندن قانییه سوق ایده رک) اوت ، باباجغم ، اوت باباجغم ...

سرور پاشا چيقارکن کندی کندینه
 هر حالده اوناری يالکیز براقق ابي دکل . هپسني بورايه
 کوندرملي بو ايشك ايچندن نصل چيقه جغز ، ياربي ؟ ..

چيقار

مجاس ۳

اجلال سداد

اجلال کندی کندینه
 اکر شهبادن عبارتسه اهميتي يوق ! ... (جهراً) بني مي
 ارايورسکيز ؟

سداد صيقيلمش
 اوت ، يعني ... هر شيدن اول سزدن استعفای قصوره
 مجبورم .

اجلال

نه قصوري ؟

سداد

اوت ، دون آقشام عودتکیزده استفسار خاطره بيله آنجق
وقت بوله بيلدم ، ذهنأ بر دالغينلق ايچنده ايدم ...

اجلال

حالا اويله کورونيورسکيز .

سداد

مسافرت مدتی ابي امرار ايتديکيزيا ؟ ... بردن بره
حرکتکيز ، صکره ايجه بر زمان غيپوبتکيز ، مصرانه سکوتکيز
بزي اندیشه ده بر اقمشدي ... هر حالده ناخوش بر سبب يوقدي ،
دکلی ؟

اجلال

سداد بك ، باقسه کيز آ ، نه ايچون کنديکيزي قاريشيق
جمله لر ايچنده صيقتيلره صوقيورسکيز ؟ بکاسويله يه جک شيلرکيزي
در حال سويله ييويرسه کيز اولمارمي ؟

سداد

سزه سويله يه جک شيلرمي وارمي ؟

اجلال

اوت ، اوت ، آ کلاشيلمايور ظن ايد ييورسه کيز ، الدانيور .

سكز . هايدى ، هايدى ، قرار ويريكز نه دن دالغين ايمشكز ،
 باقم ؟ حق دالغين تعميري ده براز خفيف ! ... مضطرب ،
 پریشان ديسهك دهها موافق دوشهك ...

سداد

اوت ، حقكز وار . ايشته اويله ... مضطربم ، پریشانم .
 آه ! بيلسه كز باشمه نه كلدى ؟

اجلال

براز سزر كي اوليورم .

سداد

خير تخمين ايدم من سكز .. بو ، تصادفلرك اك عجيبى ،
 بكنه نيله ميه جك وقعهلرك اك ... بن ده شيمدى سزك نصيحتلريكزه
 محتاجم . او قدر مشكل بر وضعيتدهيم كه ... ليكن بياهم سزه
 نصل آ كلاته بيله جكم ؟ ...

اجلال

بكامى ؟ نه ايچون آ كلاته ميه جقسكز ؟ پك اعلى بيلير سكز كه
 بكا هر شى سويله نه بيلير ...

سداد

اوت ، دوغرى ... فقط اصل مسئله سزه هپسنى سويله .

یه میه جکم ، عادتاً اوتانیورم ، سزه قارشى اوبله خفیف مشربانه
داوراندم که ... همان همان اعلان عشقه قدر ایلری یه کیدد-
جکدم ... سز بو کستاخلقلری عفو ایتدیگز ، اونلری تماماً
خاطره کزدن سیلدیگز ، اونوتدکز دگلی ؟

اجلال

اوح ! ... بیلمم قادینار بویله شیلری هیچ اونوته بیلیرلرمی ،
فقط هر حالده عفو ایدرلر . بوجهت بویله ! ... صوکره ؟

سداد

بو حرکتمده کنیدی او درجه متهم کوریورم که ... بر
کره سز بنی سوهمزدیگز ، پک اعلی بیلوردم که سومیوردیگز ،
سومکه مأذونده دکلدیگز . بر قادین بر ارکک حقنده بر حس
تمایل دویمایه جق اولورسه بونی ا کلامق زور دکلدر .

اجلال

اوت ، اوت ... شو حالده بشقه بویله دهها بختیار اولدیگز ،
اویله می ؟

سداد

اوت اویله . بو خاطره کلیه جک ، فرض اولونه میه جق ،
خارق العاده بر شی ، فقط بویله ... سز پک انی بیلیرسکزر که

بن کنایسنه فضله پایه ویرن ، بوش امیدلره دوشن احمق‌لردن ده
دکم . ذاتاً سز بيله بنی خیالاته قاپیلغه آلیشدرمادیکز ، بونی
قلبمده بر ایلیشیکه دلالت ایتیمکسزین سـویلیه بیلیرم . لیکن بو
سفر ، بو سفر ، تماماً امینم که ... برقادین بر ارکک حقنده
بر حس تمایل دویه جق اولورسه بونی ا کلامق زور دکدر .

اجلال

اوت ، اوت ... بالطبع سزده اوکا درحال مفتون اولدیکز .

سداد

مفتون ! .. بنمله استهزا ایتمه سه کز اولمازمی ؟ آرتق بن ،
مع التأسف ، درحال انشغال ایده جک بر سنده دکم . ذاتاً
بن ... دلیک بویا ... بن بو قادیله تزوج ایده جک اولسه م ...
بو ، ساده بر ده لیلک دکل حتی احمق ... اوت تزوج ایده جک
اولسه م طاقلا نه بر حرکتده بولنمق ادعاسنده کز میه جکم ..

اجلال آبریمجه

شهبأ ! ..

سداد هیجان ایله کندی کندینه

خیر ، خیر ! .. عاشق دکم .. عاشق اولغه قادر دکم ،
ماذون دکم ! (جهرأ) عشق شبابک اويله خسته لقلرندن

بریدر که سن کماله واصل اولانلر ایچون مهلکدر. ذاتاً بو خسته لغه
 انسان بلا اختیار کرفتار اولماز ، اونی عادتاً ایستیه رک ، اوزله یه رک
 کند ی نفسنه القا ایدر. ایشته بن اونی کند ی کند یه بولا شدی ر.
 مقدن اجتناب ایده حکم ، بوندن امین اولو کز ... متهیج اولمادم ،
 حتی شاشیر مادم دیمک یلان اولور . بو کنج قادین بکا سویلد یکم ی
 احساس ایدنجه ، بر بحر ان کچیر مد یکم ه ، بن عکسنی ادعا یتمه م ،
 سز احتمال ویرمز سکز . بالعکس پک بیوک بر تأثر دویدم ، پک
 پک بیوک ، اعتراف ایدرم ... حقم ده وار ، محقق ، حقم ده
 وار ... اونک کیم اولدیغنی سویله مک موافق دکل . بو او یله بر
 سر که یالکز بکا عاند دکل ... ذاتاً مادام که مسئله ده ده ایلر یلر
 کیده مز . شو حالده هیج بر فائده سی یوق دکل ی ؟ ... آه !
 کیم اولدیغنی خبر آلسه کز ... خیر ، خیر ، پک غریب ! هر کس
 خاطره کله یلیر ، او خاطره کلز . . ساده بنی سومه سی دکل ،
 فقط دنیا ده بر یسنی سویور اولماسی فرض اید یله مز .

اجلال آریجه

او ! ..

سداد

ایشته اصل اونک ایچون شاشیر دم ، پریشان اولدم ... شیمدی

ساکنم ، لیکن دون ! . . (کولهرك) هاه ! هاه ! بنی دون
 کورمه‌لیدی ! . . دوشونک بر کره ، بوتون کیجه کوزمی
 یومادم . . . حقیقهٔ پک تحف ! . . صکره یواش یواش ، بر
 اونی دوشوندم ، بر کندیمی دوشوندم ، دها صکره نوعنی
 تخمین ایده‌بیلجکیز بیک درلو ملاحظاته غرق اولدم . . .
 نهایت او معهود قورق‌قلق تکرار کلدی . شبهه ، او مدهش
 شبهه ، نفس‌مدن شبهه . . . کندی کندیمه : ممکن دکل ، او بنی
 نصل سوه‌بیلیر ؟ بر دقیقه‌لق بر غفلت ، خفت مزاج ایله
 دوشولان بر خطای حس ، بلکه بر نبذه‌ده خوشه کیتمک املی . . .

اجلال آیریمجه

شهبأ ! . . .

سداد

بلکه‌ده یا کلش آ کلامشم ، یا کلش ایشتمشم در . . . واقعا
 سوء تفهمه امکان یوقدی اما . . . بیله‌کیز : بکا سویله‌دی . . .

اجلال

سویله‌دیمی ؟ . . .

سداد

اوت ، سودیکنی سویله‌دی ، یعنی بر قادین نه قدر

سویلیہ بیلیر سہ ...

اجلال

شہباً !

سداد دائاً متہیج و کندی کندیسیلہ استہزا ایدہ رک

لکن ، حقیقہ ، اجلال خانم ، انسان نہ غریب مخلوق
 دکلی ؟ مثلاً بر آدم ... یعنی بن ... دون صباح ، خاطر
 و خیالندہ قطعاً ... او قادیں یوقکن ، حتی بلکہ اوندن بشقہ
 دیگر بر طاقم قادینلر وار کن ... یوق ، دوغروسى ، کیم اولدیغنی
 مزہ سویلہ مہ دیکمہ متأسفم ، سویلہ مہم کورردیکز کہ ... لکن
 سویلہ مہ مہ جکم ، اوت ، سویلہ مہ مہ جکم ... نہ دیوردم ؟ او ذات
 او قادینی اصلاً دوشونمز کن بر تصادف ایکیسنی بر آرایہ کتیریر ،
 او صرہ دہ نہ اولور ، بونی کیمسہ تعیین ایدہ مزہ . او کنہ باقان
 بر سیما ، تیتہ مین بر سس ، دوشن بر قطرہ یاش ، درحال
 سبب اولور ، او ذات یرندن اوینار ، بینی چیغرنندن چیقار ،
 قلبی خیال عالمترینہ اوچار ... قلبدن بحث ایتدم اما برکت ویرسون
 ایش او رادہ یہ کلدی ... سویلہ مہ کز آ ، اجلال خانم ، بونی
 غریب بولما یورمیسکز ؟

اجلال

خير ، غريب بولمايورم ... لکن بوتون بو حکايله لرك ايچنده
بكا تعلق ايدن نه وار ؟ ...

سداد

اوت ، ايشته مسئله نك مهم جهتي ... بنده سزه بوندن
بحث ايدم جگدم . سزه تعلق ايدن نه مي وار ؟ ... باقيكز ،
وضعيت غايت نازك ... ايشته بر كنيج ... يعني بر كوزل
مخلوق كه بكا قارشى لاقيد دكل ... بر طاقم سبيلردن ناشى ...
دها دوغروسى بو بر ساعتلك سرگذشت سودايه سبب بولمق ده
ايجاب ايتمز ... شيمدى نه يايلاق لازمدر . بورادن قاقچمى ؟
يك فنا بر حركت . صوصمقى ؟ بوده ممكن دكل ...

اجلال

يازمالى .

سداد

نه يازمالي ؟

اجلال

ياخود سويلمهلى .

سداد

نه سویله مه لی ؟ .. « خانم ، سز یا کیلدیگز ، بنی سوهمز-
سکز ، بنده سزی سوهمم ... » می دیه لی ؟ .. پک تحف
اولمازمی ؟ .. مع مافیه آ کلا تمق لازم که ... او یله یا ، خطاسنک
ایچنده براققده ممکن دکل. زواللی ..

آغزندن قاچه جق کله بی تلفظ ایتهمک ایچون یوتقونور

اجلال

اوح ! بر کره ایضاحه عزم ابدرسه کز ...

سداد

عزم ایدیورم ، کال صمیمیتله ، یمین ایده رم ، کال جدیتله
عزم ایدیورم ... هیچ اولمازسه امین اولسه یدم ... هله براز
دها ... فقط براقه لم ، قرار ویردم ، تمساماً قرار ویردم ...
بکا بر چاره بولک ، صکره بنی سیر ایدک ...

اجلال

بلکه بنده بر چاره واردر .

سداد

سزده می ؟ نصل ؟

اجلال

يووق ! ... بوقدر چابوق اولماز . اولا بو سعادتك سزى
حقيقة صيقدىغنى بكا اثبات ايدك ، و كندىكزى قورتارمغه
باشلايك ... اوزمان ، اوت اوندن صكره ، چارمسنه باقارز .
(نرمىك كلدىكى كورهرك) ايشتە كليور .

سداد

كيم ؟

اجلال نرمىنى كوسترهرك موضوع بحث اولان ...

سداد نرمىنى كورهرك

ترمين خانم مى ؟

اجلال

او دكلى ؟

سداد

اوو ! .. سزه او دكلدر دىرسهـم نهايت كيم اولدىنى
ميدانه چيقار . حالبوكه ميدانه چيقارمق قطعياً موافق دكل .
بر كره ميدانه چيقسه كيم بيلير بنمله نه قدر اكله نيرسكز .

اجلال كندى كندينه

شبهه يوق شهبأ (جهرأ) اويله اولسون ، فقط مادام كه

اوده محتمل اولانلردن بریدر . صایغیسزلق ایدوبده بوراده
قالمیهیم . سزی یالکیز براقهیم ...

سداد

بنی سراپا بر مرثیه بکزهین بوقادینله یالکیز براقیورسکزه
تشکر ایدهرم . لیکن اول امرده سویلهسه کیز آ ...

اجلال

خیر ، خیر ، صکره ... اولا سز باشلایک ، باشلایک بر
کره ... (آریجه ، کیدرکن) آه ! شهبأ اولسه ...

مجلس ۴

سداد نرمین

نرمین متهور ، کندی کندینه

یا اوپله می ؟ ... اوپله می ؟ اوله جکمی بیاسه ... (سدادی
کوره رک و غایت حلولیکار بر وضع و صدا ایله) ایشته ، کلدیم .

سداد متعجب

سز می ؟ .. لیکن ..

نرمین

پاشا انشتهم سویله دی ، بنمله کوروشمك ایسته یورمشسکز .
صحیح دکللی ؟

سداد

غالبا ، یا گلش اوله جق .

نرمین

یاخود بنم خوشمه کیتسین دیه سویله مشدر . هر حالده
سزك بكا سویله نه جك برشیئکز یوقسه بیله بنم سزدن صوروله جق
شیلرم وار . (بر ماصه یه دایانیر)

سداد

ینه می ؟ (جهراً) نه در افندم ، عجبا ؟ .. (آریجه)
کویا عاشقانه مصاحبات ایله اوغراشه جق ذهن وارمش کی ...
(جهراً) بیورك افندم .

نرمین

شهبأ کله سین دیه باقیورم . زیرا ... یا یق ایسته دیکم
شی او درجه اصول خارجنده در که ... لیکن نه اولورسه
اولسون ... (کوزلری اکرک) سداد بک ، قوجه مدن
بوشانه می ، نه دیرسکز ؟ ..

سداد متعجب

لصل ، افندم ، نصل ؟ ..

نرمين

اوت ، هرکس بکا بوشانمق توصيه ايدييور . دوستلرم ،
 خصملرم ، حتی ايشلرمه باقان آدم بيله ... برکنج قادين ..
 خصوصيله زنکين ده اولورسه ... آکلايورميسکز ؟ (اصرار
 ايده رک) هم غايت زنکين اولورسه ... بو وضعيته او درجه
 مشکلات ايجنده قاليورکه ... سزک رأيکزي آلمق ايستردم ،
 اوت ، بالخاصه سزک رأيکزي .. سداد بک ، بن عمرمده اصلا
 سعادت کورمه دم ... (اوطورر)

سداد آيريجه

اوزون سورمه جک .

نرمين

دها کنج ايکن ، بر چوجق مشابه سنده ايکن بني بر معلول
 اختياره تزويج ايتديلر . بوفدا کارانه قرار بني جذب ايتمشدي .
 بو اختيار خسته ايله تزويج ايدزکن اوکا بر قوجه نظريله دکل ،
 بوني سويله مکه بيله حاجت يوق ، بر بابا صفتيله باقيوردن او ،
 حتی بر بابا بيله اولمغه لياقت کورمه مدي ... ينه اونک حقنده

بر کین دویمادم ، اونی عفو ایتدم . او بکا « سنی بدبخت
ایتدم ! .. » دیدکجه « خیر ! » دیردم ، و کوز یاشلرمی
صاقلارددم ...

سداد آیریمجه صوله بر خطوه آتهرق
بر افسانه فراغت ! .. بر سر گذشت محنت ! ...

نرمین متوحش
شهبامی کلیور ؟ ..

سداد
خیر ، هیچ کیمسه یوق ! ..

نرمین تکرار اوطوره رق

نهایت حالمه مرحمت ایتدی ده ... آیری یاشامق صورتیه
بر قرار ویرلدی ... یوقسه محقق هلاک اولورددم ... ایشته
بونک اوزرینه شهبأ ایله عمر منزی کزوب توزمغه ، کولوب
اوینامغه وقف ایتدک . بو عالمه بنی سواق ایدن شهبأدر ، یوقسه
بو طرز حیاتک بنجه نه بر ذوقی ، نه ده بر قدری وار .
بن یالکزم ، فقط بحر دکلم ، قلبمده محبت احتیاجی دولو ،
فقط بو احتیاجک صرف اولونه جق یری یوق . (کوزلرینی
ایندیره رک) کویا متأهل ، حقیقت حالده اهلی یوق ...

سداد باشنی چویره رک

وای ! ..

نرمین متوحش آیاغه قاقه رق

نصل ؟ شهبأ می ...

سداد

خیر ، خیر ، دوام ایدیکز .

نرمین تکرار اوطوره رق

اوت ، هیچ بر زمان سعادت نه در آ کلامادم . (الی
اوزاته رق) سداد بك ، شو یوزوکی کوریورمیسکز ؟ بو
پارماغمدن اصلا چیقماز ، بو کدرلر مک تسلیسنی ، اضطر ابلر مک
دواسنی محتوی بر طلسم کبیدر . آ کلا یورمیسکز ، بونک
ایچنده او یله بر زهر وارد رک ... قاچ کره اونی دوداقلریمه قدر
کوتوردم .

سداد

اوو ! .. نرمین خانم ! .. بونلر نه فنا فکر لر ! .. (آریجه)
بوتون بو حکایه لری بکا دیگه تمکدن مقصد نه ؟ ..

نرمین

لکن هر دفعه سنده ده تردد ایتدم . قورقاق اولدیغم ایچون

ظن ایتمه یك ! لکن هر دفعه سنده کیزی بر سس ، بنی استقبالدن
امیددن، سعادتن واز کچمه مکه دعوت ایدیوردی . شیمدی یه
قدر هپ بوسسه اطاعت ایتدم، فقط اونک وعدلرینه اینانه رق
دکل ... یالکز بر قاچ کوندن بری ...

سداد صحنه نك دیدنه باقورق

شهبأ خانم ا ...

نرمین

اومی ؟ .. (چیقمنغه داورانیر) صکره ا کال ایدهرم .

سداد اونی توقیف ایدهرک و استعجال ایله

خیر، خیر ، ا کال ایدیکز . بر قاچ کوندن بری ؟ ..

نرمین

اوت ، بر قاچ کوندن بری امید ایتمه باشلادم ..

سداد

تکرار تأهل فکرنده میسکز ؟

نرمین

بلکه ! ..

سداد

یکیدن بر ازدواج ؟ ..

نرمين

اوت .

سداد

ينه معلول بر اختيارله مى ؟ ..

نرمين

يوق آرتق ! .. اونك تجربه سى اولدى بيتدى . بومسئله يي

دوشونكز ، رجا ايدهرم ، سزه پك بيوك اعتمادم وار .

سداد

يا ! ..

نرمين

بكا « بوشان ! » ديك بوشانه يم ، بريسييله « اولن » ديك

اولنه يم ...

سداد

اوت اما كيملكه ؟ ..

نرمين - تبسم ايدهرك

كيملكه مناسب كورسه كز .

سداد مقام تشكرده اكيلهرك

اوو ! .. بونه شرف ! ..

شهبأ دیدن اونلری بوحال ابتسام و ظرافتده کوردهرك

بك كوزل ! ..

نرمین آیریجه

كچ قالدك ! .. شیمدی غلبه بنده ! .. (کیدرکن سدادده)

کیمکله مناسب کورده کز ...

سداد

ديك بن حالا تاهله صالحم ! ..

مجالس : ۵

سداد شهبأ

شهبأ

ديك سرور پاشا بو منظره نی کوسترمك ایچون بنی بورایه

کوندردی ؟

سداد

ینه می ؟ هر کسی بورایه می کوندریور ؟

شهبأ حشین

ذاتاً بنمده سزه سویلیه جك شیلرم واردی .

سداد آبریمجه

بونك ده سويليه جك شيلرى وارمش !

شهبأ

ایکی کلمه ایله بتیره جکم . اصل سزه شونی خبر ویرمه
کلام که ا کر سزه فضله جه التفات ایتدمسه ..

سداد متواضعانه انکار ایدمرك

سزمی ؟ ..

شهبأ

انکاره حاجت یوق . نه دیوردم ؟ ا کر سزه فضله جه
التفات ایتدمسه بو سپارش اوزرینه یاپیلمش بر شیدی . اويله
بر طاقم سبیلر واردی که ... فقط اونلری سويله مك ايجاب
ایتمز ، بن بشقه لرینك سیرینی فاش ایتمك عادتند دكلم . هر حالده
بو قلبدن کلمه بر التفات دکلدی ، آ کلا یورمیسکز ؟ بو ایشده
قلبك هیچ تأثیری یوقدی . هله سزك حق کزده بر میل دویمق
فیکری بر ثانیه بيله ذهنمه اوضر امدی ، بر ثانیه بيله ...

سداد معترضانه

اوو ! ..

شهبأ

بر ثانیه بیله ! ..

سداد

تکراره لزوم یوق .

شهبأ

بر کره بو نقطه تماماً معلوم اولسون ... ایشته ، شیجمدی
سزه ترسنه بر اعلان عشق یابدقدن صکره ... آرتق بیتدی ،
بوراده دورور و بر دهاده یکدیگرمزی کورمیهرك مشرف
اولورز .

سداد اوکا دلالت ایدهرک

یالکیز کندی نفسکیز اپچون سویله ییکیز ؛ شهبأ خانم ..

شهبأ توقف ایدهرک

یا ! ..

سداد آبریمجه

وای ا

شهبأ

مادام که بر کره باشلادم . بر شی دها سویلیهیم ...
و آجیقجه جواب ویریکیز ، صانکه بر ارککله قونوشورکی ...

ذاتاً ا کلاشیلان بن سزك ایچون بر ارکک مشابه‌سند. ایمشم ...

سداد

اوو ! بن بویله بر معنی قصد ایتهدم .

شهبأ

ایتدیگز ، ایتدیگز ... نه ایسه ، شیمدی ایش اوراده
دکل . جواب ویرك ، باقهیم ، نه ایچون نرمین‌ده بن دکل ؟

سداد

نصل ؟

شهبأ

هایدی سزك خوشکزه کیتمه‌مش اولهیم ! .. بوده
او قدر طبیعی دکل آ. بن بشقه یرلرده و بشقه‌لری ایچون بوراده
کندن و شیمدی‌کندن دها چرکین دکل، بو محقق ! .. فقط
هایدی او یله دییهلم ! .. فقط سزك خوشکزه نرمین کیتسین‌ده
بن کیتمه‌یهیم ... نرمینک علاج قوقان ظرافتندن، انسانه حکیم
رچته‌سی چاشنیسنی ویرن صحتندن ممنون اولمق ایچون مطلقاً بشقه
بر سبب اولمالی . ا کر او یونکزی فرق ایتهدم ، ظن ایدیور-
سه کز آلدانیورسکز .

سداد

اویونمی ؟

شهبأ

اوت ، اوت ، کندی کندیکزه دیدیکز که : « هر کس
 شهبأنک اطرافنده دولاشیور، نزمینک ارقه سنده کیسه یوق.
 بن نزمینک اوسستنه دوشهیم ، شهبأبی براقهیم ؛ بوندن بالطبع
 شهبأ متعجب اوله جق، قیزه جق، فتیلی آله جق، بونک اوزرینه،
 کندیلکندن ... » دگلی ؟ اویونکز بوایدی. فقط الداندیکز.
 بن سزکه الای اییدیوردم ، سزده فرقنده دکلدیکز . سزک
 کوزیکزی نزمین آجدی ، بنده اونک ایچون دون آقشام
 طاشدم . سزده اویله بر طوتولدیکز که ...

سداد

طوتولدم می ؟

شهبأ

طوتولدیکز ، هم فنا حاده ... بکاده بر طاقم شیلر
 سویله دیکز ... اوناری عفو ایدم جکم ظن ایتیهک ، هیچ بر
 زمان عفو ایتیه جکم ..

سداد آیربجه

دهشت ! .. (جهراً) بن هیچ بر شی سویله مه دم ظن
ایدیورددم .

شهبأ

اوت ، اوت ، بلکه ده ظاهراً اويله ایدی . لکن بن بوتون
معناسی آ کلادم : قدر و اعتبار ، یوق بیلمم حیثیت و وقار ،
فلان فلان ... عبارده خاطر مده دکل ، فقط پک اعلی حس ایتدم که
سز بنی ... نصل سویلیهیم ؟ ... خفیف بر قادبن مقامنده
طوتمشسکز ... اويله کورینوردیکز که بن هیچ بر شیئی
سویله مکدن چکینمه دیکم ایچون یامقدن ده چکینمم ، فکر -
نده سکز ...

سداد رد ایدهرک

هیچ بر زمان عقلمه کتیرمه دم ،

شهبأ

هایدی ، هایدی ! .. پک اعلی فکریکز او ایدی . اونی
آ کلامق زور دکلدی . بن ده تماميله آ کلادم ، آ کلادم
و آغلادم ..

سداد صیقيلمش

نه دیورسکز ، رجا ایدرم ؟

شېبأ كيندكجه طاشه رق

أوت ، ايشتە عزت نفسمه غلبه ايدەرك اعتراف ايدىيورم كه
 آغلادم ... بىم حقمده هر كس نه ايسترسه اونى دوشونسون،
 بجه مساوى ... بن ناموسكار برقيزم ، باشقه لر ينك رآيى
 حكمسزدر . لىكن ، هر كس ده بويله دكلىدر ؟ باشقه لر ينك
 رآينه بر جهتدن اهميت ده ويريرم ... خير ، خير، اويله دكل ...
 اصل سز سيكيريمه دوقونيورسكيز ، سزك اويله بر كندى
 كنديسندن امين ، هر مشكله قارشى قوى بر آدم حالكزو ار كه ...
 صكره ده بن فكري بوش ، قلبى بوش بر قادين ايشم ...
 سويله دكل ريكزدن اويله آ كلاشيليوردى . ديمك ، بنده قلب
 يوق ، اويله مى ؟ بنده يوق ده نرمينده وار ؟ .. (كولهرك)
 هاه هاه هاه ... فىكر مسئله سنه كلنجه ، بر قادينك فكري
 نه قدر بوش اولسه ار ككلر ككندن دها دولودر . ار ككلر
 حقيقه سرسم شيلر . آچيق سوز ، دوغرى اوز اونلرك
 خوشنه كىتمز ، ايسترلر كه آلداتيلسينلر . بو خصوصده
 دوغرى سى آرزولرينه نائل اوليورلر . بوتون بو سويله ديكىم
 شيلردن صاقين ، باشقه بر معنى چيقارمايك . خير ، خير ، هيچ
 بر معنى چيقارمايك ... يوق ، دوغروسى سداد بك سز اويله

سرت ، اویله سرت داوراندیکز که ...
(گیتدکجه تهیج ایدن شهبأ نهایت آغلار)

سداد

آمان ، شهبأ خانم ، پک محجوب اولیورم ...

شهبأ دائما آغلایه رق و متهور

خیر ، هیچ ده محجوب اولمایورسکز . حالا او مغرور
ومستیزی طور کز ، او سیکیریمه دوقونان ادا کز اوستکزده!..
آ کلا یورمیسکز ، بکا او لسانی قوللاندیفکزه فنا ایتدیکز ؟
اویونکزه هیچ مهارت کوسترمدیکز . شیمدی سزه سویلیه
بیلیرم ، اکر ماهرانه داورانسه یدیکز ... حقیقه بعض زمانلر
اولدی که ، بن سپارش اوزرینه اوینادیغم اویونده ، جریان
قابله رق ... اوت ، کیم بیلیر ، بلکه ... لکن آرتق هپسی
بیتدی ، شیمدی اوندن پک اوزاقدیمیز . شیمدی اویله سیکیریمه
دوقونیورسکز که ... بو کیجه اونی دوشونیوردم ... کوزلریمه
اویقو کیرمه دی . دوندن بری هپ ذهنمک ایچنده بو ...
سزک حقکزه دویدیغم شیئی عمرمده کیسه ایچون حس
ایتمدم . ذاتاً اصل بونک ایچون بورادن کیدیورم . ایشته
یوزیکزه قارشی سویله یورم ، سزی بوندنصکره نه کورمک

نه ایشیتیمك المده دكل . سزك بولونديغكز یرده بولونمغه مقتدر
اوله میه جغم . سزدن نفرت ایدیورم، نفرت . نفرت ایدیورم .

بوسبوتون آغلار

سداد مسرور، الی آلهرق

آه !.. شهبأ خانم !..

شهبأ متعجب

نه وار ؟ نه اولیورسكز ؟..

سداد

آه ! بیلسه كز نه بختیارم !..

شهبأ هپ تعجبه

بختیارمی ؟

سداد

یوق ، حقیقهٔ بندن حالا بو طرزده نفرت ایدیله بیله جگنه
احتمال ویرمزدم .

شهبأ مستهزی

ماشأ الله !.. چوق قناعت صاحیبسكز . (اجلالی كوره رك)
اجلال کلیور !.. الی براقك . . . بنی كورمه سنی ایسته مم .
کیم بیلیر ، یوزم کوزم نه قدر قیزارمشدر !..

سداد

تشکر ایدہرم ، شہباً خانم ، تشکر ایدہرم .

شہباً

المی براقك ؛ دیورم !.. (چیقار کن) حقیقہ چوق
قناعت صاحبی !..

چیقار

سداد ممنون

دیمك ، حالا سویله بیلیر بر ارکك ایمشم !..



مجلس ۶

سداد اجلال

اجلال مجلسك صوکنی کورمشدر مسرورانہ آریجه

تمام !.. ایشته او ایمش !..

سداد غایت متہیج

آرتق شسبهیه محل یوق ! (اجلالی کوردرک) آہ !
سزمیسکنز ؟ ..

اجلال

عفواید رسکز، سزی راحتسز ایتدم . پدرمی ارایورددم ده! ..
 بی ایسته تمش ، لیکن زرده اولدیغنی بیله میورم .

سداد

آه ! اجلال خانم ، باشمه کلنلری بیله کز ...

اجلال متبسمانه

ینه می ؟ ..

سداد

یوق ، رجا ایدرم ، اوبله تبسم ایتدییك . آرتق بونك ده
 جدیتنده شبهه ایدیله مز . آه ، بیله کز ، نه قدر متأثرم ! ..
 تمامیله ، بوتون معناسیله متأثرم ...

اجلال متبسمانه

هپ اوتأثر ، دیمك ؟

سداد

هپ او ، فقط یوز قات فضله ... دیمك ، اجلال خانم بن
 حالا سویله ییلیر مشم ...

اجلال

اوت اما بونی بکا صـورمغه نه حاجت وار ؟ دمین بورادم

سزہ اثبات ایدن بری واردی .

سداد

آہ ! دمیندن بری نہ اولدی ، بیلسه کز ... شیمدی بردکل
ایکی ...

اجلال متعجب

نصل ایکیمی ؟

سداد

اوت ، ایکیلشدی . یعنی ، دها دوغروسی ، اوچ !
آ کلا یورمیسگز ؟

سداد

بونلکه او گونیورم ، ظن اتمه یك ! البته ایشک ایچنده
رنجیده اولان عزت نفسلر ، یکدیگرینی کوره رک قیزیشان
رقابتله ، حتی مسابقه یه قالدیشان قادیقلرده اجرای تاثیر اتمه ش
اونلرک ذهنلرینی چلمشدر ... ذاتاً بونلر اوتہ کی قدر کنجده
دکلر ، اوخ ! ... اراده بویوک فرق وار .

اجلال اندیشناک

اوتہ کی نہ دیمک ؟

سداد

مع مافیه ، بوتون بو تعداد ایتدیکم شیلرله برابر اورتده
بر حقیقت وار . دیمک سویلیورم . شو حالده اونکده بنی
سویهیله جکهنه قناعت ایتک بر جنت صایلمیه جق مادام که دیگرلری
سویورلر ...

اجلال

دیگرلری نه دیمک ؟ اونلر کیم اولیور ؟ ..

سداد

آرتق شیمدی ایشی آ کلادیکنز .

اجلال عصی و تبسم ایتکه چالیشه رق

خیر ، آ کلامیورم ، عین ایده رم که آ کلامادم ... رجا
ایده رم ، سداد بک ، بنی بکله تمهیک ، ایشته مراق ایدیورم ..
اوته کیلر دیدیککنز کیملر ؟ سویله ییککنز .

سداد

ایشته نرمین خانمله شهبأ خانم ! ایکیسی ده ...

اجلال

او حالده اوچنجیسی ؟ مادام که اوچ کیشی دیورسکنز ،
اصل سزی سون ؟ ..

سداد

هېسى سوييور .

اجلال

اوت ، اما سزك سوديكـكـز ...

سداد

بن اونی سوميورم که ! سزه سويله مدم می ؟

اجلال عذاب ايچنده

اوح ! سداد بك ، رجا ايده رم ، بو معما يتيشير . سوزی
آچيقجه اكال ايديكـكـز . اوچنجیسی کیم اوليور ؟

سداد

ديكر ايكيسنك اسملرينی خبر ویرمکه اوچنجیسی ده خبر
ویرمش اولمايورمییم ؟ اوچدن ايکی چيقنجه ...

اجلال بر صيحه یی ضبط ايدرك

ژاله می ؟ ..

سداد

اوت ، ايشته او ، ارتق ایش ميدانه چيقدی . ژاله !
هنوز دون برهيچ ، بی معنی بر چوجوق حکمنده عدايتديکم ،
سزك بکا تزويج ايتمك ايسته يوبده بنم موافقت ايله مديکم ژاله .

اجلال آیر بجه محمول اضطراب
ژاله ایمش!..

سداد

نهایت اھمال ابدیلہ جک بو چو جوق بندن او یلہ بر انتقام
آلدی، بکا او یلہ بر غلبہ چالدی کہ... سزک حق کز وارمش،
بو چو جغک ایچندہ بر قادین موجودمش. نیم ھتوز بر نوعی
دھا طانیوب او کر نہ مدیکم بر قادین، بجه مجهول اولان صاف،
زیه، کزیدہ بر عشقہ قادر بر قادین. آہ اجلال خانم، بیلسہ
کز، اون یاش دھا کنج اولما دیغمہ نصل متأسفم!..

اجلال

بو بی رحمانہ بر مطالعہ!..

سداد آ کلامیہ رق

نصل؟ نہ ایچون؟..

اجلال

اوت، دیکر لری حقندہ بی رحمانہ...

سداد

دیکر لری ایچونمی؟

اجلال

اوت ، سزی سون دیگر قادینلر ایچون ...

سداد

او خ ...! دیگر قادینلر ، اونلره نه اولدی صانکه ؟ .. بن
 بو غیر منتظر وقعه سودا قارشیسینده لاقید قالمغه تمام اقرار اویرمشکن کلوب
 بنی تشویش ایده جک نه واردی ؟ حالا قرار مده نایتم یا ... لکن
 بر کره فراغت کوسترمشدم ، آجی ، آغیر بر فراغت ...
 سزدن کتمه لزوم کورم ... حقیقه بو قرار بر حرکت فدا
 کارانه دکلیدر ؟ هم حقیقت حالده افراطکارانه بر اندیشهیه ،
 حتی طفلانه بر ملاحظهیه استناداً کوسترلمش بر فراغت ..
 شیمدی بونک بوش بر حسدن تولد ایتدیکنه قائم ، حقیقه ،
 بر ارکک ، بن یاشده ، یتیمش صاییلماز . انسانک اصل یاشی
 کورونن یاشیدر . صانکه اختیارلق سنه ایلمیدر ؟ حتی بن
 یکر میسنده کنجیلر بیلیرم که ... (برون بره توقف ایده رک
 و کوله رک) هاه ! هاه ! هاه ؟ کوریور میسکز ؟ سویله دکاریمی
 ایشید یور میسکز ؟ باقک کچن کون بشقه لرنده شایان استهزا
 بوله رق کولدیکم تسلیتکار جمله لری شیمدی بن کندی لهمده
 استعمال ایدیورم ، استعمال ایدیورم و بونلره اینانمغه چالیشیورم .

حتی اینانیورم !.. آه ! اجلال خانم ، انسان نه قدر ضعیف
واونك اوزرنده عشقك قوتی نه قدر بویوك، نه قدر بویوكدر !

اجلال كندی كندینه محزونانه

بو دائماً بویله دكل !. (سدا ده) ديمك اونى جداً سوييور-

سكز ؟

سداد

بئى ؟ لىكن بر ساعتدن برى سزه عكسنى اثبات ایچون
نفس تو كتیورم .

اجلال

یا او ؟.. اونك سزى سوديكنه امينميسكز ؟

سداد

امينمى ؟ آه ! امين اوله بيلسه هم !.. اويله ظن ايتديكنه
امينم ، فقط حقیقه امين اولمغه كنجه ؟.. حتی بوندن كندیسى
بيله امينميدر ؟.. (جينندن ژاله نك دفترى چيقارده رق) مثلاً
آله رسم دفترى وار ... باقك ، بر كره كوزدن كچيرك ...
هر شى آیرى آیرى بر برهان ! ... صكره مکتوب ...
(مکتوبى ويرر) لىكن ژاله او قدر چوجق كه ... بندن
بشقه كيمسه يى كورمه مش ... ا كثریت اوزرده ايلك عشق

صوك بېكدر ... ايشته اصل ترددیه سببده بو ... واقعا ،
 ترددده ایتهمیورم یا ... (عزم ایله) اونك تجربه سزلکندن ،
 خطاسندن ، چو جلقلغندن استفاده ایتمك ایسته میورم ، استفاده
 ایتهمکه مجبورم . اوت ، استفاده حقنه مالک دکلم ، سزده
 سویله یورسکمز ، بن ناموسکار بر آدم ... بوندن استفادهیه
 تشبث بر فنا حرکت ، بر جنت دیمك اولور . خیر ، خیر ،
 بوندن صکره ... بو مسئلهده اجتناب و احتراز ، عقل سلیمك
 مقتضای حکمیدر ، اوت ، عقل سلیمك ... لیکن نه یامالی ؟

اجلال

او حالده بن قونوشیم ! (دفتری جینه قور)

سداد

سز می ؟

اجلال

اوت .

سداد

سز او یله می ؟ (براز غیر طبیعی بر کولوشله) هاه ! هاه !

هاه ! بو جداً غریب ! ..

اجلال

نه ایچون غریب اولسون ؟

سداد

نصل ؟ بر هفته اول ، بنی بهمه حال اونیکله تزویج ایتک
ایسته یوردیکز . عندکزده او بنم ایچون یارادلمش بر قیزدی ،
باشلامزده بیله تناسب بولیوردیکز . حال بوکه بوکون ... هر
حالده بن بر هفته ایچنده دهها یاشلانمادم ، یاخود ، او دهها
کنجاشمه دی یا بن حالا اوتوز ... اوتوز بشنده ایم ...

اجلال تبسم ایتکه چالیشه رق

اوتوز بش ! .. حقیقه دهها فضله یاشلانمادمش سکن .

سداد

اوده اون طقوزندن آز دکل .

اجلال عینی اویون

اون طقوز ! حقیقه اوده دهها فضله کنجاشمه مش ...

سداد کوله رک

پک اعلی ! شو حالده ؟ .. هاه ! هاه ! هاه ! ... یووق ،

حقیقه شو قادینلری ا کلامق ممکن دکل ! ..

اجلال سداده اوزونجه باقار وبر مدت سكوئدن صكره
ديمك اوزنكله قونوشمقلمه راضي دكلسكز .

سداد

خير ، قونوشك ، آنجق ...

اجلال

ايشته بوده كليور . بزي يالكز براقيرميسكز ؟

سداد

نه ديه جكسكز ؟ .

اجلال

نه لازمه اونى سويليه جكم . مستريح اولوكز .

اونى صحنه خارجه چيقارمغه باشلار

سداد صحنه نك ديبندن باقهرق

اوت ، اوت ، زواللى چوجق ! .. تماميله ايضاح ايديكز ،
اولمازمى ؟ قراره سبب منحصرأ بر حس فراغتدر ، ساده جه
بر حس فراغت ...

اجلال

اوت .

سداد

بو قرار بنجه پك بيوك بر اثر فدا كاريدر .

اجلال

اوت .

سداد

صوك درجه بويوك ... سبب اوني سومه مك دكل ...

اجلال يواشجه ايتهايته چيقارمغه چاليشير

اوت اما ايكييمزي بر آراده كورمه ملي .

سداد عودت ايدهرك

ياشجه اوندن ايلريده اولديغمه دائر بر سوز سويلكه حاجت
يوق دكلي ؟ دهها زياده مشرب اختلافندن ، عادت فرقندن
بحث ايدرسكز .

اجلال ايتهرك

قورقمايكز ا ...

سداد عودت ايدهرك

و يواش يواش ، نوازشله ملايمتله ، سزه مخصوص اولان
حلاوتله سويلرسكز . بيچاره چوجغه اضطراب ويره چك طرزده
دكل ... بلكه بالذات سويله مك دهها مناسب اولوردي اما ...

خير ، خير ، سزك سويله مه كزدها اي اوله جق . آه ! بيلسه كز
بن بو چوجنى سومك اوزره ايدم . آه ، اوت ! بر خطوه
دها ، درحال سومش اوليوردم . سزه يمئن ايدهرم كه سو-
يوردم !..

اجلال يواشجه طيشارى اينهرك
سداد بك ، رجا ايدهرم ...

سداد

كيديورم ! كيديورم ! (ديبدن ژاله يه باقه رق) احتمال كه
شوكن بر بي مثيل سعادتدر ، بر سعادت ده بن المى اوز اتوب
آله جق يرده بالعكس كچه سنه مساعده ايديورم . فقط نه ياپه لم ؟
عقل سليم بويله حكيم ايديور . عقل سليم ! ... (اجلالك
صبر سزجه بر حركتى) كيديورم ... (دونهرك) هر حاله
فضله ياشدن بحته لزوم يوق ، دكلى ؟ (اجلالك صبر سزجه
بر حركتى ده) ايسته ، ايسته ، كيديورم .

چيقار



مجلس ۷

اجلال ژاله

اجلال او طورور دوشونور . ژاله او نی بو حالدۀ کورونجه
توقف ایدر و خفیفجه او کسورور . اجلال باشنی قالیرر .

ژاله

بنمله قونوشمقی ایسته یورسک ؟ بنی باباک کوندردی ...

اجلال متعجب

بابام می ؟ .. نه ایسه ... بنده ، ذاتاً سنکله قونوشمقی
ایسته یوردم . کل ، چوجغم ، شویله تا یانمه کل ! ..

ژاله اوکا تقرب ایدر .. ایا قده در . بر مدت سکوت . بو
مدت اشناسنده یکدیگریله باقی شیرلر .

ژاله

بکا نه تحف باقیورسک ! ... بتک بکزک کول کی ... نه-
یک وار ؟

اجلال

دېمك سن اونی سویورسك ؟

ژاله قوجاغنه آتيلمق ایستر

آه ! اجلال ! .. اجلال ! ..

اجلال اونی تبعید ایدهرک

دېمك ، بویله ؟ ..

ژاله

سكا کیم سویلهدی ؟ ..

اجلال

هیچ کیمسه ... دون اقشام سزی بوراده برابر کوردم ،
او قدر . . حتی بونی سن بکا سویلهملیدك . بنم سكا اولان
محبتیم سنك بکا بو اعتمادی کوسستمککه کافی گلهلیدی . فنا
ایتدك ...

ژاله قیرغین

بکا نه قدر سرت سویله یورسك .

اجلال

اوت ، حقك وار ، چوجغم ، عفو ایت . فقط نه ایچون

بكا هيچ بر شى سويلەمدىك ؟ فنا ايتىدك دىكلى ؟ اكر سويلەمش
اولسەيدىك ھركس ايچون اىي اولوردى .

ژالە

اوت ، اما بن دە بونى بىلمەيوردىم كە ، اجلال ... نصل
خاطره كتيरे بيليردىم ؟ او بندن نفرت ايدييور كييدى ، بن دە
اوندىن نفرت ايدييورم ظننە ايدىم . بكا قارشى اويلە مرحمتسزجە
داورانيردى كە ... بعضاً كندى كندىمە : « ذهنم اونىكە فضلە
مشغول اوليور . نە ايچون بويلە اونىكە مشغول اوليورم ؟ »
ديردىم . فقط اوني دوشونوركن دائماً محزونانە ، مأیوسانە ،
دوشونديكم ايچون اساسى كورەميوردىم ، بالعكس .. سىن دە
ھى وقت بى تسلى ايتىك ايچون اوندىن بحث ايدەردىك ، دائماً
اوني مدح ايدردىك . يوق پىك ايى ايمش ، قلباً بنم ايچون
بر دوست ايمش ، بشقە ار كىكلرە بىكزە مزىمش ، دھا دھا ،
بيليرمى بىم نەلر ؟ .. اوزمان ، بن دە ... اكلايورمىسك ؟ ظن
ايتدىم كە سنىك فىكر كدە ... يعنى سىن ارزو ايدييورسك كە ...
خير ، خير ، قباحى سنىك دىكل . بن اوني كندى كندىمە
سودم .. حتى تا نە وقتلردن برى سوميشىم ، تا مەكتىبدن برى ...
شىمدى تماماً اكلايورم ، تا اولدىن برى ... (اجلالك ياننە
اوطورر)

اجلال اياغه قالقار

آه! چوجغم، احتياط ايت! ... بعضاً اويله خطالر اولور كه
 بوتون حياتي آرقه سندن سـوروكـلر ... هم او خطالر اويله
 آجيلره، اويله كدرلره سـبـب اولور كه ... بن بونك نه ديمك
 اولديغنه واقفم. اوني سوديكـه قطعياً امينيسك؟ احتياط ايت! ...

ژاله محزون

بنسه، سن ممنون اوله جقسك، ظن ايدييوردم.

اجلال

سكا يمين ايدهرم كه شو دقیقه ده دوشونجه مده سندن بشقه
 برشي يوق، يالكز سن وارسك. بشقه نه ملاحظه اوله بيلير؟ ...
 اويله اولسه نه فنا، نه چركين برشي اولوردی، بيله مزسك.
 فقط هر حالده سكا سويله مكه مجبور اولديغم شيلري سويله مليم.
 دوشون! سن او قدر كنجسك كه ... سن يا كيله بيليرسك.
 آه! حقیقه يا كيلمش اولسهك ... (ژاله خير اشارتي ياپار)
 ديمك، يا كيلما ديغكدن امينيسك، اويله می؟ ليكن نصل بيليرسك؟
 هله سويله باقهلم. نه اولدی، نه جريان ايتدی؟ بكا هپسنی ...
 (تكرار ژاله نك ياننه اوطورر)

ژاله

فقط هيچ برشي يوق كه ...

اجلال

هیچ برشی یوقی؟ او حالده اونی سودیککی نره دن اکلادک؟

ژاله سرداشانه

ایشته!.. یالکز، دون...

توقف ایدر

اجلال

اوت، دون؟.. صکره؟ دوام ایت...

ژاله

دون بوتون کون بی تعذیب ایتدی، هر کوندن دها فنا...
حتی دوشون بر کره، بکا بر بیک هدیه ایتکه قدر واردی...
او قدر عزت نفسمه دوقوندی؛ و او قدرده حدت ایتدم...
آرتق نهایت طاشدم... اوت، اوکا آجی آجی سویلندم،
و آغلادم... سویله دکلرم بک خاطریمه کله یور، لیکن بک
سرت شیلر سویله دم... بنده اونی قیرمق، اونک قلبنه
دوقونمق ایسته یوردم... نصل جسارت ایتدم ده سویله دم،
اونی بیله مم... فقط بر کره باشلادق دن صکره آرتق سویله دم،
سویله دم... کندیمی ضبط ایده میوردم. بکا باقمغه، بی دیکله
مکه مجبور اولسون دییه قلبمده بر آرزو، شدید بر آرزو
واردی. بو آرزومک سوقیله سویله یوردم، سویله یوردم...

آرزو ایدیوردیم که بنمده بر آدم اولدیغمی ، فرض ایتدیکی
 سرسم بر مکتب چو جوغندن عبارت اولمادیغمی آ کلا سین ،
 آ کلا سین ده حیرت ایتسون ، حتی عظمتنه دوقونسون ،
 قیز سین ... صکره ، یواش یواش ، ینه قورققلغم کری کلندی .
 قورققدم که بکا دار یلام سین ، کین باغلاما سین ، آرتق بردها بی
 کورمک ایسته مه سین ، آرتق آرامزده هرشی بیتمش ، قوپمش
 اولماسون ... ایشته بو ائنده ، بردن بره کند ی کندیمی آپ
 آچیق کوردیم . آ کلادم که اونک بنم اوزرمده بویوک بر قوتی ،
 بر حکمی وار ... کوردیم که بن اونک بر مالی ، بر اسیری ،
 بر شیشی کبییم . کوردیم که بنم حد تلرم عشق دن عبارتدر . بنم
 انفعال لرم ، بنم قورقولرم ، هپ عشق دن بشقه برشی دکلدرد ...
 اوت ، نهایت آ کلادم که ، آ کلادم که ایشته اونی سویورم .

اجلال

لکن او ؟ او نه دیوردی ؟ ..

ژاله

اومی ؟ برنجی دفعه سنده ... چونکه دون اوچ دفعه
 کوروشدک ... برنجی دفعه سی بکا ببکی ویرمشدی ، بن در حال
 چیقم شدم ، آغلادیغمی گورمه سین دیه ... بوسفر هیج برشی

اولمادی . . . ایکنجی دفعه سی ، بن دفتریمی آرایوردم . . .
انشاءالله ! حالا ونی بوله مامشدر . بوتون کیجه اویقوم قاچدی . .

اجلال

ذاتاً بو کیجه هیچ کیسه اویومامش . دوام ایت ! ایکنجی

دفعه سی . .

زاله

ایکنجی دفعه سی ، ایشته بن حدت ایدهرک طاشدم . او
زمان بندن عفو ایسته دی ، بنی تسلی ایتدی ، تسکین ایدهرک
شیلر سویله دی ، املی طوتدی ، بنم ایچون بر دوست و بر رفیق
اوله جغنی تأمین ایتدی . والحاصل غایت ایی یوره کلی بر آدم
حالی طاقندی ، فقط ینه معلوم اولان مغرور اداسیله . . .
بیلیرسک یا . . . لکن اوچنجی دفعه سی . . . اووچ ! اوچنجی
دفعه . . . یعنی دون آقشام بوراده ، کورسه یدک ، او نه خوش
بر حالی !.. او تماماً دکیشمشدی . باقیشی ، سسی ، حتی
او تبسمی بیله باشقه لاشمشدی . ممنون ، مسعود کورونیوردی .
بیلمم نه دن ؟ .. غایت مسعود .. و متجسس . . . بنی ماضیه
دائر ، مکتبه دائر ، کندی نفسمه ، حیاته ، هر شیئه دائر
استنطاق ایتدی . هر شیئی او کره نوب بیلمک ایسته یوردی .
بنم ایچون بک بویوک محبتی اولدیغنی ده سویله یوردی ، انسان

ايچون سوله مك پك آجي اولديغندن ، دها بيليرمى يم نلردن
 بحث ايديوردى . صكره بكا « سوکيلي ژاله !.. » ديدى .
 (کندی کندیته تکرار ايدر) سوکيلي ژاله !.. صكره ؟
 صكره ؟ بيلمه يورم ، آرتق خاطر مده دکل . بن بررؤيا ايچنده
 کييدم . يالکيز اولك بني احاطه ايدن نظريني ، بني اوقشاين
 تبسمني ، و سسني ... اوت ، تا قلبمك اك درين گوشه لرينه
 قدر آقان سسني تخطر ايدييورم . آه ! اجلال !.. غالبا بني
 سوييور !..

اجلال استعجال ايله

سويله ديمى ؟

ژاله

خير ، خير ، سويله مدي . سويله سه يدي کيم بيلير ناصل
 قورقاردم ... فقط ايسته ميورده دکلدم ... دوشون بر کره !
 او بني سوسين ... اولك قدر ممتاز بر آدم !.. باشقه ارککلره
 بکزه مزکه !..

اجلال

نه بيليرسك ؟

ژاله

سن اويله سويله مه دكميدي ؟ بنده ذاتاً آکلايورم .

آ کلا یورم ده مایوس اولیورم ، بن اوکا لائقی دکل دییورم .
 بنی ممکن دکل سوهمز ، دییه قورقیورم ... حال بوکه شمیدی
 اکر بنی سومیه جک اولسه ، ظن ایدیورم که اولورم ...!

اجلال

انسان بوندن اولورمی ؟

ژاله

آه ! اجلال ...!

اجلال آجی

خیر ، خیر ، انسان بوندن اولمز ، فقط اضطراب چکر ؛
 آجی ، درین بر اضطراب !.. (طاشقین بر شفقتله) بن ده ایشته
 سنک اضطراب چکدیککه ، دوشونمدهن ، امین اولمدهن کور
 ورینه بوعشقتک ایچنه نفسکی صالیویرمه که راضی اوله میورم ..
 تکرار ایدیورم : احتیاط ایت !.. بن یالکز سنک سعادتکی
 دوشونیورم ، یالکز سنک سعادتکی ، امین اول !.. آنجق
 بودوشونجه ایله سویله دیکمه قطعاً مطمئنم ... ذاتاً سکا « سنی
 سویورم ! » دیمه مش . دیمش اولسه بیله ... اونلر بونی همان
 سویلیویررلر ، بر کره سویله نیجه کندیلری ده اینانیرلر ، ونصل
 چابق اینانیویررلر سه ینه اوله چابق اونوتیویررلر . بن سنی
 وقایه مجیورم ، سنی بر تهلیکیه قارشى مدافعه وظیفه مدر .

باقه لم برهفته صکره بو جریان ایدن وقعہ نی تخطار ایدہ جگمی ؟
 نہ بیلیرسک ، بلکه تمامیلہ اونوتہ جق ، و اونوتہ قدن صکرہ
 کلوب سکادہ ...

ژالہ

دیمک بنی سومیور ؟ .

اجلال تدهشلہ وکمال قوتلہ مقصدینی مدافعه ایدہ رک

یووق ... بن اویلہ سویلہ مہدم ، بن اونی دیمک ایستہ مدم .

ژالہ

خیر ، خیر ، بن سنی بیلیرم ، اگر اساساً بر سبب اولماسہ
 بکا بویلہ سویلہ مزدک . مطلقاً بر سبب وار . اوت ، اوت ،
 سبب دہ بوندن عبارتدر . هاییدی ، شیمدی سویلہ مک نوتی
 سنک !... دیمک اونی آرتق سومکدن واز کچمہ لی ، اویلہ می ؟
 اونی سومک فنا ، مضر ، مہلک برشی اویلہ می ؟ سن راضی
 اولمایورسک . اوت ، اوت ، سوزلر کدن حس ایدیورم کہ
 راضی دکلسک . اولجہ ، راضی اولدیغک زمان بویلہ سویلہ -
 میوردک . . . مادام کہ بویلہ در ، نہ یایمق لازمہ سویلہ اونی
 یاپدیم ، سکا اطاعت ایدہ جکم ، نہ دیرسہک اویلہ یاپہ جغم . پک
 اعلی بیلیرسک کہ سن نہ سویلرسہک بن اونی دیکلہرم ... اونی
 آرتق سومیہ جکم ، چالیشہ چالیشہ سومہ مکہ فوق اولہ جغم ،

يمين ايدهرم ... (يواش يواش آغلامغه باشلار) بوندن
 اولميه جكم ، دميين ديديككم كي ... ليكن ... بني سن تربيه
 ايمه دكمي ؟ بني ده كندك كي هر شيئه قاتلانان ، هر سعادتن
 محروم ياشامغه قوت بولان برقيز يامادكمي ؟ .. البته اضطراب
 چكميه جك دكلم ... اولاً ، برپارچه مضطرب اولسه م بيله ...
 يواش يواش كچر ، بوني سندن بشقه كيمسه ده حس ايمز ،
 بوجهتن مستريح اول ...

(بوسبوتون آغلار)

اجلال اوني قوجاقلار وبويوك برطفيان تأثر وبكا ايله
 آه بنم سوكيلى ژاله جكم ، بنم جانم ، حياتم ، اولانجه
 حياتم ! .. خير ، سن اونكه تاهل ايدء جكسك ياوروم ...
 سن اوني سويورسك ، بوقباحته اصل بندء ! .. بوني اولجه
 ايسته ين بنم ، شيمدى ده بن ايسته يورم ، ودائماً ايسته يه جكم ،
 آ كلايورميسك ؟ (قوتله) ايسته يورم ، ايسته يورم ، بن
 ايسته يورم ...

ژاله متعجب

فقط ...

اجلال

اوت ، او ممتاز بر آدمدر ، هر مناسيله اي بر آدمدر ،

بشقه ار ککله بکزه مین بر آدمدر. سنی ده سویور، سویور،
 محقق بیایورم، امینم. اونی کورددم؛ اونکله کوروشدم، ایشته
 سکا سویله یورم که سنی سویور. سنی سومه مک ممکنیدر؟
 صفوت، ظرافت، کوزللك، کنجلك... قوی و مظفر
 کنجلك... هپسی سنده!..

(آغلایه رق باشنی ایکی الری آراسنه آلیر)

ژاله اوکا یا قلا شه رق

او حالده نه ایچون؟..

اجلال یواشجه اونی ایترو آغلامقده دوام ایدر

خیر، بنی بر آز براق، بردقیقه، رجا ایدرم!.. (سدوت)
 آه! بردن بره شاشیردم ده... آ کلا یورمیسک؟.. اوندن
 صکره ده... قیزم.. سن بنم قیزمسک، دکلی ژاله؟.. دمین
 سکا اوپله سویلر کن بیله بن ایسته یورددم که... فقط سکا
 آچیقدن آرزومی سویله یه مزددم، دکلی! بوندن امینسک یا...
 اساساً بر ثانیه بیله تردد ایتهدم، یمین ایدهرم، بر ثانیه بیله...
 ایشته بیتدی، اوت آرتق تماماً بیتدی... شیمدی بنی اوپ،
 ایجه اوپ... (کوزلرینی سیله رک) شیمدی بختیارم ایشته،
 نه قدر بختیار اولق ممکنسه اوقدر، سنی تأمین ایدهرم.

سندە ، سەندە بختيار سەك ، دىگىلى ؟ سويلە بىكا ، « بختيارم ! »
 دى باقىم ، بونى سويلەمكە بىنى اويلە مەنۇن ايدە جەكسەك ،
 اويلە مەنۇن ايدە جەكسەك كە ...

ژالە

اوت ، اوت ! .. (دىيەدە سەدادى كوردەك) ايشتە كليورا !

اجلال محزونانە تەبسم ايدەك

اوت ، كليور ، ذاتاً بىندە اويلە تەخمىن ايدىيوردم .
 (اوزاقلاشان ژالەيە) ئە ، نەيە كىدييورسەك !

ژالە

شىمدى بورادە بولۇنمىق ايستەم آرتىق ، برابر بولۇنمىغە
 جەسارت ايدەمىيە جەكەم ...

اجلال

نە اىچۇن ؟ مادام كە سىنى سوييور ، دىيورم . آە ! امين
 اول اونك جەسارتى بىندىن آز ... هايىدى بورادە قال ...
 (طاتلى بىر حەزىن ايلە) سەن قال ! بورادىن كىتەك بىكا دوشىر .
 شىمدى ...

ژالە

عجبا شىمدى بىكا نە سويلەيە جەك ؟ بىن اوكا نە جەواب

ویره جکم ؟ نه یایمالی !

اجلال

آه ! کندیکی قورو !.. یالکز قلبکده دویدقلریکه کوره
حرکت ایت ! امین اول ، حسیاتک سکا یول کوسترر !

مجلس ۸

ژاله سداد (کیررکن اجلاله تصادف ایدر)

سداد یواشجه اجلاله

دوشوندم !..

اجلال تعجب ایتیه رک ، کذا یواشجه

یا !..

سداد عینی اویون

اوت ! کئدم قونوشمغنی مناسب بولیورم. اکر مساعده
ایدرسه کز... زیرا... اویله ظن ایدیورم که کئدم قونوشورسم
دها ائی اوله جق. آ کلا یورمیسکنز ؟

اجلال تبسم ایدهرک عینی اویون
ازت آ کلا یورم ... (چیقمنغه تشبث ایدر)

سداد توقف ایدهرک عینی اویون
اوله دکلمی ! اونیکله آرامزده جریان ایدن وقعه یه ده
زیاده تفصیلاتیله واقف اولدیغم ایچون ظن ایدیورم که سزدن
دها قولای ایضاحات ویرمک ممکن اوله جق ... ایضاحات
ویرمک واقفیت ایتمک ...

اجلال دها یواش
اوت عقل سلیم دائره سنده ...

سداد دائماً یواش
اوله ظن ایدیورم ! ..

ژاله اونلره باقه رق
نه اولیورلر ...

سداد عینی اویون

صکرده بویله دها مناسب اوله جغنده شبهه یوق . اصل
ایضاحاتی، اسباب و دلائلی بندن ایشیتمه سی البته دها موافق
ظرافت اولور دکلمی ! نه یولده صایغیلرده، ملاحظه لره تبعاً
اونیکله تأهلدن فراغت ایتدیگمه قناعت حاصل ایتدی دکلمی ...

بن اونكه نصل تاهل ايدهرم؟ ممكن برايش دكل. سزده بو
فكرده دكليسكز ... ايكيملك رأيي بر ...

اجلال عيني اويون

اوت تماميله ... هايدى باقهلم الله جسارت ورسين! ..

سداد عيني اويون

اوخ! .. بنده جسارت يوق دكل ... (دكيشديرهرك)
بنم ايچون ياش مسئله سندن بحث ايمه ديكز دكلى ...

اجلال عيني اويون

مستريح اولك .

سداد عيني اويون فرط انبساط ايله

آه! نه لطفكارسكز اجلال خانم ... حقيقه نه قدر
لطفكارسكز ...

اجلال محزونانه تبسم ايدهرك عيني اويون

معلوم آ، بن ننه لر جنسندنم! .. هايدى ، باقهلم آرتق،
هايدى! ..



مجلس ۹

ژالہ سداد آشاغی یوقاری کزینہ رک ذہناً غایت مشغول

ژالہ آریجہ کندی کندی

« کندیکی قورو ، قلبکده دویدقلریکه کوره حرکت ایت »
بونلره نه حاجت ؟ مادام که بنی سویور .

سداد عینی اویون صیقیلش

مقدمه زور ، اوت ، اصل مقدمه زور ! ..

ژالہ آریجہ

عادتاً قورقیورم !

سداد اوکا باقهرق

زوالمی چوجوق ! فقط نه یاپمالی ؟ عقل سلیم بویله حکم
ایدیور . (جهرآ) هو هو ! ..

ژالہ آریجہ

برشی سویله میور . عجبا ، صحیح اوده قورقیورمی ؟ ..
نه دن قورقیور سانکه ؟ ..

سداد غزم ایله

ژاله خانم ..!

ژاله

اوو ... نیچون خانم دیپورسکیز ! نه دن ساده جه ژاله
دیپورسکیز ، حتی فاره دیسه کیز نه اولور ؟ .. بن آرتق اوکا
سس چیقارمیه جغم ، شیمدی بری بریمزله دوست اولمادیقی ...؟

سداد حرارتله

اوت ، دوست ، اوت ژاله خانم ، دوست ! کندی حسابمه
سویله یورم ، بن سزک ایچون جداً ، حقیقه بر دوستم ،
صمیمی بر دوست ... سزی سومک او قدر طبیعی برشیدرکه ...
یمین ایدهرم ، سزک حق کزده نیم قلم ... (توقف ایدهرک ؛
آیریجه) هو هو ! .. اولمادی .. اولمادی .. آخ ..!
مقدمه هیچ قولای دکل ...

ژاله اندیشه ناک آیریجه

بو کون نه اولیور ؟

سداد قرار ویرمش کورونه رک

باقیکیز ژاله خانم ...

ژاله

ینه خانم ...

سداد

ایسترمیسکیز، سزکله بر آرز عقل سلیم دائره سنده قونوشالم؟..

ژاله

عقل سلیم؟ بو نه دیمک اولیور؟ (آریجه) حالی دونکینه
یکزده میور .

سداد هپ نه دیه جکینی آرایه رق

دمین اجلال خانمک سزه سویله دیکی شیلر ...

ژاله

اجلالسکمی؟..

سداد

اوت، بن کیردیکم زمان بکا دائر سویله دیکی شیلر ...

ژاله استعجال ایله

سزه دائرمی؟ اجلال سزه دائر بکا برشی سویله مه دی .

سداد آریجه

نصل؟.. هیچ برشی سویله مه مشمی؟ او حالده ایش ده

زورلاشدى . آه! بر كره مقدمه ي بولسام ... اكر مقدمه ي
بوله بولسام ...

ژاله آريجه

مطلقا بنى اينجىته جك برشى سويله يه جك ...

سداد عقلنه بر چاره كلش كې

آخ! .. (جهرآ) ديمك اجلال خانم بكا دائر تصورندن
بحث ايمه دى اويله مى ؟ .. خوش، ذاتآ اونك سزجه براهيتى
اوله ماز آ ... ذاتآ تصورى عقل قبول ايدن شيلردن دكل .
او تصورايتمش كه ... هاه ! هاه ! هاه ! .. كولونه جك بر فكر ...
آه! اجلال خانم! .. بنى اولنديرمى قورمش . دوشونك بر كره ..

ژاله كوزلر بنى اينديره رك

يا ؟ ..

سداد

اوت . (آريجه) بولديغم چاره پك پارلاق بر چاره دكل .
فقط دها ايسنى بولاماينجه نه ياپيلير ؟ .. (جهرآ و كولهرك)
بنى اولنديرمىك ... هاه ! هاه ! هاه ! ..

ژاله آريجه محزونلاشهرق

نه قدر خفته بحث ايدييور .

سداد

قاچ کره و قاچ درلو افاده ايله آ کلاتمق ایسته دم که
بو خاطره کتیر یله جگ بر تشبث دکل . عادتاً بر چیلغناق ... بن
قوجه مش بر بکارم ... قوجه مشدن مقصد معلوم ، اسکی بکار
دیمک ... البته پیرانمش ، کهنه لشمش ، معلول ، مریض برارکک
دکم ، نه ده او یله اوله جق بر یاشده یم ، اللهه شکر ... اولدجه
کنجیم ، ا کلاشیلان حالاده ... (آریجه ، کندینی ضبط
ایدرك) اولمایور! .. (جهراً) ایشته بونک ایچون اجلال خانم
« کوریورسکز آ ، ممکن دکل ! .. » دیوردم ...

ژاله آریجه

سعادت چوق سورمه دی ...

سداد

دیگر جهتدن ینه دیدم که ، اوت ، دیگر جهتدن بنم ایچون
تخیل ایتدی ککز زوجه ده ... تخیل دیورم ، چونکه بو
خیالدن بشقه بر شی اوله مازدی . هیچ بر زمان بن بویله بر
امیده سوق فکر ایده مزدم ... (توقف ایدرك ، آریجه)
ینه اولمادی ! ... (جهراً) والحاصل بکا تخصیص ایتک
ایسته دیککز زوجه یندن اوزاق بر مسافه ده دکلکی ؟ اراده هر
وعدن فرقلر وار ، مزاج فرقی ، مشرب ، حتی ، اوت ،

ياش فرقى بيله ... واقعا او برچوجوق دینه جك قدر كوچك
دكل، بونی يك اعلى بیلایورم، حتی کوروندیکندن فضله در بيله،
هم ایجه فضله، لیکن بکا کوره، دوشونکیز بر کره، بکا
کوره ! ...

ژاله محزونانه

دیمك، سدادبك، اونی كندیکزه لائق کورمیورسکز !

سداد

خیر، الله ایتمه سین. او دیمك دكل، بالعکس، بن
کندیمی اوکا لایق کورمیورم. بودادوستده تأدیه ایتدیکمدن
فضله آلمق موافق انصاف دکلدر، دیورم .. یالکیز اونك
ایچون، اوت، منحصرآ اونك ایچون قورقیورم. ا کر اونك
سعادت بنم المده اولسهیدی، بیلسه کز، نه بویوك سویجوله
حیاتی، آرتق هیچ بر شیلره یارامایان بو حیاتی اوکا وقف
ایدردم. البته بنده اويله بر مشفق، مفتونیت و مربوطیتله
مملو؛ و عین زمانده تنویر و ارشاد ایدن بر حمایت عاشقانه
بولوردی که اونی باشقه کیمسه ده بوله بیلمه سینه امکان یوقدی.
اوت، هر ارککك عشقی آلتنده ایشته بویله بر نوع معنای
صحابت و حمایت واردر که شباب تناقص ایتدیکجه او بالعکس

تزايد ايدر . بو اويله بر سرمايه شفقت ، اويله بر خزينه رقت
و مودتدر كه حياتك بوتون خشونتارينه ؛ غلظتارينه تصادف
ايدلديكه قلب اونلرك طاشمه سنه مساعده ايتمهرك ضبط
ايتمش ، درين كوشه لرده صاقلايهرق بريكديرمشدر . حياتده
انكسارلر و سنه لر تراكم ايدر كن بر ياندن ده قلبدده بو دفينه
احتساسات ييغيلوب قابارمشدر . بر قادين بو دفينه يه النى
اوزاتيرسه اونك بيتمه سندن اصلا ، اصلاقورقمايه رق ايسته ديكنى
آلير... اووچ! .. ايسته بونك ايچون اجلال خانم ديوردم كه:
« ممكن دكل ، كورييورسكزيا ، ممكن دكل ! ... » (آريجه)
شبهه يوق ، بن المدين كلنى ياپيورم ، نه ممكنسه سويله يورم .

ژاله باشنى صاللايه رق

سز اوني سوميورسكز ، ديمك سداد بك !

سدادك ياننده اوطورمشدر . ايكنجى پرده ده سدادك ياننده
اوطوردينى زمانكى كې ماصه نك ياننده و باشى اللرينك
ايچنده در .

سداد

نصل ! سوميورمى يم ؟ مساعده بيورك ، بن اويله بر شى سويله مه دم .
سوييورم ده ديمه دم ... شو حالده مرايمى ايضاح ايدمه مشم ...
بن حقايق ساحه سندن چيقمادم ... (مجلوبيتله) ينه حقايق

ساحه سنده قاله لم ... مثلاً اختیار د کلم . بو دوغریدر ، لیکن
اون سینه صکره ، دوشونکر ، اون سینه صکره ، یاشم ... اون
یاش فضله اوله جق .

ژاله محرزانه

اوده ...

سداد

اوت ، اوده ... بوده دوغری ! فقط ایکیسی بر دکل .
چونکه اون سینه صکره ، بن ، دوشونکر ، شیمدی بن
اوتوز . هوهو ... اوتوز اوچ یاشنده یم .

ژاله سونجله آیریجه

یلان سویله یور ، یاشنی صاقلایور .

سداد

حال بوکه ... او آنجق اون طقوزنده ...

ژاله کندینی اونوته رق

یکرمیسنده ! ...

سداد آیریجه

متصل کندینی بویوتیور ! ... آه ! سوکیلی چوجق ،
بن نه قدر سوییور ! . (جهراً) آه ! سوکیلی چوجغم ! بنم

جسارتمی قیرمایک . رجا ایدهرم ، بن بالعمکس قوته محتاجم ،
 آه بیلسه کز ... بوتون بو شیلر لذیز بر رؤیادن عبارت ،
 ورؤیا نه قدر جاذابه دار ، نه قدر شوق انگیز اولورسه اولسون ،
 بونی حقیقته تبدیله قالقشمتی نه عقله مطابق ، نه ده تدبیر
 و احتیاطه موافقدر . یا صکره اونک کنجلیکنده بر حمله
 عصیان اولسه ، الدامش اولدیغنه ، خطا ایتدیکنه حکم ایتسه ده
 ندامت دویسه ... اوت ، اوت ، بونی محال بولیورسکز ، فقط
 بن ، بن امثالنی کوردم . بویله اولور و بویله اولورسه بنم
 ایچون نه بویوک عذاب وجدان اونک ایچون ؛ نه الیم بر اشکنجه ...

ژاله باشنی اکرک سا کنانه اغلار

سز اونی سومیورسکز .

سداد

خیر ، خیر ، بویله سویله مه یک ؛ دوشونک ، بر کره ... هم
 اغلامایکزر جا ایدرم ، باقک ؛ یالواریورم سزه اویله اغلامایک ! ..
 (آریجه) شیمدی ده بر آغلامق چیقدی . بر بو اکیسکدی ،
 (جهرأ) بی اکلایسه کز آ ، سویله دکلمی محاکمه ایتسه کز آ ...
 امین اولیکز که او کا بنم عش ... مح ... خلوصمک دها
 پارلاق بر نشانه سی و برمک ممکن دکلد ، سزه یمین ایدرم که ؛

ژاله خانم ، شو دقیقه ده اوکا اک پارلاق نشانه خلوصی ویرمش
 اولیورم . (ژاله باشنی کاملاً الارینک اراسنه آلیر) ژاله : ...
 بنم قیمتی ، سوکیلی فاره جکم ! .. اوت ! بو یاپدیغم فوق البشر
 برغیرتدر . فقط بو غیرتی آنجق اونک منفعتی ایچون یاپیورم .
 اونی فدا ایتمهک ایچون کنیدی فدا ایدیورم ! ...

سداد آرتق کنیدیسی ضبط ایدمهیه رک

لکن بویله سویله میگز . هم حقسنزلق ، هم مرحمتسنزلک
 ایدیورسکز . حس ایتمه یورمیسکز ؟ کنیدی نفسه نصل جبر
 ایدیورم .. تردد ایدن بنم عزیم ، کنیدیسی مدافعه ایدن بنم تجربه مدر ؛
 یوقسه قلم دکل ، بالعکس بندن قاجوب قورتولماسین دییه اونی
 ایکی الارمله طومغه چالیشیورم . کورمیورمیسکز ؟ هر شی
 بنی اوکا دوغری کوتورویور ، سوروکل یور . اوصاف وجدانک
 ایلمک رعشه لری ، او معصوم ناصیه نک ایلمک احرار لری ، اونک
 پاک کینجلیکنک معمای دلفریبی ، تازه حسننک جاذبه روحنوازی ،
 والحاصل هرشیی ، حتی اونک طرفندن سولش اولمق افتخاری ،
 بنی اوکا سوق ایدیور ، بو حیاتمک اک بویوک انجذابیدر . حتی
 عمرمک ایلمک حکایه سوداسی و صوک امکان سعادت بوندن
 عبارتدر . بونی کورمیورمیسکز ؟ ایشته بو رؤیای جنت
 شوراده ، یانی باشمده ، تا اوکده ، اونی یاقلامق ایچون

يالکز المى اوزاتمق کفايت ايدهجک ده ...

النى ژاله يه دوغرى اوزاتير .

ژاله النى سدادک الله قويهرق ، طاتلى بر سسله

پكى او حالده ؟ ..

سداد تردد ايدهرك

اوت، او حالده ؟ .. (نهايت طاشه رق) نه اولورسه اولسون !

سنى سوييورم ، ژاله ، سكا پرستش ايدييورم ...

ژاله آيريجه النى قلبنه قويهرق

آه ! نه سعادت ! ..

سداد

آرتق بودرجه سى ده فضله .. ده ازياده مقاومت ممکن دکل ..
 بن سنک قدر بيله متانت صاحبي دکل . ده ا فضله سنه قادر دکل .
 مغلوب اولمق ، سنى سومک ، سكا اعتماد ايتک بر جنتدر . بيلييورم ،
 حس ايدييورم ، فقط باس يوق ... بوتون حياتمده ندامت
 ايدهجک اولسه بيله شوکوني ، شو ساعتى قازانمش اوليورم .
 سنى سوييورم ، سنى سوييورم ، سوييورم ... (ديزلرينه
 قاپانيرجه سنه) شيمدى اينانيورميسک ، بکا باق ، ايشته شيمدى
 بن تيترييورم ، بن اغلايورم . آه ! سوکيلي ، سوکيلي چوجق ...

بيلسهك ، كندىكى سومكلېكمە مساعده ايتديكك ايچون ، بونى
 ايستهديكك ايچون سكا نه قدر متشكرم ، نه قدر متدارم .
 بونى سكا سويلر كنده نه قدر بختيارم ... اوت ، نهايت سكا
 سويلدمكه جسارت ايدر كن بيلسهك نه عظيم بر سعادت ايچندهيم ...
 امان ياربى !.. بيلسهك ، آرتق قلبنه نظارت ايتيمك ، اونرديه
 كيتمك ايستهيورسه سربست براقق . اونى آب آچيق براقق ،
 اوزمانه قدر هيچ بر وقت نفسى تماماً كيمسهيه ويرمه مشكن
 نهايت تماماً تسليم اولمق ، بيلسهك بو نه بويوك سعادت !..

ژاله متأثر و مسرور

سداد بك ...

سداد يواشجه

خير ، آرتق ، بك دكل ، ساده جه ، سداد .. هم مستريح
 اول ، سو كيلي چوجوق ، بنم عشقمدين قورقه ... سنى نه بر
 خطا ، نه ده بر غفلت نتيجه سيله قازانمق املنده دكلدر . او
 انتظار ايدى جك ، شايد بر كون اونى ايسته ميه جك اولورسهك
 بلا احتراز سويله ، سكا قارشى نه عصيان ايدى جك ، نه منفعل
 اوله جق ، بكا ، ولو بر دقيقه اولسون ، سنك طرفيكدن سولش
 اولمق خولياي لطيفنى بخش ايديشكه قناعت ايدى جكم ، سنك

نأصيه كه ايلك و صوك بوسه مي وضع ايدە جكم ، حتى دودا قلمدن
بر كلة شكائت بيله چيقمق سزىن اوزا قلاشوب كيدە جكم .
يال كز ، سو كيم ، چاليش كه بو بويلە اولماسين ، هيچ بر زمان
بويلە اولماسين ... نه ، بكا برشي ديمزميسك ؟

ژاله مسرور

دوام ايدىكز !

سداد

آه ! سو كيلي ژاله ؟ .. ديمك سن دە ، سن دە بنى سويورسك ،
اويلە مي ؟ صحيح يا كيلميورميسك ؟

ژاله

خير ، سداد بك ! ..

سداد

يوق ، آرتق بك يوق ! .. سداد ، يال كز سداد ...
سداد دىيىكز باقەيم ، هم بنى سودىك كزى سويلەيىكز ، اولمازمى ؟
بنى سويورسكز ، دكلى ؟

ژاله غايت يواش

اوت .

سداد

خير ، بويلە دكل ، سز سويلەيك ، سز كندىكز سويلەيك .

بنی اويله سويندیره جکسکز که ... سويله يک باقهيم : « سداد ،
 سزی سوييورم !... » دپیکز . بن سويله يهيم ، سز تکرار
 ايدک ... سداد ...

ژاله تکرار ایدەرك

سداد ...

سداد

سزی سوييورم ...

ژاله

سزی ... جسارت ایدەمیه جکم .

سداد اصرار ایدەرك

ژاله ، هايدی ، ژاله ، سوکیلی ژاله م هايدی ، رجایدرم ،
 ایسترمیسک ، آیاقلریکه قاپانهیم ...

ژاله غایت یواش

سزی ... سزی سوييورم .

سداد

آه ! بنم سوکیلم !.. بنم روحم !.. بنم مینی مینی بیاض
 فاره جکم !. (دها محبتله) قاریجغم !.. دیمک سن بنی سوييورسک .
 یا بن ، یا بن ، یا بن سکا پرستش ایدیورم . لیکن ...
 (اونی دراغوش ایتک ایستر . ژاله چکیلیز)

ژاله شاشیرمش

لیکن اجلال ؟ .. اجلال نروده ؟ ...

مجلس ۱۰

ژاله سداد اجلال مجلسك صوگنده کیرمش بولونور

اجلال

اجلال آرتق اونوتولدی .

ژاله قوجاغنه آیلهرق

یوق ! .. هیچ بر وقت ! ..

سداد

کیم بیلیر بنی نه قدر ضعیف بولویورسکز . مع مافییه بن شدتله مدافعهیه عزم ایتشدم . لیکن (ژاله یی گوستره رک) بر کره شوکا باقیکز ..

اجلال

اوسزك كندیسنی سودیککزی پك اعلی بیلوردی ...
ذاتاً بو حکایه بشقه درلو بیتهمزدی .

سداد

اومی ؟ نصل ؟

اجلال

بن خبر ویرم شدم .

سداد متعجب

یا ! .. (ژاله یه باقار ، او کوزلرینی ایندیرر)

اجلال

سزده اونک سزی سودیکنه واقفدیکز .

ژاله

واقفمیدی ؟

اجلال

رسم دفترینی بولمش ! ..

ژاله

یا ! .. (یواشجه اجلاله) او حالده ، اجلال ، اکر بنمله

تأهله قرار ویرمه سهدی ناموسم برباد اوله جقدی .

سداد

سوکیلی چوجوق !

اجلال طاتلی برتسمله

فقط آرتق ناموسکی تعمیر ایدیور . خاتمه سی خیر اولان

ایش خیردر ، دکلی دامادم ؟ ..

مجلس ۱۱

ژالہ سداد اجلال النده بر تاغرافلہ پریشان بر حالده
سرور پاشا صکرہ نرمین و شہبأ

سرور پاشا

یووق .. بوهیچ یاپیلیر شی دکل . بنی دیکله ، سن دون
آقشامدن بری بوراددسک ، نه اولدیغکی ، غیبوبتک اثناسنده
نه جریان ایتدیکنی ، نه ایچون او قدر قالدیغکی اون کره ،
اوت ، بلکه اون کره صوردم ... بکا هیچ برشی آ کلاتمق
ایسته مه دک . نهایت کورووجه که یازمغه مجبور اولدم ، وقعہ یی
اورادن کلن جواب ایله او کره نمش اولیورم ...

نرمین کیره رک

نه اولمش ، نه اولمش ، نه وار ؟ ..

شہبأ کیره رک

نه اولیور ، نه اولیور ؟ ..

سرور پاشا نرمینہ

نه اوله جق .. اجلال دول قالیور .

نرمین و شہبأ

قوجہ سی اولمشمی ؟ ..

سرور پاشا

پكى ، فقط بكا نه ايچون سويلەمەدك ؟ حتى بالالتزام
صاقلادك .

اجلال

مسعودلر ك سوينجه برسياه كواسكەدوشورمك ايستەمەدم .

شەبأ

كىمك سوينجه ..؟

نرمين

مسعود اولانلر كيم اوليور ؟

سرور پاشا

اوت ، بو مسعودلر كيملر ؟

اجلال

صحيح ، خبريكز يوق ... سداد بك اولنيور .

نرمين شەبأيه باقەرق

سداد بكمى ..؟

شەبأ نرمينه باقەرق

يا ! عجبا كيمكله ؟

نرمين شەبأيه باققده دوام ايدەرك

اوت ، كيمكله ، كيمكله ؟

اجلال ژالەيى كوسترەرك

ایشته نشانلیسی ...

سرور یاشا

ژاله می ؟

شهبأ

فاره می ؟ ممکن دکل .

نرمین آیریجه مستهزیانه

بر چو حقله ... ذاتاً ارککلر قوجه نیجه بویله اولورلر .

سرور پاشا اجلاله

شاشیله جق ایش !.. ا کلاشیلیر دعوی دکل !.. حال کدن

ده بر شی سزیله دی ...

اجلال طاتلی بر ادا ایله

سیدینی سویله دم .. (یواش سسله قونوشان سدادله ژاله یه

باقه رق) آرتق بوندن صکره کدرمی سربست براقیرم ...

ژاله قوشوب اجلالک بویننه صاریله رق « ننه جکم ؟ ... »

اجلال

دیمک ، بختیارسک ؟ ..

ژاله اولانجه روحیله

آه ! هم بیلسهک نه قدر !..

اجلال اوکا باقار ، و حرارتله اوپه رک

پن ده بشقه بر مکافات بکله میورم ...

ادوار-پایه روناك « لاسورى » اسمنده كى اترندن تطبيقاً ترجمه
ايدىلن « فاره » برنجى دفعه اوله رق دارالبدائع هيئت تمثيليه سى طرفندن
۱۳۳۴ سنه سنده تپه باشنده صحنه يه وضع اولونمشدر .

اجلال ، قنار - ژاله ، اليزا - شهبأ ، آدرين - نرمن ، روزا
خاملر ، سداد ، راشد رضا - سرور پاشا ، نورالدين بكتر طرفندن
ابداع ايدلمشدر .

DATE DUE

To renew
call 292-3900

[illegible]

MAIN STACKS

